

ANG PAGPAHIULI SA PUNOANG PANGASAW-ONON



Salamat, Igsoong Orman. Panalanginan ka sa Dios.

Maayong buntag, mga higala. Ug usa kini ka pribilihiyo nga makabalik dinhi sa tabernakulo, sa niining matahum nga buntag sa Pasko sa Pagkabanhaw, sa pagsimba, sa mahimayaong pagkabanhaw sa atong minahal nga Ginoo ug Manluluwas, nga si Jesus Cristo.

² Gusto kong isulti nga ako gayud. . . Sa tanang mga mensahe nga akong napatalinghugan nga giwali sa atong pastor, ang sa kaganinang buntag ang pinakamaayo. Miuli ako ug gisultihan ko ang akong asawa. Miingon ko, “Honey, usa kini ka buntag nga wala nimo napatalinghugan kadto, tungod wala man ka mibangon og sayo.” Mao kadto ang pinakamaayo nga napatalinghugan ko mahitungod sa pagkabanhaw, sa tibuok kong kinabuhi. Ngani wala pa ko nakapatalinghug og unsa man nga mas maayo, mahitungod sa pagkabanhaw kaysa sa gihatag kanato sa atong pastor kaganinang buntag. Usa gayud ka talagsaon nga mensahe, ug ang tanan direkta gyud mismo sa punto. Nagapakita lang, nga, pagmadihogan ang usa ka tawo, kita n’yo, kung unsa—kung unsa ang mahitabo. Aduna gyu’y dakung epekto kung ingon-ana. Ug busa malipayon kita nga—nga gihatagan kita sa Dios og ingon niining maayo nga pastor.

Ug karon gusto kong pasalamatang ang matag usa kaninyo.

³ Bueno medyo dugay-dugay na kami nga ania dinhi, sa nagkalainlaing higayon, ngadto nganhi, pero karon moadtoay na pud ko sa natad sa pagpangmisyong, sumala sa inyo nang nasayran. Niining semanaha, moadtoay ko padulong sa mga Cree Indian, didto sa British Columbia. Ug pagkahuman didto, gikan didto, padulong sa Fort St. John. Ug dayon, sa niining umaabot nga ting-init, kon itugot sa Ginoo, didto na pud sa. . . sa tibuok West Coast, didto pud sa Sidlakan, ug—ug didto sa West Coast, ug padulong sa Alaska, Anchorage, Alaska, ug sa palibot didto. Ug dayon, tingali, gikan didto, mangsusi ako para sa Africa ug sa tanang uban pa sa kalibutan, para sa umaabot nga tingtugnaw. Busa madugay-dugay pa tingali adisir ko makabalik pag-usab dinhi sa tabernakulo. Basin, hangtud pa sa Agosto o sa niining umaabot nga tinglagas, adisir ko makabalik.

⁴ Ug gusto kong pasalamatang kamong tanan tungod sa inyong maayong pagpakigtimbayayong, og sa tanan nga gibuhang ninyo. Ug pasensya na nga wala kita’y igong lugar para sa mga

tawo dinhi sa niining mga buntaga. Ngani aduna man kita’y plano para sa pagpatukod, sumala sa inyo nang nasayran, aron magtukod og mas daku-daku nga simbahan, sa higayon . . . para sa niining mga buluhaton. Ug busa tingali’g pagasugdan na kana sa gilayon. Sugdan na nilang trabahoon ang simbahan. Karon mahimong . . .

⁵ Usab, gusto kong pasalamatan ang matag usa kaninyo tungod sa inyong . . . tungod sa inyong mga regalo, mga birthday kard, mga kard sa Pasko sa Pagkabanhaw, mga regalo nga inyong gihatag kang Billy, ug uban pa, para sa, sa . . . ug ang mga para sa ako; si Igsoong Wood, ug daghan kanila. Mao nga ginapasalamatan ko ang tanan niadto.

⁶ Ug moduol ang matag usa ug moingon . . . Wala lang kamo nasayod kung unsa kalisud. Pag-adunay moduol ug moingon, “Karon gusto namo nga makita si Igsoong Branham. Gusto namo nga makita ang imong amahan,” og uban pa. Ug moingon, “Puno na ang listahan.” Dayon, oh, kung nasayod lang kamo kon daw sa unsa ka makauulaw para kanimo, pag imong—imong—ingon niana lang kadaghan ang imong maatiman. Ingon nga mao lang gyud kana ang mahimo mo.

⁷ Ako—mahimo ko lang unta nga makagahin og hataas nga oras para sa matag usa, nga makalingkod gayud. Ug nagalaum ako nga mabuhat kana sa ubang higayon. Pero dili gyud kana mamahimo, dinhi niining yutaa, tungod kay aduna ma’y mga tawo nga nagaanhi dinhi nga gikan pa sa tibuok kalibutan, kita n’yo, gikan sa tibuok kalibutan. Ngani niining semanaha, may mga tawo nga mianhi dinhi nga gikan pa sa nagkadaiyang mga nasud, ug nahinabi ug naiampo sila, niining semanaha, gikan sa mga nasud sa tibuok kalibutan.

⁸ Ug kung dinhi lang sa atong gamay’ng, lokal nga kongregasyon sa Jeffersonville, malipayon ako nga makagahin og duha o tulo ka oras para sa matag usa, ug maatiman gayud ug dinha pa sila mapapauli. Pero, kita n’yo, bisan pa og aduna lang siguro, ingnon nga, lima ka tawag gikan sa, o, tingali, duha ka tawag gikan mismo sa atong lokal nga komunidad, aduna man pud og usa o duha ka gatus gikan sa tibuok kalibutan, sa mao ra mismong orasa nga nagaabot kining duha. Busa adunay literal nga linibo nga dili na nako arang maatiman, sa kon asa man, kita n’yo, nga mga tawo. Ug aduna pa gyu’y mga tawag nga “Umanhi ka *dinhi*, ug umadto ka *didto*,” gikan sa tibuok kalibutan, ug may gipadala na nga mga tiket sa eroplano, og tanan nang uban pa, “Umanhi ka, iampo ang mga may sakit,” pero dili mo man mahimo kana.

⁹ Busa, mapalaw ang mga tawo. Ako, usab. Mao nga gusto ko lang, himoon ang akong pagsugid, sa niini nga buntag sa Pasko sa Pagkabanhaw, para isulti nga—nga wala ako mahibalo kung unsay buhaton mahitungod niini. Tungod nga daghan gyud

kaayo, kabalo mo, ang—ang angay'ng adtoan, linibo-libo ka mga tawo gikan sa tibuok kalibutan. Nahimo ko na ang ikapito kong pagbiyahe, sumala sa inyong nasayran. Ug aduna ko'y personal nga pagpakigkontak sa sobra napulo ka milyon ka mga tawo gikan sa tibuok kalibutan.

¹⁰ Busa mahunahuna gyud ninyo kung unsa—kung unsa kana, kung unsa kalisud kana kanimo. Ug sa makadaghang higayon nagaabot kita sa ginagmay'ng mga kalisud, ug kabalo ko nga kamo, usab, ug ginagmay'ng mga pagkapalaw. Pero palandunga n'yo ang mga ingon-ana nga aduna ako, ang mga pagkapalaw nga aduna ako, pag anaa sa telepono ang mga inahan nga may sakit, nagaingon, “‘Oh Dios. . .’ Bueno, kadali lang, Igsoong Branham. ‘Ginoong Jesus, ako—ako—akong ginaampo nga Imo siyang ipadala.’” Ug—ug bag-o ko lang gani gibutang ang telepono gikan sa usa pa, ug *ania na pud*, ug *ania na pud*, ug *ania na pud*, ug sa tibuok kalibutan gayud. Kabalo na mo kung unsa kana. Ug kana—dili gyud kana sayon pag ang tawo nga anaa sa pikas linya sa telepono, adunay bata nga may sakit, o bana nga may sakit, o kaha naghimalatyon na nga asawa, nga nagaampo nga makaadto unta ka. Karon, hunahunaa gyud ninyo kana.

¹¹ Dili ikatingala nga usa ako ka nerbiyoso. Tungod nga. . . Igo na kana nga mahimo ang tawo og ingon-ana. Pero gibuhat ko na kining usa ka butang, imbis nga mabalaka pagayo. Gipaningkamotan kong magpabilin nga kalmado, pinaagi sa pagsentro sa akong mga mata ngadto sa Kalbaryo ug magpadayon lang, sumala sa buot Niya nga buhaton ko. Ug daghan sa akong mga sayup, ginaampo ko nga pasayloon unta ko sa Dios sa mga butang, nga tingali angay unta ako nga miadto sa usa ka lugar ug wala ako miadto. Tawo ra ako, ug makahimo. . . malagmit nga masayup.

¹² Adunay usa ka medyo, kataw-anan nga butang nga gisulti dinhi sa luyo nga nataran, kaganinang buntag, sa paggawas ko gikan sa pagsubang sa adlaw nga panerbisyo.

¹³ Aduna ako'y usa ka minahal nga suod nga higala. Tingali'g ania siya karon sa kon asa man. Siya'y taga-Chicago. Ang iyang ngalan mao si Stewart. Siya'y mga. . . si Ed Stewart, sa tan-aw ko siya'y mga setenta na, o sobra pa. Ug gitagbo niya ako didto sa gawas. Ug ginatigum niya ang iyang ikapulo sa tinag-diyes sentimos. Ug gihatagan niya ako og usa ka kahon sa mga tinag-diyes sentimos, nga mga *ingon-ani* ka daghan. Ug, oh, wala ko kabalo, ako. . . Siyempre, mapaingon man ang mga niini para sa buluhaton sa pagpangmisyon, sa ubang nasud.

¹⁴ Ug ang buotan niyang higala, ug higala pud nako, si Igsoong Skaggs, Leonard Skaggs, nga taga-Lowell, Indiana, atua pud didto. Ug wala ako nahibalo kaniadto, nga usa diay siya ka Mason. Nagasul-ob siya og usa ka hemelo nga ilhanan sa mga Mason. Ug naghigot kami mahitungod sa grupo sa mga Mason.

15 Ug miingon kanako ang tigulang nga si Igsoong Stewart, ingon niya, “Gusto nako ka, Igsoong Branham, ug gusto ko untang makig-istorya kanimo.” Pasayloa ko niining maong pamahayag. “Pero,” ingon niya, “mas lisud pa man kang makaplagan kaysa usa ka pundok sa mga Turko.”

16 Adunay miingon kanako, dili pa lang dugay, miingon, “Nalipay ako nga dili ingon-ana kalisud makaplagan ang Ginoo.” Bueno, dili ko man tuyo nga mamahimong *ingon niana*. Gihigugma ko ang mga tawo. Pero ako. . . Hunahunaa lang ninyo. . .

17 Miuli ako ug gisultihan ko ang akong asawa, ug nanglingkod kami sa may lamesa ug nangatawa, kung unsa gyud bitaw *kalisud* nga makakaplag og usa ka hugpong sa mga Turko, kabalo na mo. Busa—busa ako. . .

18 Nagalaum ako nga dili pud unta *ingon niana* kalisud, Igsoong Stewart, kung ania ka man sa gihapon. Pero nahunahuna ko nga usa kadto ka diyutay’ng kataw-anan nga medyo nagpakatawa kanatong tanan.

19 Busa, gusto ko gyud unta nga maduaw ang matag usa. Ug gihigugma ko ang matag usa. Tinuod kana. Higala man sila o kaaway, pareho ko silang gihigugma.

20 Ug mao nga ginatinguha ko gayud ang inyong mga pag-ampo alang kanako, sa niining umaabot nga panagtigum. Moadto ako sa mga Indian. Ug kabalo mo, kamo, pag anaa kamo sa Roma, kinahanglan ninyong mahimong usa ka Romano; ug pag anaa kamo uban sa mga Indian, kinahanglan ninyong magkinabuhi nga sama sa mga Indian.

21 Ngani ang higala kong misyonaryo, nga kaubanan nako sa pagpangayam niadtong didto ako sa highway, sa Highway sa Alaska, usa siya ka buotan kaayo, batan-on pa nga lalaki, ug ang iyang asawa, gikan sa usa ka maanindot nga panimalay, ug ako. . . ang iyang mga bukton didto adunay mga nuka-nuka, ug nalukop ang luyo sa iyang mga dalunggan, ug mga ingon-anang butang. Ug natingala ko kung unsa kaha’y nahitabo sa iyaha, “Aduna ba siya’y eczema?” Tungod diay kadto sa mga pulgas ug mga tughok, kon diin kinahanglan niyang mo-. . . kung unsa nga kinahanglan una niyang mopuyo didto. Ug busa kinahanglan mung mopuyo mismo kauban sa mga tawo, aron makabig sila ngadto kang Cristo. Sila’y mga kabilin man ni Cristo. Mga tawo sila nga gipakamatyan pud Niya, ug kinahanglan aduna gyu’y magsangyaw ngadto kanila.

22 Ug nakatambong ang pinakapangulo nila sa usa sa akong bag-ohay lang gipahigayon nga mga panagtigum sa amihanan, ug ang Balaang Espiritu nga atua sa maong panagtigum, o didto sa kampinganan, sa lugar (sa balay-abotanan sa mga turista, nagtoo ko nga didto kini kaniadto), gitawag ang iyang ngalan, ug gisulti kung kinsa siya, ug kung unsay gibuhat niya. Ug,

oh, grabe, mao na mismo kadto ang nagpanghimatuod, kaniya. Nasayod siya nga ang mga tawo dili gyud makahimo niadto; siguradong nagagikan gyud kadto sa Makagagahum-sa-tanan.

²³ Busa, gipadilaab gyud niadto ang maong pinakapangulo, og ang kinatibuk-an niadtong baybayon didto. Ug magpahigayon kami og mga panagtigum sakay sa usa ka gamay'ng sakayan nga may layag, magsangyaw kami ngadto sa mga lugar nga among maadtoan, sa Portland, ug padayon didto, niadtong baybayon, ug ngadto sa uban pa, ngadto sa mga Cree Indian, nga mga sinalikway. Daghan sa mga kaigsoonan, nga nagapahigayon og dagkung mga buluhaton, ang dili makasangyaw didto. Bueno, ang mga Indian . . .

²⁴ Wala ni usa ka sentimos nga kuwarta . . . Sumala sa inyo nang nasayran, wala gyud ko sukad nagkuha og offering sa akong mga panagtigum. Ug wala ako nagakuha og kuwarta. Tungod nga ang iglesia dinhi mao—mao man ang nagapangabaga niana nga panagtigum para sa mga Indian. Hinoon ang uban sa inyong ikapulo, ug mga ingon-anang butang, mapaingon sa galastohon, aron ihatud kining Mensahe sa kaluwasan ug kagawasan ngadto sa mga kabus, og walay-kahibalo nga mga Indian.

²⁵ Ug sa tinuod lang, sila baya ang mga Amerikano, kabalo mo. Kita mao ang mga langyaw, nakita n'yo. Nangabot kita ug gilog kini sa ilaha. Ug gusto natong . . . Dili na nako mabalik sa ilaha ang ilang nasud, apan mahatag ko kanila ang paglaum nga anaa kang Cristo, nga mao'y magahiusa kanato ingon nga managsoon sa umaabot nga adlaw didto sa Dapit kon diin wala na'y panag-away ug panag-ilogay og yuta, sa usa'g usa. Usa kana ka Yuta, nga may lugar para sa tanan. Mapasalamaton gyud ako pagmoabot na kana nga panahon, kung ang tanan nakong mga minahal sa kinabuhi luwas na ug andam na nianang panahona.

²⁶ Karon, daghan ako og mga higala nga akong nakita, nga ania dinhi, samtang nagasulti ako. Sa tan-aw ko mora'g namatikdan ko si Igsoong babayeng . . . Dili ko lang madumduman ang iyang ngalan. Lee kini kaniadto. Husto ba? Dili ba ikaw si Mrs. Lee? Ania ba ang imong anak nga babaye, mga anak nga babaye, kadtong usa nga naayo? Maayo kaayo. Ang usa anaa sa Good Shepherd's Home, o dili . . . Unsa gani ang tawag niadto? "Sister of . . ." (usa ka pang-Katoliko nga Institusyon) "Lady of Peace," mao kana mismo. Nalibog na ko sa tanan nianang pang-Katoliko nga mga ngalan. Ug bueno, didtong dapita, ug siya'y . . . nagkaaduna og pagkanerbiyos, sa utok. Ug ang mahal nga Ginoong Jesus, samtang naglingkod kami . . . atua ako niadto sa may tiilan sa higdaanan, ug ang iyang minahal nga inahan ug amahan nagatindog duol didto. Ug gipahayag sa Ginoong Jesus nga wala na kadto, og tapos na. Naingon niadto siya. Pero tapos na kadtong tanan. Ug, siyempre, nasayod kita nga mapasalamaton gayud ang maong igsoong babaye niining buntaga, ug . . .

27 Nagatan-aw pud ko dinha ug nakita ang mga tawo nga naghimalasyon na, bag-ohay pa lang, tungod sa kanser. Hinay-hinay sila nga gipasulod dinhi, nga mga naka-wheelchair, mga naka-kratsis; pero ania sila, nga normal na ug himsog na, niining buntaga. Kana'y sa tibuok kalibutan mismo. Dili pinaagi nako; kondili pinaagi Kaniya, sa atong Ginoo Nga nabanhaw gikan sa mga patay, og buhi gayud hangtud sa kahangturan. Hinaut nga ang atong Ginoo kanunay gayud nga pagadayegon ug pagahimayaon, mao'y akong kinasingkasing nga pag-ampo.

28 Mahimo ba nga iampo ninyo ako? [Nagaingon ang kongregasyon, "Amen."—Ed.] Kamong tanan mag-ampo mo alang kanako. Karon, ako—nagasalig gyud ako niana. Tungod nga pag nagasangyaw na ako didto, kita n'yo, dinhi sa kaugalingon natong lungsod, dili man gyud ingon nga dili-maayo dinhing dapita; pero pagmodangat na ka didto atua ka na sa natad sa panggubatan. Pagbansay man gud kini.

29 Nabalitaan nako, kagahapon, nga ang atong iglesia nagpalit og usa—usa ka bag-ong station wagon para sa ako, ug ako . . . para sa mga pagbiyahe. Ug halos guba na man gud kadtong akong usa ka sakyanan. Ug busa akong—gipatukar nako ang radyo ug naminaw sa balita. Ug bueno mibiyahe sila, kagabii, kon diin kami ni Joseph miadto para mag-ampo. Dayon kami, sa pagbiyahe gikan sa Green's Mill, sila . . . gipatukar ko ang radyo. Adunay usa ka balita, ug nagaingon sila, nga nagasunod, nagasunod kining *Monitor* sa usa ka batan-ong lalaki sa iyang pagbansay. Ug kung unsa nga atua didto ang maong batan-on nga ang iyang mga bulsa puno og balas ug tanan na, kon diin kinahanglan niyang iduko pag-ayo ang iyang ulo, tungod nga aktuwal mang nagarakrak ang machine gun ibabaw mismo sa iyang ulo samtang nagakamang siya latas sa mga alambre nga may mga tunok-tunok ug mga ingon-anang butang, nagaagi gayud sa malisud nga pagbansay.

Bueno, ingon niana pud ang ginabuhat nato dinhi.

30 Pero daku ra kaayo ang kalainan pag anaa na ka mismo sa natad sa panggubatan. Kita n'yo? Kanang machine gun ginaorasan man kana, og nakapunting mismo sa usa ka lebel. Apan, pag anaa na mismo sa natad sa panggubatan, mahimo kining mopataas o mopaubos. Kita n'yo? Busa—busa medyo lahi na gyud didto, nakita n'yo, kaysa kung unsa—kaysa kung unsa kini dinhi. Busa anaa kanato ang . . .

31 Bueno, pagbansay man kini, dinhi. Pero didto anaa ka na mismo sa natad sa panggubatan, mao nga maatubang gyud nato ang kaaway. Ngani atong ginapakig-awayan kaniadto . . . ginaawit dinhi ang usa ka hamubong awit, *Padayon Ang Pakiggubat*. Aduna ba sa inyo ang nakahinumdom pa sa maong awit?

Padayon ang pakiggubat, Oh mga
Cristohanong sundalo,
Ug moatubang nga nakahan-ay na sa
pagpakiggubat,
Nagagilak-gilak ang mga hinagiban, ug
nagakayab-kayab ang mga bandera,
Ang husto ug sayup nagkagubat na karon.

Husto kana. Kita n'yo?

Padayon ang pakiggubat, apan ayaw
pagkaluya,
Magmalig-on ka ug manggunit sa Iyang kusog;
Kung ang Dios dapig kanato, ang Iyang
bandera anaa sa ibabaw nato,
Sa katapusan pagaawiton ra unya nato ang
alawiton nga iya sa mananaug.

³² Husto kana. Bueno, daghang mga butang unta ang angay kong isulti, karong buntaga, pero medyo pamub-an ko lang kini, tungod nanagtindog baya ang atong mga kaigsoonan ug nagkapunsisok sa sulod. Ug aduna sila'y gagmay'ng mga ispeker para sa gawas, ug gamay'ng pagsibya sa radyo, sa hunahuna ko, aron ang matag sakyanan mahimo rang. . . Ang pagsibya sa radyo nagahimo kini nga makapaminaw kita sa gilay-on nga pipila ka yarda gikan sa tabernakulo, pinaagi niini. Ug mao nga, kami, ginapasalamatang gyud namo ang pagduaw sa tanan dinhi kanamo karong buntaga.

³³ Karon, sa dili pa kita magpadayon, isulti úna nato nga. . . Karon, sa gilayon human niini, sa hunahuna ko, mao ang buluhaton sa pagbautismo. Una, mao ang linya para sa pagpaampo. Magaampo kita para sa mga may sakit, karong buntaga. Nahunahuna ko, ang Dios nga nagaabot sa eksena usa mismo ka kapanghimatuoran sa kung unsay atong ginapamahayag, ang Iyang pagkabanhaw. Kon buhi ba Siya, o dili ba Siya buhi? Usa lang ba *Kini* ka hinimo-himo lang nga sugilanon, o Kamatuoran ba Kini? Pero ingon nga buhi Siya, nagsaad mismo Siya, "Ako magauban kaninyo, bisan hangtud sa katapusan sa kalibutan." Karon, kung Siya—kung moanhi Siya dinhi sa taliwala nato ug magapamatuod nga ania Siya, kung ingon-ana wala na gyu'y pagpanaghap pa mahitungod niini. Kita n'yo?

³⁴ Timan-i ninyo, ang tanang mga relihiyon sa kalibutan, aduna sila og balaan nga mga adlaw ug mga adlaw nga fiesta, ug uban pa. Pero wala gyud ni usa kanila ang makapamatuod nga ang ilang tigtukod. . . Nga, gikuha siya sa kamatayon, ug hangtud na lang dinha. Apan, ang sa ato, ang Cristiohanon nga relihiyon, ang atong Tigtukod namatay ug nabanhaw.

³⁵ Sa Mexico, bag-ohay pa lang, niadtong nagpakighinabi kanako ang tigbalita, mahitungod sa pagkabanhaw sa usa ka

gamay'ng bata nga namatay sa alas nuebe pa niadtong buntaga. Ug sa alas diyes-traynta niadtong gabhiona, alas diyes-traynta o alas onse, nabanhaw kadto gikan sa mga patay, didto mismo sa mga bukton sa inahan didto sa entablado, sa atubangan mismo sa napulo ka linibo nga mga tawo. Traynta ka libo ang miduol kang Cristo niadtong gabhiona mismo. Kita n'yo? Busa, kung ingon-ana, mahunahuna gyud ninyo kung unsa ang atua didto.

³⁶ Ug bahin niadtong gamay'ng bata, nakakita ako og usa ka panan-awon sa atubangan ko; ug gisulti niini kung unsa ang ngalan sa gamay'ng bata, ug tanan na. Ug ang inahan atua ra didto dapit sa luyo, nga dili makakuha og prayer kard, dili makasulod. Hinoon dili na man niya kinahanglan nga moduol, sa linya. Ug niadtong gidala niya ang gamay'ng bata; nagaulan niadto, og kusog.

³⁷ Unya ginahunahuna nato nga nagatindog kita; pero hunahunaa n'yo sila. Atua na sila didto sa alas nuebe sa buntag, para sa mga panerbisyo nga pagasugdan sa alas nuebe pa niadtong gabhiona. Nanagtindog ra sila ilalum sa mainit nga adlaw, nanagsandiganay sa usa'g usa, para malandongan. Nanagtindog ra, wala nagalingkod; nanagtindog mismo. Ug ingon niana ang ginabuhat nila, didto sa Africa ug sa nagkalainlain pang mga lugar, sa India, kon diin tunga sa milyon ang nagakatigum didto, sa usa ra ka higayon.

³⁸ Bueno, kining luoy'ng babaye wala gayud nakakuha og prayer kard. Didto, aduna ma'y mga tulo ka gatus nga mga usher, nga nagpugong kaniya, tungod dili man siya puede moapil sa linya sa pagpaampo. Ug atua ako nga nagaampo para sa gamay'ng bata; ang usa ka luoy'ng, babaye nga Katoliko. Ug nagsulti ang Balaang Espiritu ug miingon, "Sultihi siya nga dalhon kana dinhi."

³⁹ Ug kadtong gamay'ng masuso, nga nakaputos sa basa nga habol, atua na didto sukad pa niadtong buntaga, og gideklara na kadto sa doktor nga patay na. Ngani, anaa kanamo ang pahayag sa doktor mahitungod niadto, nga gideklara kadto nga patay na, niadtong alas nuebe sa buntag. Ug dayon nahitabo kini niadtong gabhiona, hapit nang magtungang-gabii. Ug ako, sumala lamang, sa kung unsay gisulti sa panan-awon, miduol ako, og gipandongan nako sa mga kamot ang gamay'ng masuso. Ug atua kini, nga buhi na. Nagpamatuod pud ang doktor.

⁴⁰ Nagpakighinabi kanako ang tigbalita. Ug bueno, ingon nga wala ko'y unsa man nga batok sa pagtulon-an ni bisan kinsa man, basta sumala lang kini sa Biblia, okey lang. Pero kadtong lalaki nga nagpakighinabi kanako usa ka Katoliko, ug miingon siya sa ako, "Nagatoo ka ba nga mahimo kadto sa among mga santo?"

⁴¹ Miingon ko, "Kung buhi sila." Siyempre, nasayod man ko nga nagatoo ang iglesiang Katoliko nga kinahanglan patay ka

na, para mahimong usa ka santo. Busa miingon ko, “Kung buhi sila, oo.”

Ug ingon niya, “Oh, dili man ka mahimong santo gawas kon patay ka na.”

⁴² Miingon ko, “Si Pablo ba usa ka santo sa wala pa siya namatay o human siya mamatay? Kinsa ma’y iyang gisulatan, ang patay ba nga mga tawo, kaniadtong ang ingon niya, ‘Alang sa mga balaan nga anaa sa Efeso,’ ug sa mga balaan nga anaa sa *usa* ka lugar? Dili man siya mosulat ngadto sa patay na nga mga tawo, kabalo ka.”

⁴³ Busa niadtong tungora ang ingon niya, “Karon ginapaningkamotan mong ipangatarungan ang imong punto pinaagi sa Biblia. Kami ang iglesia.”

Miingon ko, “Sige, sir. Okey.”

Ug ang ingon niya, “Kami mao ang iglesia.”

⁴⁴ Miingon ko, “Kung ingon-ana tan-awon nato nga buhaton kana sa iglesia.” Kita n’yo? Bueno, mao nga, si Cristo lamang ang makabuhat niadto. Nasayod kamo niana.

Ingon niya, “Unsa ma’y imong ikasulti sa iglesiang Katoliko?”

Miingon ko, “Unta wala na lang nimo gipangutana kana sa ako.” Kita n’yo?

Ingon niya, “Bueno, gusto kong madungog kana.”

Ug miingon ko, “Ang pinakahataas nga matang sa espiritismo.”

Ug ang ingon niya, “Espiritismo?”

Miingon ko, “Oo, sir.”

Ang ingon, “Nganong nakasulti man ka niana?”

⁴⁵ Miingon ko, “Ang unsa man nga nagapangaliya sa mga patay na; ang panag-ambit sa mga santos, kita mo.”

Ug ang ingon niya, “Bueno, nagaampo man lagi ka kang Cristo, ug namatay na man Siya.”

Miingon ko, “Pero, nabanhaw man Siya, kita mo.”

⁴⁶ Busa, mao kana ang maayong butang nga nahibaloan nato, nabanhaw Siya. Dili ba kita mapasalamaton?

⁴⁷ Iduko nato ang atong mga ulo ug pasalamaton Siya tungod kay nabanhaw gyud Siya gikan sa mga patay alang sa pagpamatarung kanato.

⁴⁸ Langitnong Amahan, mapasalamaton kami niining buntaga tungod kang Jesus; ug karon, ingon nga pagdumdum sa Iyang mahimayaong pagkabanhaw, niadtong buntag sa pasko sa dihang nabanhaw Siya gikan sa mga patay, gibuntog ang kamatayon, ang impiyerno, ug ang lubnganan. Kaniadtong

ania pa Siya sa yuta, gipakita Niya nga Iyang gibuntog ang sakit, ang mga balatian, ug—ug tanang matang sa mga yawa ug mga gahum. Dayon gipahimutang sa Iyang atubangan ang kamatayon, ang daku ug ang kaulahiang kaaway. Ug niadtong buntag sa Pasko sa Pagkabanhaw gipamatud-an Niya nga Siya’y Dios gayud. Nabanhaw Siya gikan sa kaulahiang kaaway, nga dili gayud makapugong Kaniya. Gibuhian Siya sa lubnganan; kinahanglan Siyang buhian sa impiyerno; og gidawat Siya sa Langit.

⁴⁹ Oh Dios, hinaut nga dawaton Siya sa among mga kasingkasing karon, diha sa gahum sa Balaang Espiritu, aron mahimo kami nga Iyang mga tigdumala, Iyang—Iyang mga ehemplo, nga mga alagad Niya dinhi sa yuta, samtang kami temporaryo nga nagapuyo dinhi. Itugot kini.

⁵⁰ Panalangini ang tanan nga ania karon. Dios, kining minahal nga mga tawo nga nanagtindog, ang uban kanila nagkapunsisok na dinhi sa sulod nga sukad pa sa pagbanagbanag sa adlaw. Ginaampo ko, Langitnong Amahan, nga Imong igabubo ang “labing madagayaon gayud nga labaw pa sa tanan nga among mabuhat o mahunahuna,” diha kanila karon, ug ihatag kanila ang kinasuloran nga mga tinguha sa ilang kasingkasing. Kung para sa unsa man nga mianhi ang matag usa, karong buntaga, hinaut nga managpanguli sila, nga nangalipay. Nag-ingon man Ka nga dili Mo balibaran ang si kinsa man, kondili pagapun-on Mo siya og mga maayong butang, ug papaulion siya nga nagakalipay. Itugot kini, Ginoo.

⁵¹ Hinaut nga ang Imong walay kinutobang gahum, hinaut nga ang Imong Balaang Espiritu, diha sa gahum sa pagkabanhaw, makighilambigit gayud sa matag usa kanamo hangtud nga ang among mga paglaum matukod dili sa kung asa pa man kondili sa Dugo ni Jesus nga may pagkamatarung. Itugot kini, Amahan.

Palangani pud ang mga Pulong nga among pagabasahon karon.

⁵² Ginapasalamatan Ka namo tungod sa maanindot kaayo nga mensahe kaganinang buntag, sa among pag-anhi og sayo dinhi sa simbahan. Ug ang masaksihan Ka nga gigamit ang among igsoon, ug daw sa unsa ang pagkausab niya sa pipila ka gutlo, ug gihatud ang usa ka mensahe para niining himalasyon na nga henerasyon sa tawo diin kami kabahin pa karon, ginapasalamatan Ka gayud namo tungod niadto, Ginoo! Oh Dios, nagalukso-lukso gyud sa kalipay ang among mga kasingkasing samtang ginahunahuna namo kadtong mga butanga. Karon, ipapabilin siya nga dinihogan, Ginoo, sa tanang mga adlaw niyang umalabot, Ginoo.

⁵³ Ug panalangini kining gamay’ng iglesia. Ug tabangi ako, Ginoo, sa akong pag-adto aron ihatud ang Mensahe ngadto sa uban pa nga mga tawo. Ug hinaut nga magkauban, kami,

ingon nga usa ra ka tawo, usa ka pamilya, nga magpabilin nga magkauban, ug dungan nga magaampo, ug magkauban nga magkinabuhi sa balaan nga pagkahiniusa nga iya sa Balaang Espiritu hangtud nga dawaton kami ni Jesus ngadto sa Gingharian. Kay amo kining ginapangamuyo sa Iyang Ngalan ug alang sa Iyang kahimayaan. Amen.

⁵⁴ [Nagaingon si Igsoong Neville, “Igsoong Branham, puede ba nako ka madisturbo?”—Ed.]

Oo, igsoon.

[“Ingon nga usa ka timaan sa among pagpasalamat ug pinaagi sa—sa buhat sa usa ka batan-ong lalaki nga ania sa atong taliwala, ginapresentar namo kini nga hulagway diha kanimo, Igsoong Branham, nga may bug-os nga pagpahayag sa among paghigugma ug pagpasalamat.”]

Salamat, Igsoong Neville, ug sa tabernakulo.

[“Ang batan-ong lalaki mao si Jerry Steffy, nga nagpinta niana nga hulagway.”]

⁵⁵ Si Igsoong Jerry Steffy ang nagpinta niana nga hulagway. Panalanginan sa Dios kana nga batan-ong lalaki. Pagkanindot niana, Jerry, kung ania ka man karong buntaga. Subo lang gyud, aduna lang unta ko’y kaarang aron mapaeskwela ang batan-ong lalaki para mahimong usa ka pintor. Nagatoo ako nga ang Dios anaa sa art. Dili ba nagatoo pud kamo niana? Ang Dios anaa sa musika. Ang Dios anaa sa art. Ang Dios anaa niini. Ug subo lang kaayo nga makita ang usa ka talento, nga sama niana, nga dili mapalambo. Sa diha nga mas mabansay siya, mas molambo pa unta siya. Ug ako—ginaampo ko nga panalanginan ka sa Dios, Jerry.

⁵⁶ Ug salamat, Igsoong Neville, ug sa niining iglesia, para niining maanindot nga hulagway ug sa pamalak nga nakalakip niini. Basahon ko kini pagkataudtaud. [Nagaingon si Igsoong Neville, “Gusto mo ba nga basahon ko kini?”—Ed.] Sige, sir. Basahon ni Igsoong Neville ang maong balak. Mora’g aduna na ko’y ideya sa kung unsa kini. . . [Ginabasa ni Igsoong Neville ang *Pagpasidungog Ngadto Kaniya Nga Takus Pasidunggan*.]

[Dili siya usa ka taas nga tawo, ni mapahitas-on sa iyang paglakaw,]

[Wala niya gina-trumpeta ang iyang kaugalingon samtang siya nagakinabuhi sa adlaw adlaw.]

[Walay pagtinguha sa bahandi ni sa kabantog man, mao nga wala gyu’y makapuli kaniya;]

[Siya’y kung unsa lang gayud ang gusto namo kaniya, ang minahal namong Igsoong Bill.]

[May pagkamatinud-anon niyang ginatudlo kanamo ang walay-sambog nga Pulong,]

- [Walay magarbo nga mga pamaagi, dili gusto og pasidungog, nagasunod lamang sa Ginoo.]
 [Ang iyang pagpanulti mahinay ug maaghop, dili niya ginapalanog ang iyang tingog,]
 [Gawas sa pagsinggit batok sa sayup, ug kung ingon-ana wala na siya’y mapili.]
 [Walay daghang naeskuwelahan gikan sa mga kolehiyo ug tulonghaan,]
 [Apan nasayod siya mismo kung unsa ang mahinungdanon ug dili siya malimbongan ni kinsa man.]
 [Kay ang kahibalo nga gikahatag kaniya Eternal man gikan sa Kahitas-an,]
 [Wala siya’y kredo, gawas sa atong Cristo, walay balaod kondili Gamhanan nga Gugma.]
 [Walay dakung pagmantala sa iyang kabus, ubos nga pagkahimugso,]
 [Apan para kanamo siya mao ang pinakahalangdong tawo nga nagapuyo ibabaw sa yuta.]
 [Ngani ginaisip namo kini nga labaw pa sa pribilihiyo ang maila siya ingon nga higala,]
 [Daku kaayong bili para kanamo ang tanan nga iyang ginabarugan, ug buhaton namo kini hangtud sa katapusan.]
 [Ginaingon niya dili siya usa ka magwawali, siya’y ingon gayud ka mapainubsanon,]
 [Apan patindoga siya sa pulpito ug dili gyud lisud nga makita,]
 [Siya’y gitagana-nang-daan nga usa ka propeta, tawgon man siya sa mga tawo kung unsa man ang gusto nila,]
 [Gihatagan gyud kami sa Dios og dakung pabor sa dihang gihatag Niya kanamo si Igsoong Bill.]

[“Mipirma, ‘Ang diyutay’ng panon.”]

⁵⁷ Salamat, Igsoong Neville. Salamat sa inyong pagmahal. Kinsa ma’y nagsulat niana? [Nagaingon si Igsoong Neville, “Sa hunahuna ko ang iyang inahan mismo.”—Ed.] Kana’y . . .

⁵⁸ Dili ako takus nianang mga butanga, sa mga gisulti n’yo, pero kana’y labi pa kamahinungdanon para sa ako kaysa tanang salapi sa kalibutan. Kita n’yo? Ang hunahunaon nga, adunay nagaila kanimo ingon nga Iyang alagad, kita n’yo, ingon nga—ingon nga alagad sa Dios. Hinaut nga magkinabuhi gyud ako nga matinud-anon niana, mao’y akong pag-ampo. Panalanginan kamo kanunay sa Dios. Kanunay gayud ang akong pagmahal kaninyo. Ug ginapahayag ko gayud nga gihigugma ko kamo,

usab.

⁵⁹ Karon, oh, aduna kita'y daghan kaayong mga butang, nga mahimo gani kitang mogahin og tibuok adlaw, pero dili pa gihapon kita makadangat sa Pulong, nakita n'yo, tungod sa daghan kaayong maayo nga mga butang.

⁶⁰ Aduna ko'y usa—usa ka panan-awon gikan sa Ginoo nga igasulti ko, ug—ug adunay nagdamgo, nga, oh, sa hunahuna ko mahinungdanon gayud, mahitungod sa Pag-abot sa Ginoo. Ug ako . . .

⁶¹ Ang batang si Rebekah, ang akong bata nga babaye nga anaa dinha sa luyo. Ako . . . Bisan og medyo gikataw-an ko siya kaganina. Migawas man gud siya, nga nagsul-ob niadtong usa sa dagkung matang sa—sa mga kalo. Ug miingon ko, “Bueno, pinangga, mora man kana og pugaran sa langgam,” miingon ko, “nalukop kana og mora'g mga dagami, ug tanan nang, sama niana.” Miingon ko, “Sige, tangtanga kana.”

⁶² Dayon, pagkahuman mibalik siya kanako. Sa pipila lang ka minuto mibalik siya; kabalo mo, sa kung unsang paagi niya ako gibalikan, mibalik gyud siya. Misulod siya nga adunay usa ka dakung pitaka, nga bitbit niya. Miingon ko, “Asa man kanang butanga gikan?”

⁶³ Ingon siya, “Daddy,” og ingon siya, “Aduna man ko'y dagkung mga tiil, busa sa hunahuna ko ang dakung pitaka na lang ang akong dalhon aron mobagay niini.” Bueno, oh, ang mga ingon niini!

⁶⁴ Pero ingon siya nga nagdamgo kono siya sa makaduhang higayon nga nagsakay kono kami sa sakyanan, ug nagasulti kono ko sa iyaha mahitungod sa haduol na nga pagpakita sa Ginoo; mao gihapon nga damgo, sa ikadugang higayon. Mao nga nagahulat ako sa ikatulo; tingali'g ihatag na kanako sa Ginoo, nianang higayona, kung unsa ang kahulogan niadto.

⁶⁵ Bueno, daghan pa kaayong mga butang nga igasulti ko, pero moadto na kita karon sa Pulong.

⁶⁶ Nagalaum ko, nga maayo gyud ang gibati sa tanan. Ug kung dili man, ginaampo ko nga himoon sa Dios nga mamaayo ang inyong gibati sa dili pa mahuman kining panerbisyo, nga wala na'y usa ka tawong maluyahon sa atong taliwala karong buntaga, pag mahuman na kining panerbisyo.

⁶⁷ Bueno, kinahanglan natong hinumduman nga namatay si Cristo alang sa mga dili-diosnon, ug kita kana. Kita n'yo? Kita man kana. Ug namatay Siya alang kanato, aron nga maluwas Niya kita.

⁶⁸ Karon, madungog ba ninyo og maayo, sa tibuok palibot? Dinha sa may pinakaluyo, madungog ba ninyo og maayo dinha sa luyo? Madungog ba gyud dinha sa luyo? Maayo. Sige.

⁶⁹ Karon gusto kong mobasa og pipila gikan sa Iyang Pulong. Una, moabli kita karon sa Basahon ni Joel, ug gusto kong basahon ang unang bersekulo, sa una hangtud sa ika-4 nga bersekulo. Ug dayon ang ika-2, hangtud sa . . . ika-2 nga kapitulo ug sa ika-25 nga bersekulo. Ug Genesis 20:7. Karon, gikalipay gayud nako . . .

⁷⁰ Bueno, kung gikapoy na kamo ug gusto n'yo nga mogawas, sige lang. Kita n'yo? Pero, basin mao na kini ang ulahi kong Mensahe para sa Iglesia, para sa, niini nga bahin sa Iglesia, sa mubo nga panahon. Ug nagalaum kita og usa ka panerbisyo sa pagpang-ayo karong buntaga. Ug ako—gitinguha ko nga kini nga Mensahe, kung panalanginan Kini sa Dios, nga—nga motuhop gyud unta nga kinasuloran nganhi sa atong mga kasingkasing, aron masabtan nato kung unsa ang buot ipasabot Niini.

⁷¹ Karon, ania kita aron ipahayag, aron—aron isulti ang mga butang nga ginatoohan nato, ug pamatud-an kini pinaagi sa Kasulatan, nga mao kini ang ginaingon sa Kasulatan; ug dayon hinaut nga mamuhat ang Dios ug pamatud-an kini, nga tinuod gyud kini, husto, og himoon kini nga realidad. Sama lang sa unsa mang . . .

⁷² Moingon mo, “Usa *kini* ka liso sa sunflower.” Itanum n'yo kini ug tan-awa kung unsa gyud kini. Dayon, kon motubo kini nga usa ka sunflower, nan mao na kana. Usa gyud ka sunflower. Kita n'yo? Ingon-ana lang.

⁷³ Karon, ug mahimo man nga ang uban kanila magpulihanay ra úsa og lingkoranan, matag karon ug unya; adunay molingkod, og motindog na pud ang uban ug maghulat sa makadiyut. Ug dalion ko lang gayud kutob sa akong mahimo.

⁷⁴ Karon, timan-i n'yo, nga iampo gyud ako. Ug magmaunongon gayud sa iglesia karon; pabilin mismo dinhi sa iglesia, kang Igsoong Neville. Ug kamo nga mga nagabisita, bueno, karon, balik-balik lang mo.

⁷⁵ Ug karon anaa ako sa niini nga mga panagtigum, ginapahigayon ang mga niini nga walay unsa man nga pihong pagtawag. Tungod nga, dili gyud nako mahimong magrelak-relaks lang; himalatyon na ang kalibutan. Kita n'yo? Ug ngani nagkaaduna pud si Pablo og ingon-ana nga kasinatian kaniadto. Ug nagapaingon siya niadto sa ubang nasud, ug dayon adunay pagtawag kaniya ngadto sa Macedonia, samtang atua na siya dalan. Karon, mahimo gihapon nga maghatag ang Dios og usa ka pagtawag nga pa-Macedonia, unsa mang orasa. Kanselahon ko ang bisan unsa, pag maghatag ang Dios og usa ka pagtawag.

⁷⁶ Ginabuhat ko lang ang kutob sa akong mahimo, nagaadto sa *niini* nga kanto, nagapugas og mga binhi; ug *dinhi* dapit, nga nagapugas og pipila ka mga binhi; ug *dinhi* pud dapit, nagasabwag, nagapugas og pipila ka mga binhi. Kabalo ako, nga pagatukaon sa mga langgam sa kalangitan ang daghan sa mga

niini; ug ang uban pud sa mga niini mangalumos, ug uban pa. Pero mahimo usab nga adunay pipila, dinha, nga motubo, gayud, kabalo mo, diha sa maayong yuta. Busa ipugas lang nato ang binhi, mao kana ang pinakamahinungdanong butang.

⁷⁷ Usa ka talagsaon kaayo nga pagbasa, para sa usa—usa ka mensahe sa Pasko sa Pagkabanhaw, ang Joel, sa unang kapitulo.

Ang pulong sa GINOO nga midangat kang Joel ang anak nga lalaki ni Pethuel.

Pamatii kini, kamong mga tigulang nga tawo, ug patalinghugi, . . . kamong mga pumoluyo sa yuta. Nahitabo ba kini sa inyong mga adlaw, kon sa mga adlaw sa inyong mga amahan?

Suginli . . . ang inyong mga anak mahitungod niini, ug ipasugilon sa inyong mga anak ngadto sa ilang mga anak, ug sa ilang mga anak ngadto sa laing kaliwatan.

Kadtong gibiyaan sa ulod nga dangaw-dangaw gikaon sa dulon; ug kadtong gibiyaan sa dulon gikaon sa lukton; ug kadtong gibiyaan sa lukton gikaon sa ulod nga hantatawo;

⁷⁸ Karon sa ika-25 nga bersekulo sa ika-2 nga kapitulo.

Ug akong pahaulian alang kaninyo ang mga tuig nga gikaon sa dulon, sa lukton, ug sa ulod nga hantatawo, ug sa ulod nga dangaw-dangaw, ang akong . . . ug sa ulod nga dangaw-dangaw, ang akong daku nga panon sa mga sundalo nga akong gipadala sa inyong taliwala.

Ug kamo mangaon sa kadagaya, ug mangatagbaw, ug managdayeg kamo sa ngalan sa GINOO nga inyong Dios, nga nanalangin sa dakung kahibulongan kaninyo: ug ang akong katawhan dili na gayud pagapakaulawan.

⁷⁹ Sa Genesis, sa 20, sa Genesis. Sa ika-20 nga kapitulo sa Genesis, ug sa ika-7 nga bersekulo. Gusto kong basahon kini, aron sundan ang . . . ingon nga konteksto para sa niini nga teksto nga akong—akong pagahisgotan. Magsugod ko sa ika-6 nga bersekulo, aron aduna kita'y basihananan para niini.

Ug miingon kaniya ang Dios pinaagi sa damgo, Oo, ako usab nahibalo nga sa pagkahingpit sa imong kasingkasing gibuhat mo kini; og ako—og ako usab naghawid kanimo sa pagpakasala batok kanako: og niini ikaw wala ko tugoti nga magtandog kaniya.

Busa karon iuli ang babaye sa iyang bana; kay manalagna siya, ug siya magaampo alang kanimo, ug nga mabuhi ikaw: ug kung dili mo iuli siya, nasayod . . . nga sa pagkamatuod mamatay ka, ikaw, ug uban ang tanang mga imo.

⁸⁰ Karon, mokuha ako gikan niini og usa ka teksto, o gikan niini nga pagbasa sa Kasulatan, og usa ka konklusyon sa teksto, nga pagaulohan, “ipahiuli.”

⁸¹ Bueno, human nga giwali ni Igsoong Neville niining buntaga, kadtong halangdon nga mensahe, ang ulahing butang nga gisulti niya bahin sa iyang ulahing panghunahuna, mao, “Ang mapahiuli.” Ug busa naghatag kadto kanako og ideya, sa gilayon, ang “ipahiuli.”

⁸² Mao nga, dalidali ko nga miuli ug gikuha ang akong diksyunaryo, ug uban pa, ug pipila ka sinulat nga mga Kasulatan, ug hinayhinay nga gikopya ang pipila ka butang. Ug pagkahuman akong gikuha ang Webster nga diksyunaryo, aron hibaloon ang husto nga kahulogan sa *ipahiuli*. Ang *ipahiuli*, nagakahulogan og, “iuli ngadto sa kanhing tag-iya, o ipabalik sa kanhing kahimtang.” Ug mahimo natong ipatuman ang usa ka katungod, ang mapahiuli.

⁸³ Bueno, mao kana ang ginaingon sa Webster nga buot ipasabot sa pulong nga *ipahiuli*, “Ipabalik ngadto sa kanhing tag-iya, o ipabalik sa kanhing kahimtang.” Ug kung gihimo na ang pag-angkon og katungod mahitungod sa usa ka butang, aron ipahigayon ang pagpahiuli, mahimo na nimong ipatuman, nga mapahibalik kini sa husto nga kahimtang niini.

Ug hinaut nga panalanginan sa Dios kining mahuyang nga mga pulong karon.

⁸⁴ Ang *ipahiuli*, nagakahulogan og, “ipabalik.” O, ang ipahiuli, mahimong ipatuman ang usa—usa ka katungod, bueno, aron ibalik ang unsa mang butang ngadto sa tinuod nga tag-iya niini, kung kang kinsa kini nahiangay. Busa, sa kung unsa mang hinungdan, napahilayo kini gikan sa tinuod nga tag-iya niini, ug mahimong nawala sa kon asa man. Mao nga, ang ipahiuli, mao ang ipabalik kini sa kang kinsa nga nanag-iya gayud niini, o ang ipabalik kini sa natural nga kahimtang niini kung asa kini napahimutang sa sinugdan, ipabalik kini sa natural nga kahimtang niini. Ug aron nga mabuhat kini, aduna kita’y katungod nga ipatuman, kung aduna ma’y usa ka balaod, nga ipatuman kining husto nga kondisyon sa pagpahiuli, ang ipahiuli.

⁸⁵ Sama ra kung adunay tawo nga nangawat og kung unsa nga kabtangan, ug ginaangkon nila ang maong kabtangan. Kung ingon-ana mahimo ninyong gamiton ang balaod ug adtoan kining tawhana, ug ipatuman ang balaod, pugson kining tawhana nga iuli kini nga kabtangan ngadto sa natural nga tag-iya niini, sa pinakauna og may legal nga katungod niini nga kabtangan.

⁸⁶ Pagpatuman! Oh, pagkaanindot nga teksto! Gusto ko gayud nga mogahin og duha ka adlaw para niini, ipatuman!

⁸⁷ Bueno, nagwali na man si Igsoong Neville para kanato. Mamulong na lang ako kaninyo, magtudlo og usa ka leksyon pang-Sunday school aron kini'y—mahimo ra kini nga usa ka pagpadayon, nagalaum ako, sa kung unsa ang nahisgotan na niya.

⁸⁸ Ipatuman! Busa, kita mao ang . . . adunay pribilihiyo nga ipatuman, batok kang Satanas, ang mga panag-iya nga gihatag sa Dios kanato. Kay, aduna ma'y balaod ang Dios, ug ang Iyang Pulong usa man ka balaod, ug ang Dios dinhi niining Pulong naghatag og mga panag-iya para sa Iglesia. Busa, aduna gyud kita'y katungod nga ipatuman kini nga mga panag-iya kang Satanas, ug moingon, "Ibalik kini," ug kinahanglan buhaton gayud niya kana. Tungod kay, mahimo natong toohan ang Representante sa Dios, ang Balaang Espiritu, moluhod kita mismo, ug moingon, "Kini'y MAO KINI ANG GINAINGON SA GINOO." Siguradong ibalik gyud niya kini, kana lang, kay anaa man ang Balaang Espiritu aron pugson siya nga tumanon kana.

Ang balaod sa kayutaan mao ang pagpatuman. Iya kini sa kayutaan, og para sa kayutaan.

⁸⁹ Apan ang balaod sa Espiritu sa Dios mao'y aron pugson si Satanas nga isurender kadtong iyang giilog gikan sa Dios sa sayup nga paagi, sa pagpanglimbong nga paagi. Mga kalag sa mga kalalakin-an, nga iyang giilog gikan sa Dios; mga kalag sa mga kababayen-an, sa mga bata. Balatian sa lawas, nga gipahamtang niya sa mga tawo. Nga unta, gibuhat man sila sa Dios diha sa Iyang dagway, aron mamahimong sama Kaniya, ug gihatagan ang Iglesia og hustong legal nga mga katungod, pinaagi sa Biblia, aron toohan ang Balaang Espiritu ug ipatuman kini kang Satanas.

⁹⁰ Sa hunahuna ko bag-ohay ko lang kining gisulti, niadtong ulahing panagtigum dinhi. Dili ko sigurado. Pero may usa ka igsoong lalaki nga miadto sa Louisville, nga gikan pa sa Georgia, ug gibilin niya ang iyang sakyanan nga nakaparada didto dapit, ug adunay nagkawat niadto. Ug atua pa gyud ang iyang mga sinina, mga sinina sa iyang asawa, og mga sinina sa iyang mga anak. Si Igsoong Evans kadto nga ania karon. Nagaanhi sila dinhi kasagaran. Nagabiyahe gyud sila og kinse ka gatus ka milya, matag adlaw, pag aduna kita'y panerbisyo dinhi, nagaanhi aron lang nga makatambong sa panerbisyo. Ug ania niadto ang luoy'ng lalaki nga walay bisan unsa, ug pito ka gatus kapin ka milya ang kalay-on gikan sa panimalay. Ug wala siya kabalo kung unsay buhaton.

⁹¹ Gisumbong niya kadto sa pulis. Pero aduna man gud og dakung krimen nga ginabuhat didto sa Louisville; nagapangawat sila og mga sakyanan, ug ginapintalan kadto pag-usab. Ug mahimo na nimong . . . dili na nila kinahanglan og titulo, didto, para mabaligya kana. Tungod puede ka nilang

himoan og titulo, sulod ra sa pipila ka minuto, bisan og unsa man nga numero sa plaka nga gusto nimong ipabutang niadto. Ug mao nga naglisud gyud sila kaniadto.

⁹² Busa miluhod kami. Kita n'yo? Bueno, dili kadto kinahanglan buhaton ni Jesus, tungod kay Siya mao ang Pulong. Pero, dili man kita ang Pulong. “Ang Pulong sa Ginoo miabot sa mga propeta.” Dili sila ang Pulong, hinoon nagaabot kanila ang Pulong. Pero ang Pulong mao si Jesus. Kita n'yo? Dili Niya kinahanglan nga mag-ampo. Siya’y Dios, Mismo. Kita n'yo? Pero kita ang mga—mga propeta Niya, Iyang mga alagad, nga ginaabtan sa Pulong sa Ginoo. Busa, ginapanghimatud-an ang propeta, kung kini ba mao ang Pulong sa Ginoo o dili, pinaagi sa katumanan sa kung unsay iyang ginasulti.

⁹³ Mao nga aduna kita’y Kasulatan dinhi, nga miingon si Jesus, “Diin gani ang duha o tulo nga magakatigum sa Akong Ngalan, ug kung sila magakauyon, maanaa Ako sa ilang taliwala. Ug kung sila magakauyon mahitungod sa usa ka butang ug pangayoon kini, nga dili kini pagaduhaduhaan, nan maangkon nila kanang unsay ilang gipangayo. Igahatag kini kanila.”

⁹⁴ Karon, mao—mao kana ang balaod. Karon, ang Usa nga ania dinhi para ipatuman kana nga balaod mao ang Balaang Espiritu. Unsaon na man ang mga tawo nga wala nagatoo sa Balaang Espiritu, nga mosalikway Kaniya? Kita n'yo? Gina- . . . Ginasalikway ninyo ang mismong pakigdait ug kalooy para kaninyo. Kita n'yo?

⁹⁵ Bueno, nangluhod kami, mga lima kami ka kalalakin-an, kauban si Igsoong Fred Sothmann ug—ug daghang uban pa nga atua didto, upat o lima ka kalalakin-an. Ug miluhod kami, ug gipangaliyupo ko kini nga kaso sa atubangan sa Dios. Ug dayon gitoohan ko ang Pulong, o ang saad, ug gipadala Kini. Ang gamhanang Balaang Espiritu, sa dihang gidala Niya ang Pulong, aron ihatud ang maong pagpatawag, adunay panan-awon nga miabot ug nakita ko ang usa ka lalaki nga nagapadulong sa Bowling Green, Kentucky, nga nagasul-ob og dalag nga sinina, nagadrayb sa iyang trak. Nagpabati kaniya ang Balaang Espiritu, gikondena siya, ug mibalik siya, mga tunga-tunga na sa dalan. Nakita ko siya nga mibalik ug giparada kadtong sakyanan sa usa ka kalsada, tabok sa suba didto. Mitindog ako ug gisultihan ang mga kaigsoonan, “MAO KINI ANG GINAINGON SA GINOO.”

⁹⁶ Ug sa dihang nangadto na sila, giadtoan nila ang maong kalsada. Ug atua mismo ang sakyanan nga nakaparada didto, nga katunga na lang ang nahibilin nga gasolina, atua didto nga katunga na lang ang—ang sulod sa tangke, nga puno man unta kadto, hinoon igo ra gayud, nga madala kadto sa tunga-tunga paingon sa Bowling Green ug sa pagpabalik niadto. Ngani, kadto

nga mga kalalakin-an ania mismo dinhi karong buntaga, ingon nga mga saksi.

⁹⁷ Unsa man kadto? Pagpatuman. “Ibalik kini.” Kita n’yo? Mao kana. Mao kana ang ginapahinungdan niini. “Iuli kini. Ibalik kini ngadto sa tinuod nga tag-iya niini.”

⁹⁸ Ug kung gikawatan kamo ni Satanas og pribilihiyo ingon nga usa ka anak nga lalaki o usa ka anak nga babaye sa Dios, aduna gyud kita’y katungod karong buntaga, pinaagi sa Balaang Espiritu, nga ipatuman ang pahayag sa Dios. “Ibalik sila.”

⁹⁹ Kung gipaantus niya kamo, ug gihatagan kamo og sakit, aduna kita’y katungod sa atubangan sa Dios nga ipatuman ang mga balaod sa Dios. “Tungod sa Iyang mga labod kita nangaayo.” Amen. “Ibalik siya. Buhii siya. Ginadala mo siya didto, sa kamatayon, ug ginaangkon namo siya. Ibalik na siya karon.”

¹⁰⁰ Ingon niana ang pagpatuman; iuli kini pag-usab sa natural nga kahimtang niini. Ang usa ka lalaki nga may sakit; ang bata nga may sakit; ang babaye nga may sakit. Kita n’yo? Wala sila sa ilang natural nga kahimtang. Kung ingon-ana aduna kita’y katungod nga ipatuman ang panag-iya nato. Dili ingon nga *atong* panag-iya mismo. Panag-iya nato kini tungod kay gihatag kini sa Dios nganhi kanato. “Tungod sa Iyang mga labod kita nangaayo. Siya gisamaran tungod sa atong kalapasan. Tungod sa Iyang mga labod kita nangaayo.” Karon aduna kita’y katungod nga ipatuman kana nga balaod. Ug ang—ang Maghahatag-sa-Balaod, ang Balaang Espiritu, Mismo, ania karon, ang Representante sa Dios, aron siguradohon nga gipatuman kana sa ingon niana nga paagi. Amen.

¹⁰¹ Karon, ang bugtong paagi nga makapamuhat Siya, mao’y sa diha nga tugotan n’yo Siya nga mamuhat. Kita n’yo? Kinahanglan ninyong toohan kini. Aduna ma’y balaod. Oh, kung makadangat lang ako sa akong teksto. Aduna gyu’y balaod. Adunay balaod nga gikahatag para sa tanang butang.

¹⁰² Kabalo mo, adunay balaod sa usa ka isda. Ug makapabilin kana nga isda dinha sa tubig, tungod aduna ma’y balaod nga anaa sa kinasuloran niya. Kung tugotan lang niya kanang balaod nga anaa kaniya, nan makasalum siya ngadto sa kinahiladman sa dagat. Dili gyud kana makapadaut kaniya bisan gamay. Wala ni usa ka selula niya ang madaut. Sulayi ninyo nga buhaton kana. Pero wala man sa inyo kana nga balaod. Mao nga dili ninyo mahimo kana, apan mahimo sa isda. Makapagawas siya mismo og hangin, sa usa ka paagi nga dili siya, nga walay unsa man sa sulod niya ang mobuto. Tungod gihimo man siya nga ingon niana. Nasayod siya niana. Ug mahimo niyang ipatuman kana nga balaod, aron dalhon siya sa kinahiladman sa dagat, ug dayon patungahon siya pag-usab. Oh!

103 Adunay balaod kang Cristo. Kana nga balaod anaa mismo sa tawo. Mahimo n'yo siyang ilubong sa pinakahalawum nga lubnganan, o sa pinakahalawum nga dagat, o sa—sa pinakinahiladman sa impiyerno. Pero adunay balaod, sa Espiritu sa Dios, nga magabanhaw gayud kaniya. Kita n'yo?

104 Aduna pu'y balaod sa usa ka langgam. Karon, ang lawas niini yutan-on. Mopaubos kini sa yuta, nagatugdon dinhi sa yuta. Pero adunay balaod nga anaa sa kinasuloran niini, nga, pinaagi sa pagbukhad sa mga pako niini, makalupad kini hangtud nga mawala na sa imong panan-aw. Ngani batok kana sa siyensiya. Tungod ginaingon nila nga kini'y—mopaubos gyud kini sa yuta; ingon nga ginapaubos kini dinhi sa grabitasyon. Pero mahimo gyud niini nga batokan ang grabitasyon, ialsa ang kaugalingon niini gikan dinhi ug molupad paingon didto, tungod kay kinahanglan man niini nga palihokon kana nga balaod nga anaa niini. Ug gibuhat kini nga aduna na niini kana nga balaod.

105 Karon sugod ko nang gibati ang pagkarelihiyoso. Bueno, aduna sab og balaod sa ato, ang balaod sa Kinabuhi nga ania kanato. Dili nato. . . Ang butang lang nga kinahanglan ninyong buhaton. . . Gibuhat kamo, ug gihimugso, ug gipahimutang dinhi sa Lawas ni Cristo, ingon nga mga anak nga lalaki ug mga anak nga babaye sa Dios. Mao nga dili gyud kamo angay'ng magpailalum sa yawa. Aduna man kita'y balaod. Mao kana ang balaod nga iya sa Balaang Espiritu. Ang bugtong butang nga nahibaloan ninyo. . . nga kinahanglan n'yong buhaton, mao ang mahibaloan kung unsaon pagtugyan ug tugotan ang Dios. Kon padayon ra kamong nagapakig-away niini, kita n'yo, nan dili gayud kana magsilbi. Pero sa higayon nga, buhian n'yo ug tugotan na ang Dios, mao lang gyud kana. Kita n'yo?

106 Kung moingon ang isda, “Kadali lang, moginhawa úna ko og maayo. Mohanggab úna ko og diyutay'ng oxygen, ug hibaloon ko kung makasalum ba ako sa ilalum.” Dili. Kon buhaton niya kana, mobuto gyud siya. Kita n'yo?

107 Kon moingon ang langgam, “Tan-awon ko úna kung unsa ba ako kapaspas modagan dinhi, ug tingali dayon molupad na.” Dili. Dili niya buhaton kana. Mahulog ra siya. Kita n'yo? Kinahanglan kabalo siya kung unsaon pagkontrolar, kung sa unsang paagi siya makontrolar niana nga balaod.

108 Ug ingon niana usab sa ato. Dili kini sa kung unsay atong ginapakiglimbasogan, ug ginabira, ug—ug ginadalian, ug—ug, “Oh, kung dili ko maangkon *kini*, kung dili ko maangkon *kana*.” Dili man ingon niana. Kondili ang mahibaloan nga ang balaod sa Kinabuhi anaa mismo kanimó, ug nagasurender ka lang ug ginatugotan ang Dios. Kung ingon—ana dalhon ka Niya sa imong pagkaayo, dalhon ka sa bautismo sa Espiritu, o sa unsa mang butang nga Iyang gisaad. Ang unsa man nga panag-iya nga

Iyang gihatag imoha gayud, ug tungod sa imong pagsurender ug pagtugot mo sa Dios. Karon, kung imong. . .

¹⁰⁹ Kung dalhon—dalhon na sa pulis ang tawo nga nagkawat sa imong kabtangan, dalhon kini ngadto sa hukmanan, ug sige pud nimong ginapugngan siya, “Bueno, wala ko kabalo kung angay ba niyang buhaton kini o dili,” nan dili gyud niya madala ang maong tawo didto. Pasagdi lang siya.

¹¹⁰ Ingon niana ang angay ninyong buhaton. Pasagdi nga mopahilayo si Satanas, ang tanang pagduhaduha ug tanan nga mokalagiw gikan sa inyong hunahuna, og kung ingon-ana ipataas kamo sa Dios. Tinuod.

¹¹¹ Bueno, panahon na sa Pasko sa Pagkabanhaw. Oh, gusto gyud nako ang Pasko sa Pagkabanhaw. Oo, sir. Pero daghan na kaayo og kung unsa na lang sa Pasko sa Pagkabanhaw, karong panahona, adunay mga rabbit, ug mga pato, ug mga manok nga kolor rosas, ug maanindot nga mga kalo, ug mga bag-ong sinina; pero dili baya ingon-ana ang Pasko sa Pagkabanhaw. Ang Pasko sa Pagkabanhaw mao man ang pagkabanhaw, pagpahiuli, ang pagpabalik. Kini ang panahon sa Dios sa pagpahiuli. Tan-awa ninyo ang tibuok kalibutan; nagapahiuli ang Dios. Ginapahiuli ang unsa? Ang kinaiyahan. Husto kana. Ginapahiuli Niya ang mga bulak. Ginapahiuli Niya ang mga dahon. Ginapahiuli Niya ang mga prutas sa umahan. Unsa man kini? Nagapahiuli ang Dios. Kini ang Pasko sa Pagkabanhaw; nagakahulogan nga “ibalik kini.”

¹¹² Unsa man kini? Adunay usa—usa ka deklarasyon, usa ka pagpahayag. Ginapahayag sa Pasko sa Pagkabanhaw, o ginapahayag sa—sa—sa bulak, nga aduna kini og katungod nga motubo pag-usab. Kita n’yo? Ug ang balaod sa kinaiyahan sa Dios ginapatuyok ang kalibutan ug kana’y ginahimo nga balaod sa Dios, sa kinaiyahan, nga ginapatungha ang Pasko sa Pagkabanhaw, usa ka pagkabanhaw. Pagkamaanindot niini. Ang pagbalik sa adlaw, mao’y nagapahiuli kung unsa ang gipatay sa tingtugnaw, samtang anaa pa kina sa yuta. Ginapabalik sa Dios ang kalibutan palibot sa adlaw, sumala sa gikasulti na kanato, *dinhi* gikan sa halayo.

¹¹³ Tungod ang kalibutan, ang kalibutan mipalayo man gikan sa adlaw, og mipaingon pabalik *dinhi*. Ingon niana usab ang ginabuhat sa usa ka makasasala, nagapahilayo gikan sa A-n-a-k. Bueno, kini ang a-d-l-a-w. Apan sa dihang hinay-hinay nga nagabalik kining kalibutan. . . Ug pag anaa na kini didto, nagaabot niini ang kamatayon, ang tingtugnaw. Ginapatay niini ang matag butang nga may kinabuhi nga mapatay niini, *dinhi* dapit.

¹¹⁴ Ug, bueno, pagmotuyok na usab ang kalibutan. Ang mga binhi anaa ra dinha sa yuta. Nanggahi na sa katugnaw ang mga niini. Mibiya na niini ang unod. Ang. . . Ug wala na ang

tanan; apan aduna gihapon dinha og diyutay'ng kinabuhi nga nagpabilin. Ug sa dihaduha nga mobalik na usab ang adlaw sa puwesto niini uban sa kalibutan, dayon magkaaduna na og Pasko sa Pagkabanhaw, usa ka pagpahiuli. Mogitib pag-usab ang mga bulak. Mogitib ang tanang pananum. Tanan nga gipatay sa tingtugnaw, ginabalik sa adlaw. Tanan nga gipatay sa tingtugnaw nga kamatayon, ginabalik sa adlaw sa kinabuhi.

115 Ug mao gihapon sa mga tawo karon. Ang tanan nga gipatay sa katugnaw sa tingtugnaw nga mabugnaw, sa pormal nga relihiyon dinha, ang hapit na nga pag-abot sa Anak sa Dios sa niining kaulahiang mga adlaw, nga magaabot sa Iyang Iglesia, ipahiuli Kini sa Kinabuhi pag-usab. "Akong ipahiuli, nagaingon ang Ginoo." Kita n'yo? Ginapahiuli sa Dios ang Iyang mga bulak, ang Iyang mga dahon, ang Iyang kinaiyahan, ang Iyang binhi sa yuta, ug busa mahibaloan nato, kung ingon-ana, nga ipahiuli usab sa Dios ang Iyang puloy-anan. Ipahiuli Niya ang Iyang Eden. Ipahiuli Niya ang tanang butang nga gipatay sa kamatayon. Husto kana. Bueno, ang bugtong paagi nga magapabilin kini nga patay, mao'y kon pasagdan ra kini nga napahimutang sa sayup nga dapit. Apan kung mahulog kini sa husto nga dapit, siguradong Mabuhi gyud kini pag-usab. Busa, Dios, tugoti kami nga maanaa sa husto nga paagi, husto, alang sa pagpahiuli.

116 Tanan nga gipatay sa tingtugnaw, ginabalik sa adlaw. Ang pagbalik sa adlaw, unsa ma'y ginabuhat niini? Ginapugos niini. Paminaw. Ginapugos niini ang kamatayon. Pag ang adlaw, ang adlaw sa tingpamulak nagabalik na pag-usab sa agianan sa kalibutan, ginapugos niini ang kamatayon nga itugyan ang mga patay niini, para sa usa ka pagkabanhaw, para sa (unsa?) usa ka pagpahiuli, o "ipahiuli pag-usab." Unsa man ang nagabuhat niini? Ang adlaw, nga nagaabot. Mao kana ang balaod sa Dios.

117 Gipahimutang sa Dios ang kalibutan diha usa ka balaod, sa balaod sa grabitasyon. Ang tanang butang sa kinaiyahan nagalihok sumala sa balaod sa Dios. Ug natapos sa bulak ang panahon niini. Natapos sa binhi ang panahon niini; namatay kini sa yuta. Ug pagkahuman adunay pagpahiuli.

118 Ug karon napahimutang kini dinha, nga patay na. Wala ni usa ka butang. . . Mahimo natong kuhaon ang usa sa niining mga suga dinhi sama *niini*, ug ipadan-ag kini diha niini, pero wala kini'y mahimo og unsa man nga kaayohan. Wala gyu'y paagi nga mabuhat nato kana. Pero adunay balaod ang Dios, nga pag-madan-agan sa adlaw ang binhi, ginapugos niini nga mogitib ang kinabuhi gikan sa maong binhi. Dili na makapugong niini ang kamatayon.

119 Gipahimutang sa Dios ang tanang mga balaod Niya aron alagaran Siya, pareho sa natural ug sa espirituwal, nga molihok sumala sa Iyang Pulong, bisan unsa pa ang mga kahimtang.

Gusto ko kana. Aduna ko'y Kasulatan dinhi mahitungod niana. Oo, sir. Ginapalihok sa Dios ang tanan Niyang mga balaod. Palandunga n'yo kini. Ipatuhop gyud kini karon, kay mopaingon baya kita sa panerbisyo sa pagpang-ayo sa pipila ka gutlo. Kita n'yo? Ginapalihok sa Dios ang tanan Niyang mga balaod, nga kini kinahanglan mamuhat gyud sumala sa Kaugalingon Niyang Pulong. Nasabtan ba ninyo kini? Kita n'yo? Ang Iyang Pulong! Ang mga balaod Niya kinahanglan nga mamuhat nga sumala mismo sa Iyang Pulong. Gisugo Niya ang adlaw. Gisugo Niya ang bulan. Gisugo Niya ang kalibutan. Gisugo Niya ang kinaiyahan. Ug silang tanan nagatuman mismo, ug ang tanang mga balaod nagapamuhat gayud nga nahitakdo sa gilitok nga Pulong sa Dios. Ug ang balaod sa Kinabuhi nga ania kanato magahatud usab kanato ngadto sa pagkabanhaw. Sigurado gayud. Imposible gyud para niini nga dili kana buhaton.

¹²⁰ Mao kana'y hinungdan, nga ang balaod sa Kinabuhi nga anaa kang Cristo, kaniadtong gilitok ang Pulong ug miingon, "Dili Ako motugot nga ang Akong Balaan Nga makakita og pagkadunot, ni pagabiyaan Ko ang Iyang kalag didto sa sheol," wala gayu'y igong pahanon, wala'y igong mga yawa, wala'y unsa mang butang, para mapabilin si Cristo niadto nga lubnganan hangtud nga (Siya) ang Iyang lawas mosugod na sa pagkadunot, tungod kay ipahitabo man sa balaod sa Dios ang maong Pulong. Ug ang balaod sa Dios, pinaagi sa Balaang Espiritu, ginatuman gayud ang unsa mang saad (nasabtan ba ninyo?), bisan unsa pa ang mga kahimtang.

¹²¹ Miingon si Job, "Bisan pa kon ang mga ulod sa panit magaut-ut sa akong lawas, apan diha sa akong unod makita ko ang Dios."

¹²² Bisan unsa pa kita ka gamay, unsa pa kita ka ubos, unsa pa kita ka mahugaw, unsa pa kita ka dautan, unsa pa kita ka masakiton, unsa pa ang atong pag-antus; ang balaod sa Espiritu sa Dios, pinaagi sa Iyang Pulong, ginatukmod kini nga tumanon Siya, ginapugos ang maong hilisgotan, ug nagaingon, "Ibalik kini!" Amen. Oh, kung makapamalandong lang kita niana sa makadiyut. Ginapugos kini, bisan unsa pa ang mga kahimtang. Bisan unsa pa man ang kahimtang, ang balaod sa Pulong sa Dios ginapugos ang kahimtang nga mosunod gayud sa Iyang Pulong. Kita n'yo? Sigurado gyud.

¹²³ Karon, kung anaa dinha ang usa ka bulak, ug patay na kana, nadugta na ang mga binhi, wala na, wala na ang udlot, wala kana'y kahilambigitan ni usa ka butang niini. Motubo gyud kana pag-usab, tungod kay nagpahimutang man ang Dios og balaod, para motubo kana pag-usab.

¹²⁴ Kaniadtong nalubong na si Job sa yuta (Tingali, sa dihang nakita niya nga moabot si Jesus, miabot pa og upat ka libo ka tuig adisir miabot dinhi si Jesus.), mahunahuna gyud ninyo kung unsa na kaha ang hitsura sa lawas sa tawo, human sa upat ka libo

ka tuig, tingali wala na gyu'y igong mga abo nga nahibilin para mabutang bisan sa tumoy na lang sa kutsara. Pero miingon si Job, "Apan diha sa akong unod makita ko ang Dios: Nga makita ko mismo."

¹²⁵ Ug nagaingon kanato ang Biblia, diha sa Mateo 27, nga human sa Iyang pagkamatay, ug paglubong, ug pagkabanhaw, nga, "Daghan sa mga balaan nga nangatulog sa abog sa yuta, ang namangon gikan sa abog." Ngano man? Tungod ang maong propeta, nagsulti na man sumala sa Pulong sa Dios, ug gilitok na ang Pulong. Ug ang balaod sa Dios, pinaagi sa Espiritu, gibanhaw mismo sila. Miingon ang Biblia, "Nangadto sila sa siyudad, ug nagpakita ngadto sa kadaghanan." Dili lamang si Jesus ang nabanhaw, kondili nabanhaw pud ang mga balaan uban Kaniya.

¹²⁶ Ngano man? Dinha sa Mga Salmo, gikaingon kini, "Sakwata ninyo, kamong mga ganghaan nga walay katapusan, ug sakwata ninyo ang inyong kaugalingon. Pasudla ang Ginoo sa Himaya." Bueno, kaniadtong gibuntog Niya ang kamatayon, impierno, lubnganan, balatian, og nabanhaw sa ikatulong adlaw, "Mikayab Siya sa Kahitas-an, ug nagdala og panon sa mga bihag."

¹²⁷ Unsa man kadto? Sila nga mga anaa sa pagkabihag nanagpaabot man sa saad nga aduna kita karon. Oh, igsoon! Wala pa gani naangkon ang Espiritu Santo. "Apan, mitoo, ug naghatag og maayong testimonyo. Ug tungod niini sila nakapatak-up sa baba sa mga leon, nagpalong sa gahum sa kalayo, nakalikay sa sulab sa espada, ang mga babaye nanagdawat sa ilang mga minatay pinaagi sa pagkabanhaw: nga wala pa ang maong saad." Oh, apan nanagpaabot gyud sila! Ilalum sa paghalad og karnero nga dili makatangtang sa sala, mahimo lamang tabonan niini ang sala. Apan mitoo sila nga adunay Usa nga moabot. Ug pinaagi sa ilang pagtoo, nga bug-os gayud, amen, giangkon nila kadto. "Ug malig-on, sila nanagpanglakaw didto sa mga disyerto, nga nanagsul-ob og panit sa mga karnero ug panit sa mga kanding; nanag-antus, ug anaa sa kawalad-on, ug gisakit." Oh!

¹²⁸ Kadto nga mga tawo, nanagpaabot alang nianang pagkabanhaw, ug, tungod niana, namatay sa pagtoo, nga dala-dala ang ilang testimonyo. Ug niadtong buntag sa Pasko sa Pagkabanhaw, ang balaod sa Dios, nga gilitok ang Pulong pinaagi ni Job ug sa uban pa niadtong mga propeta, nabanhaw sila gikan sa mga patay. Oh, grabe! Mao kana. Bisan unsa pa ang mga kahimtang!

¹²⁹ Ang ubang mga tawo nga makasasala kaayo, pero dili nila gustong moatubang sa unsa mang paghukom. Oh, daghang mga tawo! Dili man malisud ang mamatay. Adunay mga mawad-an sa husto nilang pangisip, og unsa pa man, ug madali-dalion nga

mobuhat og usa ka butang. Ang uban kanila gipasunog ang ilang mga lawas, dalhon ngadto sa dagat ug iitsa ang mga abo ngadto sa upat ka kanto niini, sa upat ka hangin sa dagat. Pero dili kana makapahunong sa paghukom. Modangat gyud kamo didto, sa gihapon. Oo, sir. Kita n'yo? Bisan unsa pa man, bisan unsa pa ang mga kahintang, moatubang gihapon kamo sa Dios, sa kon asa man. Kinahanglan mong moduol Kaniya. Kinahanglan kang moatubang Kaniya. Kita n'yo?

¹³⁰ Tungod kay (Ngano man?) naglitok na Siya og usa ka Pulong, ug nagpahimutang og balaod lakip niana nga Pulong. Ug ang maong balaod mao mismo ang Kaugalingon Niyang balaod, ang Kaugalingon Niyang Kinabuhi, sa luyo Niini. Mao kana'y hinungdan nga nanumpa Siya sa Iyang Kaugalingon; ingon nga wala na ma'y laing labing daku. Kita n'yo? Gikinahanglan Niya, nga manumpa, tungod kay walay pakigsaad nga mapanghimatud-an nga walay pagpanumpa. Ug ang bugtong paagi nga mahimo Niya, adisir Niya gibuhat kadto, nanumpa una Siya Mismo, ug Siya Mismo ang nahimong Panumpa. Oh, igsoon! Sa diha nga, ang Dios nahimong tawo ug nahimong Panumpa, gihimo Niyang Panumpa ang Iyang Kaugalingon.

¹³¹ Ug pinaagi sa Kaugalingon Niyang kamatayon, paglubong, ug pagkabanhaw, gipamatud-an Niya nga ang Iyang mga balaod husto gayud. Miingon, “Gub-a ninyo kining bilding, Akong patindogon kini pag-usab sulod sa tulo ka adlaw.” “Ako,” personal nga pulingalan, “Akong patindogon kini pag-usab sulod sa tulo ka adlaw. Patindogon Ko kini. Gub-a n'yo kini, ug tan-awa kung unsay mahitabo.” Kay, nasayod man Siya sa balaod sa Dios. Nasayod Siya kung unsa kadto. Nasayod Siya nga kinahanglan nga mamuhat kadto sumala sa Pulong. Nasayod Siya nga ang Pulong sa Dios gisulti na pinaagi sa usa ka propeta, ug miingon, “Dili Ako motugot nga ang Akong Balaan Nga makakita og pagkadunot.” Mao na dayon kadto. Mao na dayon kadto.

¹³² Busa, ang balaod sa Dios kinahanglan nga mamuhat pinaagi sa Pulong. Paingon na kita sa usa ka halangdong butang sa pipila ka gutlo. Kita n'yo? Kita n'yo? Tungod, ang balaod sa Pulong sa Dios, ang Balaod sa Dios, kauban man sa Iyang Pulong.

¹³³ Karon, kung mosulat ang hukmanan og usa ka pulong, “Sa *ingon niini-ingon niana* nga butang, may usa ka silot, kung buhaton ang *ingon niini-ug-ingon niana*.” Bueno. Karon, mao kana ang pulong sa hukmanan, ug ang balaod sa hukmanan ginapatuman mismo ang pulong sa hukmanan.

¹³⁴ Ug pagmosulti gani ang Dios og usa ka butang, nan usa kana ka balaod. Ug ania ang Balaang Espiritu aron ipatuman kana nga balaod, amen, para sa magtotoo. Kinahanglan gitagana-nang-daan kamo para buhaton kana, ug gikinahanglan nga usa

gyud kamo ka magtotoo. Kinahanglan aduna kamo'y ilhanan nga iya sa "magtotoo." Adunay moingon, "Aduna ka ba'y gahum?" Wala. Pero aduna kita'y awtoridad. Mao kana. Dili gahum; kondili awtoridad. Wala man kita'y igong gahum sa pagbuhat og unsa man.

¹³⁵ Sama sa gisulti ko usa ka higayon kaniadto, bahin sa usa ka gamay'ng pulis didto sa Louisville, nga nagatindog didto. Mas gamay siya kaysa sa ako; gamayon nga tawo. Natabonan na sa iyang kalo ang iyang mga dalunggan. Ug ang sakyanan. . . Oh, halos naglawa na ang iyang uniporme. Naglakaw-lakaw siya didto sa kalsada. Dunay mora'g, gamay'ng pusil, nga nakasuksok sa iyang kilid, bitbit niya ang gamay'ng batota, og usa ka gamay'ng pitò. Naglakaw-lakaw didto, nga nakasul-ob og usa ka pares sa puti nga guwantes. Ug kadtong—kadtong mga sakyanan, ang uban niadto tulo ka gatus ug singkuenta ang kakusgon, nga nanagbulhot didto niadto nga kalsada, nga mora'g—mora'g kilat, nagabulhot, bulhot lang. Bueno, kadtong gamay'ng tawo dili gani makahimo sa pagpahunong sa usa ka. . . Dili gani niya mahimong pahunongon ang usa ka nakabuhi nga gamay'ng kabayo, gamit ang iyang kusog. Dili gayud. Pero sa naglakaw siya didto sa dalan, nga nagagilak-gilak kadtong dakung tsapa, gipatingog ang pitò, ug gipataas ang iyang kamot. Igsoon, ang tulo-ka-gatus kakusgon, kakusgon nga mga makina, ming-igiik ang mga preno, ug tanan nang uban pa. Dili kadto tungod sa kusog sa tawo. Kondili tungod kadto sa awtoridad nga aduna siya. Mao kana.

¹³⁶ Ingon-ana ang Iglesia. Mahimong usa ra ka pundok sa mga "holy-roller," kono, o kung unsa man ang tawag n'yo niana, pero sa awtoridad kini. Uh-huh, uh-huh. Tungod kini sa awtoridad nga nagapaluyo niini. Mao kini mismo ang nagabuhat niana. Bisan unsa pa man ang mga kahintang, ang balaod sa Dios nagapamuhat gayud pinaagi sa Iyang Pulong. Karon, dili kini mamuhat pinaagi sa inyong kredo. Magapamuhat kini pinaagi ra sa Pulong. Oo. Nagapamuhat gyud kini pinaagi sa Pulong, kana lang, karon, bisan unsa pa ang kahintang.

¹³⁷ Si Abraham, sumala sa gibasa nato kaganina sa atong teksto, ang asawa ni Abraham kinahanglan nga maibalik. Ngano man? Tungod nagsaad man ang Dios kang Abraham, ug ania ang usa ka hari nga gikuha si Sarah, para minyoan, para mahimong asawa niini.

¹³⁸ Bueno, unsa ma'y mahimong buhaton sa hari? Ipatatay si Abraham, sa gilayon. Mao kana'y giingon ni Abraham. "Ginapakilooy ko kanimo, ingnon mo nga. . ." Human nga nahibaloan niya nga—nga nakita siya ni Abimelech, niadtong Filistihanon nga hari didto, ingon niya, "Karon, ikaw—ikaw, ginapakilooy ko kanimo, ingnon mo nga ako igsoon mong lalaki. Tungod kay kung. . . maanyag ikaw nga babaye." Ug ingon pa, "Karon, kung makita niya nga maanyag ka, ug ako—ako—ako—

pagapatyon ako, tungod kay kuhaon ka niya ug minyoan ka.” Ug tuod man nakita gyud ni Abimelech si Sarah, ug gidala siya sa iyang tawo pasulod.

¹³⁹ Usa siya ka maanyag nga babaye. Ug, lain pa’y ato, usa na baya ka gatus ang panuigon niya kaniadto. Ug siya—siya . . . Gipakita lamang sa Dios kung unsay pagabuhaton Niya sa atong tanan, pinaagi kanila. Nasayod na man mo, nahisgotan ko na ang tanan niana, sa akong teksto ug sa mga teyp, ug uban pa, ginapamatud-an kana pinaagi sa Pulong sa Dios. Eksakto gayud. Gisulti sa Dios, pinaagi nila Abraham ug Sarah, kung unsay pagabuhaton Niya sa tibuok kaliwatan. Husto.

¹⁴⁰ Bueno, atua siya, ug gikuha siya ni Abimelech aron mahimong asawa niya. Si Abimelech, ug bueno andam na gayud siya kaniadto, nga kuhaon ang maong babaye aron mahimong asawa niya. Ug (unsa man?) nagsulti na ang Dios kang Abraham, “Pinaagi kang Sarah makabaton ikaw niining bata,” ug atua ang usa ka batan-on nga lalaki nga kuhaon si Sarah. Atua pud si Abraham, nga mga usa na ka ga- . . . mga usa ka gatus anyos na usab, kaniadto, didto.

¹⁴¹ Apan, pinaagi niadto, matikdi ninyo kung unsay gisulti sa Dios dinha. “Oo, nasayod Ako sa pagkamatinuoron sa imong kasingkasing. Mao kana ang hinungdan nga ginapugngan Ko ikaw nga dili makasala batok Kanako. Mao nga iuli kanang maong babaye; kay ang iyang bana usa man ka propeta. Tugoti siya nga mag-ampo alang kanimo. Kung dili nimo buhaton, nan puohon Ko ikaw ibabaw sa yuta.” Mao kana.

¹⁴² Unsa man? Ang Pulong sa Dios kinahanglan gayud nga magpabilin. Mao nga walay si kinsa mang lalaki ang mahimong mohilabot kang Sarah. Nagsaad na man ang Dios.

¹⁴³ Si Sarah, usa ka tipo sa Iglesia, sa tinuod nga Iglesia, sa gawasnon nga Iglesia, ang babayeng-gawasnon nga may usa ka gawasnong-Anak, nga tipo sa natawo na pag-usab nga Iglesia nga gisaaran. Pasagdi sila nga isulti ang bisan unsa nga gusto nilang isulti; tawgon kining “holy-roller, panatisismo.” Ngani gisulayan na man nilang pugngan Kini sukad pa kaniadto sa Pentecostes, pero dili gayud nila mahimo kana. Dili, sir. Kay magpabilin. . . Ayaw n’yo gayud Kini hilabti. Kana lang. Pagakuhaon kini sa Dios ug aduna Siya’y buhaton Niini, sa ingon ka sigurado gayud nga nagatindog ako dinhi. Moadto na kita bahin sa kapanahonan niini, karon, sa pipila ka gutlo. Tabangan unta ako sa Dios, pamatud-an ko kini kaninyo, kon asa na kita. Husto. Inyong. . . Dili gayud nila mapukan kini. Dili man kini mahimong pukanon. Husto kana.

¹⁴⁴ “Ayaw n’yo siya hilabti.” Ngano man? Dinha man magagikan ang natural nga binhi. Kinahanglan nga moabot ang natural nga binhi. Kung kini. . . Kung giminyoan ni Sarah kining laing lalaki, wala unta nahimugso ang natural nga binhi.

145 Busa kung gipanalipdan sa Dios ang alagianan para sa natural nga binhi, unsa pa kaha ang para sa espirituwal, ang Harianong Binhi, nga kinahanglan Niyang panalipdan!

146 Satanas, ibalik sila. Buhii sila. Ayaw sila pugngi dinha nianang mga organisasyon ug mga ingon-anang butang. Sila’y gawasnon nga mga tawo. Pasagdi na sila. Oo. Buhii sila, ang Harianong Binhi.

147 Karon, nagahisgot ang Dios mahitungod sa pagpahiuli, bueno, dinhi sa Joel, nagahisgot Siya mahitungod sa... Nakawali na ako mahitungod niini, usa ka higayon kaniadto, ug gihisgotan kini sa lahi nga anggulo. Mahitungod sa... Pero wala gyud kini bug-os gihisgotan, sama sa akong plano nga buhaton karon, ug wala man gud ko’y igong panahon kaniadto para buhaton kini maingon nga angay gyud unta.

148 Apan nagahisgot ang Dios dinhi, sa Joel, mahitungod sa... nagahisgot ang Dios mahitungod sa Iyang Punoan nga nagapamunga nga Iyang gitanum. Nagtanum ang Dios og usa ka Punoan nga nagapamunga. Gitanum Niya Kini niadtong Adlaw sa Pentecostes, ug gipatubo Niya kana nga Punoan alang sa usa ka katuyoan. Gusto Niya nga ipamunga Niini ang Iyang Bunga-nga-Pulong, ang Pulong sa Dios. Gitinguha Niya ang usa ka Iglesia nga tumanon ang Iyang Pulong. Sa tanang nangaging kapanahonan, napakyas si Eva nga tumanon Kini, napakyas ang mga Judio nga tumanon Kini, napakyas usab ang kasugoan, ang tanan napakyas gayud, busa nagtanum ang Dios para Kaniya og usa ka Punoan. Usa ka Kahoy!

149 Karon hinumdumi, nga aduna kaniadto og duha ka kahoy sa tanaman sa Eden. Nasayod kita niana. Tawgon n’yo ang mga niini og unsa man nga gusto ninyong itawag. Aduna pud ko’y ideya. Pero, bisan pa man, ang usa niadto mao ang usa ka punoan nga nahugawan; nahugawan kadto. Ug ang Usa pa wala nahugawan; kadto nga Kahoy sa Kinabuhi naggikan man sa Dios, sa Langit. Ingon Niya, “Ang inyong mga ginikanan nanagpangaon og manna, ug nangamatay. Apan sa niini nga Punoan, managpangaon kamo, ug mabuhi kamo hangtud sa kahangturan.” Ug gibantayan sa Manulonda kanang Kahoy sa Kinabuhi, sukad pa sa tanaman sa Eden, gitipigan Kana didto sa Eden. Kana nga Kahoy sa Kinabuhi anaa sa Eden, karon, sa espirituwal nga pagkasulti. Matikdi.

150 Karon, sa dihang gitanum sa Dios kini nga Punoan, Kini’y aron mamunga og siyam ka nagkalainlaing matang sa bunga, siyam ka nagkalainlaing matang; nga nagakahulogan og, siyam ka espirituhanon nga mga gasa, siyam ka bunga sa Espiritu nga motakdo sa siyam ka espirituhanon nga mga gasa. Kadto mao ang Kahoy sa Dios. Gitanum Niya Kini sa yuta niadtong Adlaw sa Pentecostes.

151 Karon mohunong úna kita. Pirmi gayud kitang limitado sa oras. Laktawan ko na lang dinhi ang pipila ka Kasulatan, ug mopaingon na dinhi sa Mga Salmo, ang una. Nakita ni David kini nga Kahoy, dugay na nga panahon. Ug sa pagsulat niya og mga awit tungod sa butang nga makalipay, kana ang unang butang nga gisulat niya. Nakita niya kini nga Kahoy, ug Kini'y "natanum sa daplin sa kasapaan sa Tubig." Kini nga Kahoy! Siya!

Ug siya mahisama sa kahoy, kahoy sa Dios, nga natanum (asa man?) sa daplin sa kasapaan, kasapaan (pang-dinaghan), sa kasapaan sa tubig (pang-usahan) . . .

152 Dili usa ka Methodist, Baptist, Presbyterian, Lutheran, og uban pa. Dili, dili. Uh-huh. Kondili mga kasapaan sa usa lamang ka Tubig; siyam ka espirituhanon nga mga gasa sa mao ra nga Espiritu. Siyam ka bunga sa Espiritu nga nagagikan sa mao ra nga alagianan.

. . . siya mahisama sa kahoy nga natanum sa daplin sa kasapaan sa tubig.

153 Sa nakita kini ni David, ug nagsulti siya. Ingon niya, "Bulahan kana nga tawo." Ug matikdi, ang ingon niya nga dili kini mahimong mamatay. "Ang iyang mga dahon dili malaya." Dili, dili. Bisan unsa pa ang buhaton nila, dili gayud nila mapatay kana nga Kahoy. Ngano man? Tungod sa dapit kung asa siya gitanum. Mao kana mismo ang hinungdan. Tungod sa dapit kung asa siya gitanum. "Gitanum siya sa daplin sa kasapaan sa Tubig." Karon matikdi. Miingon si David, "Ang iyang—ang iyang mga gamut dili mamatay."

154 Kabalo mo, ipananglitan n'yo ang usa ka kahoy, usa ka dakung kahoy. Ako, kaniadtong bata pa ako, nagaadto ko kaniadto sa gawas, ug kami'y, ingon nga mga bata pa kami, nagaadto kami sa gawas, ug dunay usa ka dakung karaang kahoy diin kami nagalingkod kaniadto sa ilalum niadto, sa dakung karaang kahoy'ng beech. Ug nagahaguros ang hangin. Ug napahunahuna ako, daw sa kadtong kahoy, nga habog kaayo, daw sa tumbahon gyud sa hangin ang—ang maong kahoy. Pero, abi ninyo, sa matag higayon nga mohaguros ang hangin diha sa usa ka kahoy, ginatay-og niini ang kahoy, ug ginapaluag niini ang mga gamut, aron nga mahimo sa mga gamut nga malubong pa sa mas halawum ug mas makagunit pa.

155 Ug ingon niana usab, ang pagbiaybiay, pagkatawa, pagbugalbugal ngadto sa usa ka Cristohanon. Ang ginabuhat niini, mao'y, ginatay-og sa pagpanglutos ang Cristohanon, para himoon siya nga mas mag-ampo pa, mas mohalawum pa, og mas manghawid pa, aron nga masarangan niya ang unos.

156 Karon, unsa kaha kung ang usa ka tawo gitanum diha sa ingon-anang butang sama sa "daplin sa sapa," kon diin ang mga

tubod, ang siyam ka nagkalainlaing mga tubod nga nagahatag kaniya og tubig? Oh, grabe! Pagka—pagkalig-on gayud sa iyang pundasyon. Ug ang usa ka tawo nga gitanum sa daplin sa sapa, sa kasapaan sa Tubig; usa ka Tubig, usa ka Espiritu, “Adunay mga gasa sa pagpang-ayo, sa mao ra nga Espiritu; mga gasa sa pagpropesiya, sa mao ra nga Espiritu; ang tanan mao ra nga Espiritu, apan daghan og mga gasa.” Usa ra ang Maghahatag.

¹⁵⁷ Karon, nakita siya ni David, nga natanum siya sa daplin niini nga Kahoy. Karon, dili siya mahimong mamatay. Karon matikdi kung ngano. Anaa man ang iyang Kinabuhi diha sa mga gamut. Asa ba ang mga gamut, o, ang kinabuhi sa kahoy? Nagapabilin diha sa mga gamut. Sigurado gayud. Nagatubo kini ug ginapamunga ang bunga niini. Oo.

¹⁵⁸ Matikdi. Ang mga gamut niini adunay Kinabuhi, aron ipamunga ang Iyang bunga sa gikatakda nga panahon. Karon hinumdumi, kini nga Punoan dili mopaatak sa bunga Niini.

¹⁵⁹ Bueno, pagtanum mo og usa ka punoan ug ipahilayo kini gikan sa tubig. Mahibaloan mo na lang, gagmay ra nga mga mansanas ang makuha nimo. Ang tanan niini aduna pa gyu’y mga bangag-bangag ug gipangkaon na sa ulod. Mao nga mopaatak kini sa—sa—sa bunga niini.

¹⁶⁰ Ingon niana usab ang nagakahitabo sa mga iglesia karong panahona. Mipahilayo na kamo gikan nianang Sapa, mipahilayo na sa mga gasa sa Espiritu. Mao nga ang anaa kanila usa lamang ka iglesiang natural. Ug nagapahilayo sila sa espirituhanon nga mga gasa ug sa espirituhanon nga mga butang, ug nagapaatak sila sa ilang bunga. Unsa ma’y ginabuhat nila? Ang ilang—ang ilang mga magtotoo nagakinabuhi uban sa kalibutan, nagapanglihok nga sama sa kalibutan, nagapangawat, nagapanikas, nagapamakak, nagapanigarilyo, nagahuboghubog, nagasugal, nagapahigayon og mga party-party sa pagdula og bunco sa iglesia, aron may ikabayad sa magwawali, ug tanan nang uban pa, mga pang-sosyal nga panihapon, mga sayawan. Kita n’yo? Ilang ginapaatak ang ilang bunga. Sama lang kini sa kalibutan.

¹⁶¹ Ug motan-aw ang dili-magtotoo ug moingon, “Wala ma’y kalahian tali niana nga tawo ug sa ako.”

¹⁶² Mao kana ang nagpahinungdan nga mitungha ang komunismo sa Rusya. Mao kana’y hinungdan nga gisunog nila ang iglesiang Katoliko sa . . .

¹⁶³ Didto sa Mexico, sa dihang atua ako didto ug nakita ko kadtong mga lungag nga apog, kon diin kadto, ug kadto ang mga lugar kon diin nila gipangsunog kadtong mga gagmay’ng masuso, pag ipanganak sa mga madre kadto nga mga bata. Bisan gani mga lawas sa tawo, lawas sa hamtong nga tawo atua pud didto, sa mga lungag nga apog. Unsa ma’y gibuhat nila?

Gipangtambog nila ang ilang bunga, kita n'yo, ug gitay-og sila sa Dios aron mahulog sa punoan. Ingon niana lang. Kita n'yo?

164 Apan ang usa ka tawo nga gitatum, dili ingon nga gitugsok lang, kondili gitatum gyud sa daplin sa kasapaan sa Tubig, igapamunga niya ang Iyang bunga (matikdi) sa iyang. . . ang Iyang bunga sa panahon niya. Ginabasa ba ninyo kini? Mga Salmo 1.

Bulahan ang tawo nga. . . wala magalingkod sa mga lingkoranan sa mga mayubiton, ni magatindog sa dalan sa mga makasasala.

. . . siya mahisama sa kahoy nga natanum sa daplin sa kasapaan sa tubig, siya magapamunga sa iyang bunga sa iyang panahon; . . . ug bisan unsa nga ginabuhat niya magamauswagon.

165 Kita n'yo? Matikdi, “Dili ingon niana ang dautan; ug dili siya magatindog uban kaniya sa paghukom.” Kita n'yo?

166 Karon, “Igapamunga niya ang Iyang bunga sa iyang panahon.” Matikdi n'yo ang matag *iyang*, ang personal nga pulingalan dinha. Iya kining bunga, bunga sa Dios, sa gikatakda nga panahon nga—nga ipamunga kini sa propeta. Maanaa kini sa panahon sa propeta, ang bunga sa Dios, sa oras sa Dios, pinaagi sa panahon sa propeta. Kita n'yo? “Igapamunga niya ang Iyang bunga sa iyang panahon.” Tan-awa n'yo kung dili ba duha ang *iyang* dinha. Igapamunga ang Iyang, ang bunga sa Dios, kita n'yo, sa panahon nga gitagana nang daan nga moabot ang mensahero, igapamunga niya ang mga niini, karon timani n'yo kana. Ang mensahero nga magadala sa bunga sa Dios, magadala niini sa panahon sa Dios, sa gikatakda nga panahon sa maong tigdala. Kita n'yo? “Igapamunga Niya ang Iyang bunga sa iyang panahon.” Ug dili kini malaya. Ngano man? Tungod anaa man niini ang gitagana-nang-daan nga bunga dinha, dili kini mamatay, tungod kay gitagana-nang-daan kini.

167 Karon, Mga-Taga Efeso :5, 1:5, diay, gikaingon kini, “Nagalingkod sa Langitnong mga dapit diha kang Cristo Jesus.” Unsa ma'y nahitabo? Ingon niya, “Ang Dios, pinaagi sa Iyang pagkahibalo-nang-daan, kita gipili-nang-daan ngadto sa pagkahimong mga anak sa Dios nga sinagop, pinaagi kang Jesus Cristo.” Ang Dios, pinaagi sa Iyang pagkahibalo-nang-daan, gitagana-nang-daan ang tanang butang nga mahitabo sa umalabot. Pinaagi sa Iyang pagkahibalo-nang-daan, nakita na Niya kini kaniadto pa. Busa, gikan sa sinugdanan, mahimo Niyang isulti ang katapusan.

168 Busa, kini'y gitagana-nang-daan nga bunga diha sa—sa gamut sa niini nga Punoan. Ug dili malaya kini nga Punoan, tungod kay aduna man Kini og gitagana-nang-daan nga bunga. Karon, mao kana ang Punoan nga gipahinungdan ni Joel dinhi. Kita n'yo? Dili Kini mamatay. Gikaon man Kini sa mga ulod,

apan dili gyud Kini mahimong mamatay. Sa gamut Niini, anaa Niini ang gitagana-nang-daan nga Kamatuoran. Anaa Niini ang Pulong sa Dios, niini nga Punoan. Ug kini nga Punoan mao—mao kadtong Punoan, ang bugtong paagi, Kini—gipahimutang Kini didto sa tanaman sa Eden.

¹⁶⁹ Tanang mga punoan, nga pinaagi sa babaye, nagakamatay. Nagakamatay kitang tanan, tungod sa babaye. Pinaagi sa pagkahimugso, nagakamatay kitang tanan. Tungod sa babaye miabot ang kamatayon, kay kini nga pagkahimugso miabot man tungod sa babaye. Oo. Busa, kinahanglan *kini* nga mamatay, tungod sa sala.

¹⁷⁰ Apan sa Pagkahimugso, sa bag-ong Pagkahimugso nga nagaabot pinaagi ni Cristo, dili na mahimong mamatay. Kana mao kadtong usa ka Kahoy, ug may usa pa ka kahoy. Kita n'yo? Ug kini nga Kahoy, bisan gilutos Kini, gibiyabiayan, sukad pa kaniadto sa sinugdanan sa tanaman sa Eden, dili gyud Kini mahimong mamatay. Ingon nga gitagana-nang-daan Kini. Gihampak Kini ug gibunalan, ug, grabe, tanan na gibuhat ngadto Niini. Ug unsa ma'y nahitabo? Dili Kini mahimong mamatay. Ang iyang. . . dili siya mamatay. Dili gayud, tungod kay anaa man sa sulod niya ang gitagana-nang-daan nga Pulong sa Dios. Kinahanglan Niini nga motubo kay ang Iyang bunga anaa mismo sa iyang panahon, gitagana-nang-daan nga panahon. Mao nga, bisan unsa pa man. . .

¹⁷¹ Nakita ni Joel ang matag usa kanila, nga gipanagkaon hangtud sa kinahiladman. Apan ang ingon Niya, “Akong ipahiuli, nagaingon ang Ginoo,” kay ang predestinasyon sa Dios anaa man sa mga gamut sa maong Kahoy. Kinahanglan Niini nga motubo, tungod kay ginadala Niini ang gitagana-nang-daan nga Pulong sa Dios. Hmm! Oh, daw sa unsa nga Kahoy! Grabe!

¹⁷² Kana nga Kahoy, nagsugod Kana nga mitubo didto sa Eden kaniadto. Unsa ma'y nahitabo? Aduna kaniadto'y miabot nga usa ka pundok, nga mga anak ni Cain, may sa kung unsa nga mga insekto ang miabot didto ug gikaon Kini hangtud sa lindog. Ug mikuha ang Dios og bunga gikan Niini, ug gipahimutang Kini sulod sa arka ug gidala Kini. Oo. Hangtud karon, mao gihapon kini, gikan sa mga nakalinya nga paghukom; sa Israel, hangtud karon.

¹⁷³ Ug dayon didto sa Pentecostes, kon diin ang Iglesia ingon nga Punoang Pangasaw-onon, Iyang—Iyang gihan-ay, niadtong Pentecostes, ang Punoan nga gitagana-nang-daan aron ipamunga ang Iyang bunga sa gikatakda nga panahon. Bueno, maayo man, maayo gayud ang mga bunga. Ngani nanglimbukad man Kini niadtong Adlaw sa Pentescostes. Tan-awon nato kung unsay nahitabo niadtong Adlaw sa Pentecostes. Miingon si Jesus, “Ang mga buhat nga Akong ginabuhat pagabuhaton usab ninyo.” Gipang-ayo nila ang mga may sakit. Bueno,

niadtong Adlaw . . . tan-awon nato kung sa unsang paagi kini nagsugod. Niadtong Adlaw sa Pentecostes, pila ka adlaw human sa pagkabanhaw, singkwenta ka adlaw human sa Pasko sa Pagkabanhaw, may miabot nga usa—may miabot nga usa—usa ka nagahaguros nga makusog nga Hangin, gikan sa Langit.

¹⁷⁴ Pero, sa karong panahon, gihimo na nato kining lahi. Motindog ang ministro ug may kuhaon, moingon, “Ilista ko ang inyong ngalan diha sa libro.” Kita n’yo? O kaha may usa ka graduwado sa kolehiyo nga nakapilo ang iyang kuwelyo, ang moingon, “Duol mo dinhi ug dawata n’yo ang kosher nga tinapay. Kana, pagkahuman, mahimo na kamo nga miyembro sa iglesia.” Dili ba kana talagsaon? Moingon ang ministro, “Umari ka og pagpamiyembro sa among grupo.” Aba, pareho ra silang sayup.

¹⁷⁵ “Niadtong Adlaw sa Pentecostes, may miabot gikan sa Langit,” (dili gikan sa pulpito, didto sa dalan) “gikan sa Langit, nga usa ka” (Unsa man? Usa ba ka pari? Dili. Usa ba ka ministro? Dili. Unsa man kadto?) “usa ka dahunog nga sama sa usa ka nagahaguros nga makusog nga Hangin, ug gipuno Niini ang tibuok lawak diin didto sila nanaglingkod. Miabot kanila ang mga dila nga nabahinbahin.” Nagabungabunga, dili sila makasulti, sila’y puno kaayo sa himaya. Gipuno sila sa Espiritu Santo. Nangadto sila sa kalsada, nga nagakutab-kutab. Nanaglihok gayud, nga daw sa . . .

¹⁷⁶ Bisan ang dungganon nga kongregasyon mitindog didto ug miingon, “Bueno, kini nga mga tawo nangahubog sa bag-ong bino. Nangahubog silang tanan. Tan-awa n’yo sila nga mga kalalakin-an ug kababayen-an, daw sa unsa nga nagasarasay sila ug kung unsa na lang ang ginabuhat.”

¹⁷⁷ Karon, kana’y MAO KINI ANG GINAINGON SA ESPIRITU. Mao kana ang Kasulatan. Sa ingon-anang paagi naorganisa ang Iglesia; dili naorganisa, kondili giordenar. Dunay dakung kalahian nianang duha ka pulong. Matikdi. Mao kadto sila.

¹⁷⁸ Karon, ug kabalo ba mo kung unsa, kamong mga Katoliko? Ang bulahan nga birheng Maria kauban mismo nila kaniadto. Oo. Karon, kung wala gitugotan sa Dios si Maria nga makaadto sa Langit nga wala nadawat ang Espiritu Santo, nan unsaon man ninyo pagpakaadto Didto, nga wala makabaton Niini? Karon hunahunaa lang ninyo kana. Husto kana. Kauban nila si Maria kaniadto. Ug gikinahanglan niyang maghulat didto hangtud nga nawala kaniya ang tibuok niyang dignidad ug garbo, og napuno sa Espiritu.

¹⁷⁹ Ug atua sila nagaabot, nanaglihok nga daw sa hubog nga mga tawo. Miingon ang Biblia nga naingon niadto gyud sila. Miingon ang mga tawo, “Kini nga mga tawo nangahubog sa bag-ong bino.”

¹⁸⁰ Apan, si Pedro, ang tigpamaba, ang ministro sa grupo, mitindog didto ug miingon, “Kini sila dili mga nangahubog sa bag-ong bino, maingon sa inyong ginadahum, sanglit karon ika-siyam pa man lang ang takna sa kabuntagon. Apan kini mao ang giingon sa propeta nga si Joel.” Mao kana ang gibasa ko karong adlaw. “Ug mahitabo sa kaulahiing mga adlaw, ang ingon sa Dios, igabubo Ko ang Akong Espiritu sa tanang unod; ug magahimo’g propesiya ang inyong mga anak nga lalaki ug mga anak nga babaye. Ug magapakita Ako og mga katingalahan diha sa itaas sa kalangitan, ug diha sa yuta, mga ilhanan. Ug mahitabo, nga ang si bisan kinsa nga magatawag sa Ngalan sa Ginoo mamaluwas.”

¹⁸¹ Bueno, nagwali si Pedro niadtong Pentecostes, sumala sa mao gihapon nga propeta nga ginawali nako karon mahitungod sa: pagtanum niini nga Kahoy. Ug dinha niya Kini gitanum. Oh, maayo gyud ang pagtubo Niini. Nanglakaw sila ug adunay espirituhanon nga mga gasa. Gipang-ayo nila ang mga may sakit. Nagwali sila. Gibalhog sila sa bilangoan. Andam gyud sila nga mag-antus alang sa Pulong.

¹⁸² Kung miadto ka sa ubang nasud ingon nga usa ka paling-paling, nan dili gyud ka mamahimong usa ka maayo nga Amerikano, kung miadto ka didto. Kung moadto ka karon sa Japan, og hilum nga motabok sa utlanan, moingon, “Paminaw mo, mga higala. Dapig ako kaninyo. Kabalo ba mo kung unsa? Dapig man ko kaninyo, pero atua pud ako sa pikas bahin.” Ikaw, nga mabudhion, angay ka gayu’ng pusilon. Husto kana. Usa man ikaw ka mabudhion. Sigurado.

¹⁸³ Ug bueno ingon niana usab, ang usa ka tawo nga nasayod sa Pulong sa Dios, ug mopakigkompromiso Niini tungod kay gisulti kaniya sa usa ka organisasyon nga kinahanglan niyang buhaton kini sa ingon niini nga paagi. Usa kana ka mabudhion. Husto.

¹⁸⁴ Apan kini nga mga tawo dili sila mga mabudhion. Dili igsapayan kanila kung unsa, bueno, kung unsa man ang pagpanglihok nila, kung unsa man ang ilang paggawi sa iglesia: nanagsiyagit, ug nanaghilak, ug nanagsinggit, ug—ug nagakutab-kutab og mga pinulongan nga daw sa nag-inistoryahanay sila sa usa’g usa pero wala magkasinabot. Ang mga tawo nga atua didto sa mga mananambong nga gikan sa ubang mga nasud ug dunay laing pinulongan sugod nang nadungog kung unsay ginasulti nila. Pero wala sila mismo mahibalo sa kung unsay ginasulti nila; nagakutab-kutab ra man sila. Apan nasabtan kadto sa ubang mga tawo didto. Ug miingon sila, “Kining mga tawhana mga hubog gayud.”

¹⁸⁵ Apan miingon si Pedro, “Dili sila mga hubog, kondili napuno sila sa Espiritu.”

¹⁸⁶ Busa, mao kadto, ang matag usa kanila miagi sa pagka-martir, gawas kang Juan, ug gisunog siya, diha sa usa ka dakung

kawa sa mantika sulod sa baynte-kuwatro ka oras, pero wala gyud nila nahimo ang pagsunog sa Espiritu nga anaa kaniya. Ug namatay siya sa usa ka natural nga kamatayon, siya lang usa, si Juan nga tigpadayag. Karon, tinuod kana.

¹⁸⁷ Matikdi n'yo karon kung unsa ang nahitabo. Dinhi niini, nagtanum ang Dios og usa ka Punoan, aron mamunga og siyam ka espirituhanon nga mga gasa, mga gasa sa Iyang Espiritu. Ang mao ra nga Espiritu nga anaa kang Cristo mikunsad sa Iglesia, nga adunay Kinabuhing Walay Katapusan. Bueno, ang mga gasa sa Espiritu atua sa maong Iglesia, ug nagalambo Kini, nagapamunga, sa tanang dapit. Wala nila gihunahuna ang ilang kaugalingon. Wala sila nag-organisa og unsa man. Nagpadayon lamang sila ug mga mag-igsoon. Sila wala'y. . .

¹⁸⁸ Malipayon ako nga nakapaskin kanang gamay'ng karatula dinha, "Walay kredong kondili si Cristo, walay balaod kondili gugma, walay libro kondili ang Biblia." Mao kana'y akong ginatoohan. Kita n'yo? Ug ingon niana pud sila. Ang kalibutan mao'y atong parokya, kita n'yo, bisan asa.

¹⁸⁹ Busa, matikdi n'yo, kini nga mga tawo kaniadtong gipamuhat nila kadto, pagkamahimayaon gayud niadtong iglesia. Ug kauban nila kaniadtong Dios, miingon ang Biblia. Ug gitagbo sila ni Jesus sa wala pa Siya mikayab. Miingon Siya, "Panglakaw kamo sa tibuok kalibutan, ug iwali ang Maayong Balita sa tanang binuhat. Kini nga mga ilhanan maganunot kanila nga nagatoo; sa Akong Ngalan. . ." Karon, "*Kini* nga mga ilhanan."

¹⁹⁰ Karon, niining panahona, unsa na ba nga matang sa ilhanan nga maila nato ang usa ka magtotoo? Nagapakiglamano siya sa pastor. Miyembro siya sa iglesia. Nakalista ang iyang ngalan diha sa libro tungod kay nakalista na ang ngalan sa iyang inahan, o nakalista na ang ngalan sa iyang amahan diha sa usa ka libro. Apan dili ingon niana ang gisulti ni Jesus. Ang ingon ni Jesus, "*Kini* nga mga ilhanan." Kana ang iglesia, nga natural.

¹⁹¹ Ang ginahisgotan nato mao ang Iglesia, nga espirituwal. Ginahisgotan nato ang usa ka espirituwal nga Punoan, dili ang usa ka natural nga punoan. Hinoon mahisgotan man nato ang maong duha ka kahoy, pagkataudtaud. Kita n'yo? Usa ka espirituwal nga Punoan! Ang ingon ni Jesus, "Kini nga mga ilhanan maganunot kanila nga nagapanghawid sa niini nga Punoan. Kini nga mga ilhanan maganunot kanila nga nanagpakadawat sa ilang Kinabuhi gikan *niini* nga Punoan. Sa Akong Ngalan pagahinginlan nila ang mga yawa; magasulti sila og mga bag-ong sinultihan. Kung makakupot sila og mga bitin, o makainom og mga butang nga makahilo, dili kini makadaut kanila. Kung pagapandongan nila sa ilang mga kamot ang mga masakiton, mangaaayo sila."

¹⁹² Mao kana ang matang sa mga ilhanan nga gisulti Niya nga monunot sa magtotoo. Asa na ba kini karon? Gihatagan Niya ang kalibutan og usa ka ehemplo kung unsa gyud ang mamahimong ilhanan sa—sa magtotoo. Ug Siya miingon, “Mas maayo pa nga usa ka galingan nga bato ang gihigot diha sa imong liog, ug kalumsan diha sa kahiladman sa dagat, kaysa paglapas ngadto sa usa kanila, kay ang ilang mga Manulonda kanunay’ng nagasud-ong sa nawong sa Akong Amahan nga anaa sa Langit.” Ang mga Manulonda!

¹⁹³ Matikdi n’yo karon. Ingon niana sila. Ug gitanum kadto nga Punoan. Nagapamuhat Kadto og dagkung buhat. Nasayod kita nga nanagsangyaw sila kaniadto, sa bisan asa. Ang Ginoo. . . Aba, niadtong Adlaw sa Pentecostes, tulo ka libo ka mga kalag ang nadugang, nabautismohan, ug nakasulod sa Iglesia. Ug daw sa unsa ka mahimayaong pagpakig-fellowship ang aduna sila kaniadto! Ug, ang tanan, walay si kinsa man ang nanginahanglan og unsa mang butang. Ang tanan buotan gayud, og may malumong kasingkasing. Ug, sa usa’g usa, silang tanan usa gyud ka dakung pamilya. Pagkamaanindot!

¹⁹⁴ Ug unya dihay miabot, nga usa ka gamay’ng, mapintas, ngil-ad og hitsura, nga bakukang nga mahabhabon ang mga ngipon nga nabuhi sa upat ka nagkalainlaing hugna, maingon sa nakita ni Joel. Kini nga insekto nga may upat-ka-hugna, ang tigdaut, miabot didto aron dauton kadtong maanindot nga Punoan sa Dios. Palandunga n’yo kini. Karon mobasa ako og pipila gikan sa kang Joel, kung unsa ang gisulti niya. Joel, sa unang kapitulo. Ang unang butang. . . Bueno, adunay upat ka nagkalainlaing mga bakukang dinha, apan didto, sa tinuod lang usa ra ka bakukang kadto. Usa ra kini ka bakukang sa upat ka nagkalainlaing hugna. Karon matikdi. Miabot kining gamay’ng, mapintas nga bakukang, tungod sa niini nga Ig-. . . tungod sa niining daku, og maanindot nga Punoan sa Dios. Tawgon nato kining usa ka Punoan, nga mao ang Iglesia.

¹⁹⁵ Ang una mao ang usa ka ulod nga dangaw-dangaw. Usa kana ka gamay’ng linalang, usa ka gamay ra kaayo nga insekto nga usa ka ulod. Unsa ma’y gibuhay niya, niadtong ulod nga dangaw-dangaw? Miabot siya aron dauton ang bunga sa maong Punoan. Kana ang unang butang.

¹⁹⁶ Karon balikan sa nato ang kasaysayan ug hibalong kung unsa ba gyud kadtong unang butang: kadto mao ang usa—usa ka grupo sa mga dungganon nga miabot sa taliwala niadtong ordinaryo nga mga tawo. Ug miingon sila, “Bueno, maayo kini nga mahimo n’yong ayohon ang mga may sakit, ug mahimo ninyo kini nga mga butang. Maanindot kana. Busa, kabalo ba mo kung unsa ang angay natong buhaton? Angay natong dalhon kini sa kon diin masabtan kini sa mga tawong mas hataas sa katilingban, sa mga mas maayo’g kahimtang: ang mayor, ang—ang mga huwes, ug uban pa, ug ang—ang—ang mga tawong

dungganon sa siyudad. Ug samtang nagalihok man gud kamo nga sama sa ginabuhay ninyo, dili gayud sila mangduol kaninyo. Kita n'yo? Mahadlok man gud sila sa inyo."

¹⁹⁷ [Nagaingon ang usa ka igsoong lalaki, "Ingon niana gihapon sila."—Ed.] Adunay miingon nga, "Ingon niana gihapon kono sila." Siguro husto gyud kana. Busa, tinuod kana. Nangahadlok sila sa Balaang Espiritu. Pasensya na.

¹⁹⁸ Ginaawit ko kaniadto ang usa ka hamubong awit:

It's the old. . .

Nadungog na ba ninyo ang *The Old-Time Religion*? Aduna ba dinhi ang nakadungog na niana nga awit?

Tis the oldtime religion. . .

Ginaawit ko kaniadto ang usa ka hamubong awit nga sama niini, daghang nang mga tuig ang milabay, ingon ko:

It's the old-time Holy Spirit,
And the devil won't go near It;
That's the reason people fear It,
But It's good enough for me.

It's so good I want no other,
For It makes me love my brother;
And It brings things from under cover,
So It's good enough for me. (Tinuod kana.)

It will make you stop your lying;
It will save you when you're dying;
It will start the devil flying,
And It's good enough for me.

¹⁹⁹ Husto kana. Mao kana'y hinungdan nga ang mga tawo dili gusto Niini. Bueno—bueno, ang Dios Kini.

²⁰⁰ Ayaw nila kang Jesus kaniadto. Miingon sila, "Kini nga lalaki?" Ang iglesia, ang dakung dungganon nga iglesia, miingon, "Mianhi ka ba para sultihan kami kung kinsa kami? Pasabton ka namo, kami'y mga Dr. Ph.D., L.L., Q.U.S., ug," grabe, "tanan na niini." O, "Aba, ako baya ang labaw'ng sacerdote. Ako'y *ingon niini, ingon niana, o uban pa*. Ug unya imo akong sultihan? Aba, natawo man ka sa sala. Ikaw walay lain kondili usa ra ka ilehitimo nga anak. Ingon nga ang imong inahan kaniadto, nagsamkon na man kanimo, sa wala pa ikaw ug ang imong amahan. . . nakasal ang imong amahan."

²⁰¹ Miingon Siya, "Kinsa ba ang makahukom Kanako og silot tungod sa sala?" Kita n'yo? "Kinsa man ang makapasangil Kanako?" Bueno. Ang *sala* mao ang "dili-pagtoo sa Pulong sa Dios." Sa laing pagkasulti, Siya miingon, "Ipakita n'yo Kanako kon asa ba nga wala Ko ginatuman ang Pulong, sa—sa—sa bug-os gayud, kon diin mismo Kini angay'ng matuman. Ipakita n'yo Kanako diha sa Kasulatan, kon asa ang Akong adlaw. Kung wala

Ko ginabuhat ang mga buhat sa Akong Amahan, nan ayaw ninyo Ako toohi.” Ingon pa, “Karon, ginapamahayag ninyo nga ingon niana kamo. Karon tan-awon nato kung ginabuhat ninyo kana.” Oh, my!

²⁰² “Sukad niadto wala na sila nangutana pa Kaniya og bisan unsa man.” Kita n’yo? Gipasagdan na nila Siya. Sama ra, niadtong milupad ang yawa ngadto Kaniya. Miingon ko nga, abi niya og basta na lang siyang makaaslang, sa unsa mang paagi. Pero, nahibaloan niya, nga aduna diay og usa ka milyon nga boltahe ang maong Kabli. Mikalagiw gayud siya gikan Niadto, sa gilayon, nakita n’yo, tungod kay dili man niya masarangan Kadto. Ug mao kana’y tinuod.

²⁰³ Bueno miabot kining gamay’ng ulod nga dangaw-dangaw, aron kuhaon ang mga bunga. Aduna ko’y duha ka panid mahitungod sa “mga bunga.” Pero buot kong basaha ang pipila lang niini. Una, ang unang bunga nga gikuha niya, mao ang gugmang inigsoon. Husto kana. Mao kana ang usa sa mga butang nga nagapatay sa iglesia dinha mismo, pag ang gugmang inigsoon. . . Oo, sir. Dayon, ang sunod nga bunga nga gikuha niya gikan sa maong Punoan. . . Hinumdumi ninyo, nga ang gugma mao ang unang bunga sa Punoan. “Gugma, kalipay, pakigdait, pagkamapuanguon, pagkamaayo, kaaghop, pagtoo, og pagpailub,” husto kana, “sa Espiritu Santo.” Karon, siyam ka espirituhanon nga mga gasa, kauban sa siyam ka bunga sa Punoan, ug uban pa. Bueno. Karon, ang una, hinay-hinay niyang gikaon ang bunga sa Punoan.

²⁰⁴ Karon ihulagway nato ang usa ka dakung Punoan, nga Punoan sa Dios. Nagapamunga Kini og siyam ka espirituhanon nga mga gasa. Nagapang-ayo sila og mga may sakit. Nagasulti sila og laing mga pinulongan. Nanghingilin sila og mga yawa. Nagapamuhat sila og dagkung mga buhat, ug ginawali ang walay-sambog nga Pulong sa Dios. Wala’y denominasyon nga mohigot kanila; gawasnon sila, nga nagapamuhat og dagkung buhat.

²⁰⁵ Ug, miabot kining gamay’ng mapintas nga yawa, nagakamang nga ang iyang duha ka sungay anaa sa atubangan, nga sama sa usa ka apan-apan, kabalo na mo, ug ang iyang gagmay’ng mahabhabon nga mga ngipon. Mao kana ang iyang unang hugna, ang ulod nga dangaw-dangaw, miabot siya aron kaanon ang gugmang inigsoon. Ingon siya, “Kabalo ka, si *Ingon niini-ug-ingon niana* gibuhat baya ang *ingon niini-ug-ingon niana*, didto sa simbahan ni *Ingon niini-ug-ingon niana*. Mao nga dili gyud ko motoo niana nga pundok sa mga tawo.” Kita n’yo? Mao kana siya, ang unang butang.

²⁰⁶ Sunod, gusto na pud niyang kaanon ang bunga nga pagtoo, pagtoo sa Pulong. “Karon tan-awa. Unsaon mo man pagkahibalo nga kana mao ang Pulong? Ingon nga gihubad na man kana

sa makadaghan nang higayon!” Kana nga gamay’ng yawa nagakaon gihapon hangtud karon. Tinuod. “Kana nga Pulong makadaghang higayon na man nga gihubad! Siya baya’y *ingon niini*, *ingon niana*, o *uban pa*. Oh, siya’y tanan na *niini*.” Kita n’yo?

²⁰⁷ Karon, kini ang usa pa ka bunga nga gikaon niya: ang kalipay sa kaluwasan. “Shhh! Banha kaayo kamo nga mga tawo. Oh, pagkabanha gyud! Grabe!”

²⁰⁸ “Oh, giunsa man nimo pagwali, Igsoong Branham?” ang ingon sa ako sa usa ka babaye, usa niadto ka higayon. Dili, dili diay. Usa diay kadto ka lalaki. Sa hunahuna ko siya’y. . . Nanghinaut ko nga ania siya. Miyembro siya sa usa pa ka iglesia. Pero giingnan niya ako, miingon, “Atua ako para maminaw unta kanimo, niadtong miaging adlaw, ug dili man lang ko makadungog nimo, tungod niadtong mga tawo nga nanaghilak.”

Miingon ko, “Kung sila. . .”

Miingon, “Giunsa man nimo pagwali?”

²⁰⁹ Miingon ko, “Kung wala sila nalipay niadto, nan wala unta ako nagwali didto.” Husto kana. Aduna ko kaniadto. . . kamo. . .

²¹⁰ Akong usa ka higala, si Jim Poole, ug ako, aduna kami og usa ka iro kaniadto. Fritz ang tawag namo sa iyaha. Ug kini nga iro, iyang—gukdon gyud niya ang bisan unsa hangtud nga mosaka na kini sa kahoy, gawas sa usa ka milo. Mahadlok man gud siya sa milo, tungod sa pagkabaho niini. Busa, pag akong ipagukod sa iyaha ang usa ka milo nga anaa ilalum sa tapok nga mga troso, ang butang lang nga akong buhaton mao ang tapikon siya’g diyutay, ug moingon, “Sige gukda! Sige gukda, pa!” Gukdon pud intawon niya kadtong milo, kita n’yo, tungod kay ginatapik ko man siya, nagaingon, “Sige gukda siya!”

²¹¹ Bueno, ingon niana gayud pag atong. . .Mao kana ang kinakabahoan nga nahibaloan ko, mao ang yawa. Busa, sa diha nga ginapahayag ko kining Pulong, ug adunay moingon og, “Amen,” kana mao’y, “Sige gukda, pa!” Ug atong—mahimo natong—malit-ag gayud nato siya.

²¹² Ug, nahibaloan nato nga gikuha niya ang kalipay. Kabalo mo, si David, usa ka higayon, nawala sa iya ang kalipay sa iyang kaluwasan. Wala nawala sa iyaha ang iyang kaluwasan, pero nawala sa iyaha ang kalipay niini. Mituaw gayud siya, “Ginoo, iuli kanako ang kalipay sa akong kaluwasan.” Kita n’yo? Ang kalipay!

²¹³ Bueno hinay-hinay nga gikaon niining gamay’ng ulod nga dangaw-dangaw ang bunga nga kalipay. “Karon, ania. Banha kaayo kamo nga mga tawo. Sultihan ko kamo, kining tanang paghilak, kining pagsulti og ‘amen,’ ug kining pagsinggit, wala kana’y kapuslanan. Wala gayu’y unsa man niana.” Kita n’yo? Mahibaloan mo na lang, anaa ka na sa usa ka dakung morge,

kabalo mo, anaa ka dinha, diin patay na silang tanan. Tungod niining mga likido nga pang-embalsamar nga Doktrina *kono*, tungod sa mga kredo nga gitulpok na ngadto sa ilang mga kaugatan kon diin ang Espiritu sa Dios unta ang angay nga nagadagayday dinha, pero ang karaang kredo sa iglesia hinoon ang gitupok dinha. Dili ikatingala nga sila sama na ka bugnaw sa niyebe ug patay na. Ang espirituwal nga termometro, nubenta nga mas ubos na sa siro. Oo. Kon adunay moingon og, “amen,” ang tanan mang-unat sa ilang liog nga mora’g gansa o unsa man, gustong hibaloong kung kinsa kaha ang nagsulti niadto. Makauulaw gayud. Sa dihang, ang Espiritu sa Dios angay unta nga kalipay, pakigdait, gugma. Apan kining gamay’ng insekto hinay-hinay mang nagakaon niini. Nakaon gyud niini ang tanang kalipay.

214 Ug, bueno, ang sunod nga bunga sa Punoan mao ang pakigdait, pakigdait sa hunahuna, ingon nga nanghibalo nga luwas ka na.

215 Sultihan nila kamo, “Bueno, ania, kung masaulo nimo ang *among* kredo, luwas ka na. Kung magpamiyembro ka sa *akong* iglesia, luwas ka na.” “Bueno, karon,” moingon pud kining usa, “dili gyud ka luwas kung motambong ka *didto*. Kinahanglan mong magpamiyembro sa *among* iglesia, aron maluwas ka. Kinahanglan mong magsulti og, ‘Maghimaya ka Maria.’ Kinahanglan mong ipalista ang imong ngalan sa *niini* nga libro. Kinahanglan mong magkaaduna og...” Oh, my! Walaon gayud niana ang tanang kalipay. Apan dili kana mao ang Punoan nga iya sa Dios; nasayod man kamo sa inyong nahimutangan. Hybrid kana, sa kanunay.

216 Kabalo na man mo sa akong sugilanon mahitungod sa mula. Usa siya ka hybrid. Wala siya nasayod kung kinsa ang iyang papa, mama, kinsa man sa ila, mismo. Kita n’yo? Usa siya ka hybrid. Pero, oh, ang usa ka tinuod nga kabayo nga puro ang kaliwat, nasayod gyud siya kung kinsa ang iyang papa ug mama, sulod sa daghang mga kaliwatan.

217 Ug karon, ang usa ka tinuod gayud nga puro nga Cristohanon, usab, nga nakadawat sa Espiritu Santo, nasayod siya nga mikunsad Kini niadtong Adlaw sa Pentecostes. Nasayod siya kung asa gyud siya. Mahimo niyang subayon ang iyang mga kaliwatan pabalik, ang iyang mga kaliwatan, hangtud sa pinaka sinugdanan niini. Nadawat Kini ni Pedro. Sa tanan niadtong mga nangaging nasud, o mga kaliwatan, nadawat nila Kini, og sa mga nagsunod pa. Ang usa ka puro gayud nga Cristohanon nasayod mismo kung asa Kini naggikan.

218 Moingon, “Bueno, Lutheran ako.” “Huh! Presbyterian ako.” Oh, ikaw nga hybrid! “Nganong dili man ka ingon niana? Nganong dili man ka ingon niana?”

219 “Bueno,” moingon mo, “unsa—unsa man diay ka?” Natawo na pag-usab. “Natawo na pag-usab, sa unsa?” Sa Espiritu sa Dios.

220 Mao kana’y hinungdan kon ngano nga dili kamo hybrid. Natawo kamo sa husto. Dili sa kung unsa nga kredo sa iglesia, kondili sa Espiritu sa Dios. Nagapuyo ang Dios sa sulod ninyo.

221 Karon matikdi. Hinay-hinay nga nagakaon kining gamay’ng insekto. Busa, nakaon niini ang tanang pakigdait sa hunahuna, oh, ug nagpadayon, nga nagpadayon, nga nagpadayon, ug oh, nagpadayon bisan ngadto sa mga nagsunod pa. Aduna ko’y usa ka panid dinhi mahitungod niining, tanan nga mga bunga, og kung unsay gibuhat niya.

222 Pagkahuman namatay kining gamay’ng insekto, ug nahimo siyang usa na ka dulon. Mao kana ang sunod nga hugna, usa na ka dulon. Karon, unsa ma’y ginabuhat sa usa ka dulon? Ginakaon sa dulon ang mga dahon. Husto kana. Ginakitkit sa dulon ang mga dahon. Ang gibiyaan sa ulod nga dangaw-dangaw, gibiyaan niya ang mga dahon; tungod ang gikaon niya mao man ang tanang bunga sa Punoan. Dayon unsa man ang miabot? Miabot ang dulon aron kaonon, kaonon ang gibiyaan sa ulod nga dangaw-dangaw. Bueno, unsa ma’y gibuhat niya? Unsa ma’y gibuhat niining ulod nga dangaw-dangaw? Gidaut ang mga dahon. Para sa unsa ba nga gidaut ang mga dahon? Para gubaon ang Balaanong pagpakig-fellowship. Husto kana.

223 “Bueno, siya’y—siya’y—siya’y Presbyterian. Wala kami og unsa man nga kahilambigitan kaniya. Siya’y Nazarene. Siya’y Pentecostal. Siya’y *ingon niini*, *ingon niana*, o *uban pa*. Wala kami og unsa man nga kahilambigitan kaniya, tungod kay dili siya miyembro sa among grupo. Magpahigayon ba og usa ka panagtigum dinhi, para sa pagpang-ayo sa mga may sakit? Huh! Ang among iglesia wala gani nagatoo niana.” Kita n’yo? Mao kana. Siya, unsa ma’y ginabuhat nianang gamay’ng dulon? Ginaputol niya ang tanang pagpakig-fellowship, husto kana, giwala ang tanang pagpakig-fellowship.

224 Unsa ba ang pagpakig-fellowship? Unsa ma’y ginabuhat sa mga dahon? Nagahatag kini og kabugnaw, kon diin ang mga langgam nagalupad og nagapasilong dinha sa mga dahon, “huh-huh,” para mabugnawan. Anaa na usab ang maong kahoy. “Ug siya mahisama sa Kahoy nga natanum.” Kita n’yo? Oo. Kon diin ang mga tawo puedeng moduol ug magpasilong ilalum sa pagpakig-fellowship sa Balaang Espiritu, para mabugnawan og diyutay. Kung nagakalibog kamo, ug wala mahibalo kung unsa ang mahitabo; ug kung mamatay ba kamo, kung luwas ba kamo o dili. Ug wala mo mahibalo kung *kini* ba nga iglesia ang husto, o kana *ang* husto. Pagpasilong lang mo ilalum sa Kahoy nga adunay mga dahon Niini. Paglingkod mo dinha. Tugoti ang mga Hangin nga gikan sa Langit nga mosugod sa paghaguros, nga

sama usa ka nagahaguros nga makusog nga Hangin, dinha sa mga dahon, mismo, kabalo mo. Unya mosugod nang . . . Ug sugod na kamong mabugnawan og diyutay.

225 Moingon, “Oh, moadto ako didto ug sultihan gyud kanang pundok sa mga holy-roller kung unsay hunahuna ko.”

226 Paglingkod lang sa makadiyut ug mabugnawan ka. Husto kana. Dili mo mahimo kana sa kaugalingon mo mismo. Tungod kay, unsa ma’y nahitabo? Gikaon na kining tanan sa dulong, siguradong, gikaon na ang tanang mga dahon niini. Karon, ania, mas maayo pang magpabulad ka na lang dinha sa adlaw. Tungod, ikaw, wala—wala na ma’y kabugnaw dinha. Oo. Karon, busa adunay . . .

227 Pero kabalo na man mo kung unsa ang angay natong buhaton. Miingon ang Biblia, nga, “Ang gitagana-nang-daan nga Iglesia, ang gitagana-nang-daan nga mga anak sa Dios,” (unsa ang ginabuhat nila?) “nagalingkod sa Langitnong mga dapit.” Unsa man kana? Kabugnaw, kahamugaway, mora’g anaa ka lang sa panimalay mismo. Amen.

228 Samtang ang tanan nanagsul-ob og tuxedo, ug—ug ang usa pa ka lalaki *ingon niini* ang sul-ob, ug—ug ang uban kanila, moingon sila, “Humph! Tan-awa n’yo. Ang maong babaye wala gayud nakapa-kulong sa iyang buhok. Mao gyud, dili ba ngilad ang iyang hitsura? Wala man gani siya’y Easter frown gown.” Karon, bueno, kana, kung unsa man kana, nga panul-ob, kabalo na mo. Bisan pa, sa . . . Oo. “Easter frown,” ingon niana, kita n’yo. Nagalingkod siya didto sa luyo, ug moingon, “Humph!” Kita n’yo? “Wala gani siya nakasul-ob og Easter . . . Aba, bueno, tan-awa kana nga lalaki, nga sul-ob ang mao rang daan nga amerikana nga gisul-ob niya niadtong miaging tuig! Bueno, unsa ma’y hunahuna mo niana?” Dili kamo komportable, niana.

229 Giingnan nako ang usa ka luoy’ng babaye, niadtong miaging adlaw. Luoy’ng babaye, miyembro siya sa usa ka dakung, dungganon nga iglesia didto sa . . . Ingon siya . . . Naghimalatyon na siya, tungod sa kanser. Miadto ko didto para iampo siya. Si Igsoong Roy Roberson, nga usa sa mga tinugyanan dinhi, ang nagpaadto sa ako didto. Ug atua didto ang luoy’ng babaye, nga naghimalatyon na tungod sa kanser. Ug ingon siya . . .

Miingon ko, “Ikaw ba . . . Usa ka ba ka Cristohanon?”

230 Ingon siya, “Sir, ako—wala ako kabalo kung unsay isulti.” Miingon, “Mitambong ako kaniadto sa *usa* ka iglesia.” Ug miingon . . . Ug misugod na siya sa paghilak.

Miingon ko, “Unsa ma’y nahitabo?”

231 Miingon, “Wala lang gani ko nakabisti sa husto.” Miingon, “Gipakaubos na ko nila.” Huh! Oh, mao kana. Kita n’yo? Kamo’y—dili kamo komportable. Kita n’yo?

²³² Pero miingon ang Biblia nga kinahanglan natong “tipunon ang atong mga kaugalingon diha sa Langitnong mga dapit.” Oh, my! Unsa man? Pareho ra tanan. Bueno, sultihan ko kamo kung unsay pagabuhaton niini. Himoon niini ang usa . . . Himoon niini ang usa ka nagasul-ob og pares nga overall ug ang usa ka nagasul-ob og terno nga amerikana nga mag-agbayay sa usa’g usa ug tawgon ang matag usa nga igsoon. Sigurado gayud. Himoon niini ang usa ka nagasul-ob og baratohon nga bistida nga gakson ang usa ka nagasul-ob og seda nga bistida, usa ka naka-satin ug moingon, “Igsoong babaye, kumusta man ka karong buntaga? Dalaygon ang Dios!” Ingon niana mismo. Sigurado gayud. Kini mao ang kalipay, pakigdait, gugma, pagtoo sa Pulong, pagkamapuanguuron, pagkamalulot, og pagpailub. Nagalingkod sa Langitnong mga dapit diha kang Cristo Jesus, nagapabugnaw sa makadiyut. Kita n’yo? Ingon niana ang gibuhat sa mga dahon.

²³³ Pero ang gibuhat sa mapintas nga dulon, miabot siya, og gikaon kadtong mga dahon, miingon, “Sa amoa kamo angay’ng mahisakop o ayaw kamo magpahisakop sa bisan unsa.” Busa gikuha niya ang tanang kabugnaw sa Espiritu. Kita n’yo? Naghimo siya mismo og usa ka kredo. Bueno. Karon kinahanglan na natong magpadayon. Mahimo man gud kitang magpabilin og dugay mahitungod nianang mapintas nga dulon.

²³⁴ Apan ang iyang ikatulong hugna mao ang usa ka lukton. Hmm! Mangil-ad na ang ngalan niini, sa sugod pa lang, ang lukton. Unsa ma’y ginabuhat sa usa ka lukton? Nagasulod kini sa panit sa kahoy. Mao kana ang agianan sa kinabuhi, dinha. Oo, sir. Nagasulod kini sa panit ug ginadaut niini ang pinakapangtabon nga panit sa lawas sa kahoy. Ang pangtabon!

Unsa ba ang relihiyon? Pangtabon. Mao kana ang buot ipasabot sa pulong nga *relihiyon*, “usa ka pangtabon.”

²³⁵ Busa, kining gamay’ng lukton, human nga nakasulod na siya sa kongregasyon, silang tanan gihimong mga dungganon; dayon iyang giwagtang sa ilaha ang tanang pagpakig-fellowship, sa porma na nga dulon; ug karon miabot na siya ug gikuha ang ila mismong relihiyon ug gihimo kining mga dogma, oo, naggamit og dili-yanong mga pulong. Naghimo siya mismo og usa ka relihiyon, ug gitigum niya ang usa ka pundok sa mga kalalakin-an ug nagpahimutang og usa ka kredo didto. Gikuha niya ang mismong relihiyon, gilaksi kini gikan sa Kahoy sa Dios, ang mismong panit nga nagadala sa tagok nga nagapabuhani niini, gikuha mismo kini. Ulod nga hantatawo! Nakita ba ninyo kana nga insekto? Eksakto gayud. Kanang ulod nga hantatawo, kana mao ang Roma didto sa unang iglesia kaniadto.

²³⁶ Ang una, ang grupo sa mga Pentecostal; dili nga mga organisasyon sa Pentecostal. Dili, sir. Ang bisan unsa nga giorganisa patay gayud. Pamatud-an ko kana sa dili madugay,

pinaagi sa mga Kasulatan. Kita n'yo? Pero sa dihang kini'y. . . Pero, ang Pentecostal nga kasinatian, para kang kinsa man kini? Para kini sa Katoliko. Kang kinsa pa? Sa Methodist, sa Baptist, sa Presbyterian, sa bisan kinsa nga nagatinguha niini. Pero kon nagatinguha kamo, kinahanglan tinguhaon n'yo gayud kini. Dili man kamo nagapamiyembro pasulod Niini.

²³⁷ Anaa na ako sa pamilyang Branham sulod sa singkuenta'y-tres ka tuig, ug wala gyud ako nagpamiyembro sa maong pamilya. Ngano man? Usa man ako ka Branham, sa sugod pa lang. Natawo ako ingon nga usa ka Branham.

²³⁸ Ingon niana usab sa pagkahimo natong mga Cristohanon. Dili tungod kay nagpamiyembro kita ngadto sa kung unsa man; usa na kana ka organisasyon. Kondili natawo kita, ingon nga mga Cristohanon, ngadto sa pagkabag-o pinaagi sa Balaang Espiritu. Matikdi karon.

²³⁹ Bueno, kining gamay'ng lukton hinay-hinay nga nagakutktot pasulod sa panit sa kahoy. Unsa ma'y gibuhat niya? Gisugdan niyang kuhaon ang relihiyon niini, ang pangtabon niini, ang Doktrina niini palayo niini. Ang relihiyon usa ka doktrina, usa ka pangtabon nga nagatabon sa unsa mang butang. Mao kana'y hinungdan nga ang atong relihiyon pinaagi mismo sa Dugo, ang Dugo. Ang Kinabuhi anaa sa Dugo nga nagatabon sa Pulong. Ug ang Kinabuhi mao ang. . . anaa Kini sa Dugo. Ang Dugo mao ang relihiyon, ug ang Kinabuhi nga anaa sa Dugo mao ang nagapamunga og mga resulta. Bueno, nasabtan n'yo ba? Kita n'yo?

²⁴⁰ Wala kini gitabonan og mga dahon sa higuera. Ngani gisulayan na kana nila Adan ug Eva usa ka higayon. Mao ra usab ang gibuhat ni Cain. Namatikdan ba ninyo kana? Nagdala si Cain og pipila ka mga katanuman, usab. Kita n'yo? Pero wala man kadto nagpulos. Wala kadto nagpulos sa ilaha ni Adan ug Eva. Ug dili gihapon kini magpulos sa karong panahon. Sa dihang gibaliran kini sa Dios sa sinugdanan kaniadto, nan gibalibaran na kini sa Eternidad. Dili gyud kini mahimo sa mga kredong hinimo-sa-tawo ug mga hunahuna.

²⁴¹ Pulong sa Dios, ang gikinahanglan nga mao'y mobuhat niini. Ug ang Pulong mao'y pinaagi sa Dugo, ang halad ni Cristo. Husto kana.

²⁴² "Ang mga tawo," maingon sa gisulti sa igsoong lalaki kaganinang buntag, "nagakuha og talinis nga mga butang." Bueno, kabalo mo, aduna kono'y dise-nuebe ka nagkalainlaing mga lansang sa nasud karon, nga anaa sa nagkalainlaing mga organisasyon, nga mahimo nilang ipahayag, "Kini ang orihinal nga lansang, nga gilansang sa Iyang mga kamot kaniadto." Unsa ma'y anaa niana, kung mao man gani? Dili ko gustong magkaaduna og unsa man nga kahilambigitan niana. Mao gyud.

243 Wala nagbiling ang Dios og unsa mang butang para mahimong mga relikyas ug mga handumanan. Gipadala Niya ang Espiritu Santo, usa ka Butang nga buhi, nga dili gayud madaut. Unsa ma'y kaayohan nga mahimo kanako sa usa ka lansang? Unsa ma'y kaayohan nga mahimo sa orihinal nga krus nga gilansangan Kaniya, unsa ma'y kaayohan nga mahimo niana kanako? Wala bisan gamay. Dili kinahanglan nga maila mo ang lansang, maila ang krus, kondili, "Ang maila Siya mao'y Kinabuhi." Kita n'yo?

244 Karon, busa nagapanghawid kita sa mga lansang, nagapanghawid kita sa mga relikyas, ug nagapanghawid kita sa mga lugar. Ug karong panahona nagalakaw-lakaw ang mga tawo, didto sa siyudad sa Jerusalem, ug—ug ngadto nganhi sa nagkalainlaing mga lugar, ug nagapanghawid sa mga relikyas ug mga ingon nianang butang. Wala gyud kana'y kahilambigitan niini, wala ni usa ka butang. Tungod kana nga butang wala na'y pulos, dunot na, ug wala na.

245 Miadto ako kaniadto sa usa ka simbahan didto sa—sa Roma. Didto kon diin sila—sila, ang tanan niadtong mga pari nga nangamatay na, ilang ginalubong sila sa usa ka tanaman, didto sa ilalum niadto, ug ginapadugta usa ang unod gikan sa mga bukog. Ug—ug pagkahuman kaloton nila ang mga bukog ug ginahimong mga lampara, ug ginasab-it pud ang ilang mga kalabera sa palibot niini. Ug mosulod didto ang mga tawo, happyod-hapyoron kadtong mga kalabera, aron makadawat kono og mga panalangin, hangtud nga ang mga kalabera namuti na ug nangapudpod na. Pagmosulod pud ka didto sa Saint Peter's Cathedral, atua kono ang usa ka tiil ni Pedro, nga ginaingon nilang, usa ka rebulto, nga napudpod na ingon nga ginahagkan kadto, sa makasiyam o makanapulo ka nagkalainlaing mga higayon; mao nga kinahanglan na nila konong maghulma og usa na usab ka tiil niadto. Grabe ka binuang gayud! Mga too-too, mao lang gyud kana, mga kredo sa doktrina nga hinimo-sa-tawo.

246 Gipadala man sa Dios ang Balaang Espiritu, ang Kinabuhi sa Dios, aron nga maanaa kaninyo, dili sa usa ka rebulto. Ikaw ang tawo nga gitinguhang pagapuy-an sa Dios; dili usa ka rebulto, kondili ang sulod ninyo. Ginatawag kana sa mga tawo nga, "balaang mga rebulto." Wala ma'y balaan nga mga rebulto. Kamo ang balaan nga bantayog sa Dios. Mao kana'y gisulti sa Biblia. Husto. "Giandaman Mo Ako og usa ka Lawas."

247 Bueno, kining gamay'ng ulod misugod na pud sa pagdaut. Ginadaut ang unsa? Nakasulod na ang lukton diha sa panit sa kahoy. Matikdi n'yo kung unsay gibuhit niini. Hinay-hinay nga gidaut ang panit sa kahoy. Unsa man ang gibuhit niini? Naghimo kini og usa ka natural nga iglesia puli sa usa ka espirituwal nga Iglesia. Oo, sir. Gikuha niini ang tinuod ug gihatag ang mini. Karon, hinumdumi. Ang dahon. . .

248 Ang bunga, mao'y gikaon sa ulod nga dangaw-dangaw. Ang dahon, mao'y gikaon sa dulon. Karon, ang panit sa kahoy, ang pangtabon, ang relihiyon, ang Doktrina; ang Doktrina, mao'y gikaon sa lukton.

249 Asa ba naggikan kadtong unang doktrina, nga wala sa Biblia? Kamong mga magsasaysay, nasayod kamo kung asa kadto naggikan. Gikan sa Roma, kon diin kini eksaktong nagsugod, didto sila nagsugod sa pagdawat og mga dogma.

250 Ingon niana sila ni Irenaeus, San Martin, Polycarp, tanan sila . . . human sa pagkamatay ni Juan. Tungod sa paghubad sa Pulong sa Dios, nahiadto siya sa isla sa Patmos. Giprito nila siya sa mantika sulod sa baynte-kuwatro ka oras, pero gipabalik ra, ug gisulat gihapon niya ang Biblia. Ingon nga nagtinguha man ang Dios nga masulat gyud kining Biblia. Mao kana ang Pulong sa Dios. Dili kita puedeng magtaktak gikan Niini o magdugang ngadto Niini. Kinahanglan magpabilin Kini sumala sa kung unsa gayud Kini, ang Pulong.

251 Matikdi sa dihang mibalik sila, kaniadtong gipaningkamotan niining mga balaan sa Dios nga barugan ang Pulong, miabot dayon ang Roma, ug nagdawat og mga dogma, hinoon. Karon tan-awon nato kung unsay gibuhat niya, ang pipila sa iyang mini nga mga doktrina, og kung unsay gibuhat niya.

252 Sa bautismo sa tubig. Kon diin sila gikasugo . . . miingon si Pedro, niadtong Adlaw sa Pentecostes, ilalum sa gahum sa Espiritu Santo, sa Pulong sa Dios, "Maghinulsol kamo, ang matag usa kaninyo, ug magpabautismo sa Ngalan ni Jesus Cristo alang sa kapasayloan sa inyong mga sala."

253 Unsa man ang gibuhat sa Roma bahin niini? Giusab kini, ug miingon, "Magpabautismo kamo sa ngalan sa 'Amahan, Anak, Espiritu Santo,'" gihimo kining usa ka kredo, dili usa ka Doktrina sa Biblia. Unsa ma'y gibuhat niya? Niadtong maong lukton, nga nagakaon. "Pagwisik-wisik," imbis nga pagtuslob, "sa ngalan sa Amahan . . ."

254 Ang "Amahan, Anak, Espiritu Santo" dili man ngalan. Wala gyu'y ingon-anang butang. Ang "Amahan" dili usa ka ngalan, ang "Anak" dili usa ka ngalan, ug ang "Espiritu Santo" dili pud usa ka ngalan.

255 Kaniadtong miingon si Jesus, "Bautismohi sila sa Ngalan sa Amahan, Anak, Espiritu Santo," kadto mao, "ang Ginoong Jesus Cristo." Eksakto mismo sa gibuhat nila ni Pedro, ug sa tanan, sa tanan sa Biblia, kaniadto. Walay si kinsa man . . .

256 Ginahagit ko ang si kinsa man nga dalhon kanako ang usa ka bahin sa Kasulatan, o kaha usa ka bahin sa kasaysayan, diin aduna ba'y gikabautismohan sa unsa mang paagi gawas sa Ngalan ni "Jesus Cristo," hangtud nga miabot ang iglesiang Katoliko. Buhata n'yo kana. Ug hinumdumi, nga kini nga

teyp nagakadangat sa tibuok kalibutan. Uh-huh. Ngani akong gipahilum ang kongregasyon sa mga ministro, gatusan kanila, ug mga obispo ug tanan na, miingon ko, “Motindog kamo o moduol dinhi dala ang inyong Biblia o kaha maghilum na lang mo hangtud sa kahangturan.” Manghilum bitaw sila hangtud nga atua na usab sila sa likod mo, ug mosugod na usab silang magistoryahanay mahitungod kanimong; nga mga wala’y igong kaisog aron atubangan ka, o igong kaligdong nga motindog ug mosulti sa imong atubangan mismo. Nangahadlok sila nga buhaton kini. Tungod nasayod man sila nga sayup gyud kana. Apan mao kana ang gisugdan sa lukton, kita n’yo, nga ginakaon kanang tinuod nga Butang.

²⁵⁷ Karon, moingon mo, “Dili man kana mahinungdanon. Oo. Okey lang kon sa unsa mang paagi ako nabautismohan.” Mao ba? [Nagaingon ang kongregasyon, “Dili.”—Ed.]

²⁵⁸ Miingon si Pablo, Mga Buhat 19, kaniadtong, “Siya, si Pablo, milatas sa kayutaan ibabaw sa Efeso.” Miingon ang Biblia, “Nahibalag niya ang pipila ka mga tinun-an.” Mga sumusunod sila mismo. Si Apollos, nga usa ka Baptist nga magwawali, ilalum ni Juan Bautista, mao’y nagatudlo kanila sa Pulong. Ug daku kaayo ang ilang kalipay. Ug miadto lang didto si Pablo aron duawon sila, ug miingon siya, “Nadawat na ba ninyo ang Espiritu Santo sukad nga mitoo kamo?”

“Oh,” ingon sila, “Usa ako ka magtotoo.”

²⁵⁹ “Pero dili man kana ang ginapangutana ko. Nadawat na ba ninyo ang Espiritu Santo sukad nga mitoo kamo?”

Ingon sila, “Wala man gani kami mahibalo nga aduna diay Espiritu Santo.”

²⁶⁰ Ingon niya, “Kung ingon-ana sa unsa diay kamo gikabaustismohan?” Kita n’yo? Sa ubang pagkasulti, “Giunsa diay kamo pagbautismo?”

Ingon sila, “Gibautismohan na kami.”

Miingon, “Sa unsa mang paagi?”

²⁶¹ Miingon ang tinun-an, “Kang Juan,” ingon niya, “ang mao ra nga lalaki nga nagbautismo kang Jesus. Dili ba husto na kadto?”

²⁶² Miingon si Pablo, “Dili. Dili na karon. Dili.” Miingon, “Mao nga kinahanglan ninyong mabautismohan, pag-usab.” Ug gibautismohan sila ni Pablo, pag-usab, sa Ngalan sa Ginoong Jesus Cristo. Gipandong ang iyang mga kamot ngadto kanila, ug mikunsad kanila ang Espiritu Santo.

²⁶³ Ug miingon si Pablo, “Kung ang usa ka Manulonda nga gikan sa Langit,” unsa pa kaha ang usa ka magwawali; “kung ang usa ka Manulonda,” unsa pa kaha kining lukton, uh-huh; “kung ang usa ka Manulonda nga gikan sa Langit magawali og ubang butang gawas *Nimi*, diha kaninyo, ipatunglo siya.” Tinuod kana.

264 Busa nahibaloan na ninyo kung unsa kining, gikaon sa lukton. Gikaon niini ang bautismo sa tubig sa Ngalan ni Jesus Cristo.

265 Ang sunod nga butang nga gibuhath sa lukton, gitaktak niini ang bautismo sa Espiritu Santo. Tungod kay, sa diha nga anaa kaninyo ang Espiritu Santo, Kini man ang magahatag og kahayag diha nianang Pulong, sa diha nga buhaton ninyo kana. Busa kinahanglan nila nga—nga buhaton kini sa lahi nga paagi.

266 Karon, hunahunaa na lang ninyo kung unsa kadaghang mga Lutheran, mga Protestante, kung unsa kadaghang mga Katoliko, niining buntaga, ang nakumpirma na, sa ginatawag nilang, pagdawat sa unang komunyon. Ug ginatawag nila kana nga “Balaang Eukarista,” nga nagakahulogan og, usa ka pulong nga Latin, “Espiritu Santo.” Nakakita na ba mo og Katoliko nga milabay sa simbahan ug miduko siya nga nakaingon *niana*? Ngano man? “Tungod kono sa Dios nga anaa sa sulod niadto nga simbahan.” Unsa man ang Dios? “Kadto konong gamay nga tinapay.” Kanang gamay’ng tinapay, nga lingin, nga gihimong sama sa dios-nga-adlaw nga ilang ginasimba, nga anaa dinha sa altar kon diin ang mga ilaga ug mga uk-ok nanagtapok, sa tibuok gabii. Dili kana ang akong Dios, sultihan ko kamo niana. “Unang komunyon, ingon nga nakumpirma na sa simbahan.” Binuang.

267 Pero mao kana’y gibuhath nila. Mao kana’y gibuhath sa lukton. Gitaktak niini ang Espiritu ug gihatagan sila og usa ka tinapay, usa ka tinapay nga gihimo sa usa ka pari, o usa ka madre, o unsa man. Mao kana’y gibuhath nila. Tinuod gayud kana. Lakaw, og ipangutana n’yo karon. Lakaw, og baliki ninyo ang kasaysayan, ug hibaloa kung dili ba kini tinuod. Ug unya mosugot lang ba kamo nga ipatulon kana nga butang sa inyo? Dili lang silang mga Katoliko, kondili kamong mga Protestante, daghan sa inyo, ingon niana usab. Oo. Ingon-ana ang gibuhath nila. Buweno.

268 Ug dayon ang Protestante, imbis nga maangkon ang Espiritu Santo, kabalo ba mo kung unsay ginabuhath nila? Nagapanambong sila ug nagapamiyembro, nagapakiglamano. Wala ma’y si bisan kinsa nga miabot didto sa dalan ug nakiglamano, kaniadtong miabot ang Adlaw sa Pentecostes. “Kondili may miabot gikan sa Langit nga dahunog sa usa ka nagahaguros nga makusog nga Hangin, nga gipuno ang tibuok balay diin didto sila nanaglingkod,” tinuod kana, mikunsad sa mga dahon sa mga kahoy, og gibubo didto sa panit sa kahoy. Tinuod kana.

269 Karon, karon, imbis nga sa bag-ong Pagkahimugso nga giingon ni Jesus, nga ang tawo gikinanglan nga matawo pag-usab, gipili nilang iaplikar ang pagpamiyembro sa ilang iglesia, “Anhi mo ug magpamiyembro.” Imbis nga ang Pulong, ang gihatag kanila sa ulod nga hantatawo mao ang usa ka kredo. Dili ba ninyo makita? Ania ang ginabuhath niya. Nagahatag siya

og usa ka natural baylo sa usa ka espirituwal. Makita ba ninyo kini?

²⁷⁰ Karon ania. Karon, kita, kita’y—nagahisgot kita dinhi mahitungod sa pamaagi sa Katoliko, pero kabalo ba mo nga miabot na kana usab dinha mismo sa mga Protestante? Asa ba kita nagkaaduna og mga pagpadayag sa Espiritu Santo diha sa mga iglesiang Protestante karon? Asa ba kita nagkaaduna og reaksyong Pentecostal sa taliwala sa mga Protestante? Wala kita niana. Aduna ba kamo niana sa Lutheran? Kung aduna man, nan gusto kong moadto didto. Gusto kong moadto didto ug mokaon gayud ug magkaaduna og maanindot nga kahigayonan. Sa Presbyterian? Asa—asa—asa na kana? Kita n’yo? Nagdawat man gud kamo og usa ka butang nga natural.

²⁷¹ Hapit na man kong molarga, ug nasayod kamo niana. Kita n’yo? Ayaw gayud ninyo itugot nga mawagtang Kini sa inyong kasingkasing.

²⁷² Ayaw ninyo pilia ang natural. Kamatayon kana. Kining natural nga tawo mao’y kamatayon. Ang unsa mang butang nga ginabuhat niini, kamatayon. Kini’y napailalum ug ania dinhi para sa kamatayon. “Ang Espiritu ang nagapabuhi,” kita n’yo, ang Espiritu nga nagahatag og Kinabuhi, ginabuhi kini. Kini’y usa ka Espiritu.

²⁷³ Busa, nakita n’yo, ilang giusab... Matikdi kung unsay gibuhat nila. Giusab ang bautismo sa tubig, gikan sa “Jesus Cristo,” ngadto sa “Amahan, Anak, Espiritu Santo,” usa ka titulo, nga dili gayud Ngalan.

²⁷⁴ Karon, moingon mo, “Unsa ma’y kalahian niana?” Bueno. Ania, kung maghatag kamo...

²⁷⁵ Kon adunay mohatag kanimo sa imong suweldo nga naka-tseke, sa Sabado, ang—ang—ang tawo nga pagasuweldo kanimo. Imbis nga isulat niya ang iyang ngalan dinha, ang isulat lang, “Gikan—gikan ‘Sa agalon.’” Mao kana ang... Ang imong suweldo nga naka-tseke, ingon-ani lang, “Bayaran si John Doe, og usa ka gatus ug singkwenta ka dolyares, para sa trabaho niining semanaha. Gikan, ‘Sa agalon.’” Ideposito gani kana, sa bangko, ug tan-awa ibalik gyud kana. Oo. Oo. Oo, sir. Ibalik gayud. Sigurado.

²⁷⁶ Kung wala kana’y kalahian, nan nganong gisugo man ni Pablo silang mga Cristohanon, nga nanagdayeg sa Dios ug daku kaayo ang kalipay, tungod sa pagkaangkon sa mga mahimayaong butang nga nagakahitabo kaniadto didto, ngano man nga gisultihan niya sila, “Kinahanglan ninyong mobalik ug magpabautismo, pag-usab, sa Ngalan ni Jesus Cristo”? Kita n’yo? Dawata n’yo ang Pulong, moingon, magpabilin lamang Niini. Ayaw gyud mo pagsulti og unsa mang butang nga lahi. Isulti lang kung unsay ginaingon Niini. Kita n’yo? Tungod pagahukman baya kita sumala niana.

277 Karon matikdi. Ingon niadto ang gibuhat nila. Imbis nga bag-ong Pagkahimugso, ang anaa kanila usa hinoon ka pagpamiyembro. Imbis nga dawaton ang Pulong, kredo ang gidawat nila. Ipakita n'yo kanako sa Biblia kon diin ba may gisulti sila kaniadto nga usa ka "Maghimaya ka Maria." Ipakita n'yo kanako sa Biblia kon diin n'yo gikutlo ang Kredo sa mga Apostoles kamong mga Protestante. Isulti n'yo kanako kung unsa ang Kredo sa mga Apostoles, sa Biblia, "Panag-ambit kono sa mga santos." Batok man sila niana kaniadto. Isulti n'yo kanako sa Biblia kon diin ba sila nagkaaduna og "Amahan, Anak, ug Espiritu Santo" nga bautismo. Wala gyud kana dinha. Ug bisan pa niana inyo gihapong ginadawat kana. Huh?

278 Bueno, karon, imbis nga pagpakig-fellowship ug pagkamanagsoon sa taliwala sa mga kaigsoonan, gihatagan nila sila og usa ka herarkiya, papa. Ug mao nga aduna kamo'y obispo, nga mao'y nagasulti sa inyo kung unsa ang puede n'yo nga buhaton ug kung unsa ang dili n'yo puedeng buhaton. Ug kamong mga Pentecostal aduna pu'y pang-distrito nga presbiterio nga mao'y nagasulti sa inyo kung kinsa ang mahimo ninyong dawaton. Apan ang Iglesia aduna mismo og Cristo. Kita n'yo?

279 Dinha kamo nahidangat. Kita n'yo? Gitanyagan nila kamo og ingon-anang mga dogma ug mga butang nga hinimo-sa-tawo, og, gitaktak Kini. Unsa ma'y gibuhat nianang lukton? Gitaktak Kini mismo gikan sa Punoan, ug gitanyag sa inyo *kini*. "Taktakon ko kana gikan sa Punoan, ug hatagan ko kamo *niini*, hinoon. Taktakon ko *Kana*, ug hatagan ko kamo *niini*." Kita n'yo kung asa na kamo nahidangat?

Moingon mo, "Bueno, Igsoong Branham!"

280 Asa ba ang matag usa, asa ba ang matag iglesiang Protestante, naggikan? Sa Katoliko. Mao kana ang gisulti sa Pinadayag 13, o Pinadayag 17, bahin kaniya. Ang ingon, "Usa siya ka bigaon, ug siya mao ang *inahan sa mga bigaon*," mao ra mismo. Busa ayaw. . . Dili mahimong tawgon sa kaldero nga maitum ang takuri, kabalo na mo, busa ayaw gayud. Igo lang kanang. . . Ayaw n'yo buhata. Bueno, kana, husto kana.

281 Pagkamanagsoon; gitangtang ang pagkamanagsoon. Sa dihang, angay man kita nga mahimong mga mag-igsoon, sa usa'g usa. Kini man gud ang nagpabulag-bulag kanato ug nahimo kitang lahi. Oo.

282 Karon matikdi, ania ang usa nga maayo, hisgotan ko lang kini, ug pagkahuman mohunong na ko sa niining uban pa.

283 Ania, nagaingon kanato ang Biblia, nga pag nakabuhat kita og sayup, kinahanglan natong limpyohan ang atong mga kalag pinaagi sa Balaang Espiritu. Moluhod kita, og tugotan ang Balaang Espiritu nga ipadayag kanato nga sayup ang ginabuhat

nato, ug magpabilin dinha sa Iyang atubangan hangtud nga bug-os kang mamatay, nga ginalimpyohan ang atong mga kalag.

²⁸⁴ Pero karon, mingtipas na sila, og purgatoryo ang gihatag kaninyo. Pagkahuman ninyong mamatay, nan makapanguwarta gyud og daghan ang pari, sa pagpang-ampo nga makagawas kamo sa purgatoryo. Aba, binuang kana! Ingon-ana ang gibuhat sa lukton. Sigurado. “Tampo ka nga makagawas sa purgatoryo. Magkantidad og *ingon-ka-daghang* gatusan ka dolyares para iampo kini nga kalag nga makagawas sa purgatoryo.” Gusto kong pangitaon ninyo ang “purgatoryo” diha sa Biblia, ang unsa man nga sama niana. Wala gayu’y ingon-anang butang sa Biblia. Wala, sir. Pero gitanyagan nila sila og purgatoryo, kita n’yo, sila, pagkahuman nilang mamatay. Oh, oo, nasayod ako.

²⁸⁵ Sila—sila—moingon sila, “Tinuod!” Madungog ninyo sila nga moingon, “Bueno, gisulti man ni San Boniface ang *ingon niini-ug-ingon niana*.” Dili ko igsapayan kung unsay gisulti ni San Boniface. “Bueno, dili ba miingon si *Ingon niini-ug-ingon niana* nga siya, nag-ampo siya para sa iyang bana, kadtong halangdong igsoong babaye, nga si Santa *Ingon niini-ug-ingon niana*?” Dili ko igsapayan kung unsa ma’y gibuhat niya.

²⁸⁶ Kana maoy pulong nga dili awtorisado. Batok kana sa may awtoridad nga mga apostoles. Ngani gihatag man sa Dios kadto nga mga apostoles, aron ipahimutang ang Iglesia sa kahan-ayan, ug natukod Kini ibabaw sa Doktrina sa mga apostoles, dili sa kang San Boniface o sa kung kinsa nga santo. Kana’y sukwahi gayud sa Pulong. Dili ko igsapayan kung unsay gisulti ni San Boniface, ug kung unsa ma’y gisulti sa uban pa nga mga santo, ug uban pang mga santo, ug ni Santa Susie, ug ni Santa Maria, ug tanan niadto. Binuang kana. Pareho ra kana sa bakak. Kung sukwahi kana sa Pulong sa Dios, nan bakak kana. Wala ako nagatoo sa mga pulong nga walay-awtoridad.

²⁸⁷ Mao kana’y hinungdan nga wala ako nagatoo sa niining mga kredro sa Protestante ug mga ingon-anang butang. Iyaha kana sa Katoliko sa—sa kinauyokan gayud. Mga dogma kana. Sa unsa mang hinungdan nga tawgon ninyo ang mga Katoliko, ug biaybiayan sila sa pagbaton og mga dogma, sa dihang kamo usab puno man kaayo niini, mismo? Wala gyu’y ingon niana dinhi, pero naka-teyp man kini, nasabtan ninyo, kita n’yo, nagakadangat kini sa tibuk kalibutan. Matikdi. Unsaon man ninyo pagtawag kanila nga sayup sila, sa dihang nagadawat man pud kamo og mga kredro nga hinimo-sa-tawo nga sukwahi sa Biblia, og dogma, sama ra mismo sa gibuhat nila? Ngano man? Tungod anaa man kamo sa usa ka organisasyon nga anak nga babaye sa maong tigulang nga bigaon. Unsa ba ang usa ka bigaon? Usa ka babaye nga nagkinabuhing dili-matinuoron sa iyang bana. Nagapamahayag nga usa ka Cristohanong iglesia, pero nagapanudlo og sayup nga doktrina, iyahang kaugalingong doktrina, imbis nga dawaton ang Balaang Pulong sa Dios.

288 Sama lang sa gibuhay ni Eva kaniadto, naminaw sa—sa yawa, ug naghinungdan sa tanang kamatayan ug kasub-anan nga miabot sa yuta. Miabot kana tungod ni Eva, tungod kay nakahimo siya og espirituhanong pagpanapaw batok sa Dios, pinaagi sa dili-pagtoo sa Iyang Pulong.

289 Ug eksaktong ingon niana gayud ang ginabuhay sa mga iglesia karon, espirituhanong nagapanapaw batok sa Dios. Ug dili gani ka nila dapiton sa iglesia kung wala ka nagauyon sa ilang doktrina.

290 Bueno, ila kong gipadalhan og mga sulat, “Kung motoo ka sa *ingon niini*, ug kung imong isulti nga husto *kini*, ug imong. . .”

291 Miingon ko, “Dili na lang ko moadto.” Dili, sir. Igawali ko kung unsa lang ang ginasulti niining Biblia, o dili na lang gyud mowali. Kita n’yo? Husto kana.

292 Magpabilin gyud sa Pulong. Mao kana’y kinahanglan natong buhaton, mga igsoon. Magpabilin dinha. Karon nagapaingon na kita sa kaulahiing mga adlaw, ug nasayod kita niana. Ania na ang maong takna.

293 Mahimo gyud natong isulti! Oh, ginasulti nila ang *ingon niini*, *ingon niana*, ug ang *uban pa*. Apan ang unsa mang butang nga walay awtoridad, ayaw n’yo toohi kana. Dili ko igsapayan kung kinsa ang nagsulti niana. Kung si kinsa pa man!

Dinhi, miduol kanako ang usa ka igsoong babaye, dili pa lang dugay. Ug miingon. . .

294 May usa—usa ka grupo sa mga kalalakian nga akong giwalihan, mga ministro, mahitungod sa bautismo sa Ngalan ni Jesus Cristo, kon diin tulo ka gatus kapin, nga mga ministro. . . Daghang mga tawo nga ania karon ang atua niadto sa maong panagtigum, kon diin mitagbo kanako ang tibuok konseho sa Chicago Ministerial Association. Gihatagan ako sa Ginoo og usa ka panan-awon, gisulti kanako kung asa sila mapahimutang ug kung unsay mahitabo. Ug miadto ko didto mismo, ug gisulti kadto. Aduna kita dinhi og teyp niadto kung gusto ninyong madungog kini. Kita n’yo? Ug ako. . . Tanang mga obispo, ug mga doktor, ug mga kardinal, ug silang tanan, atua nga nanglingkod didto.

295 Miingon ko, “Ang si kinsa man sa inyo nga makakondena niini, kuhaa ang inyong Biblia ug duol dinhi.” Miingon ko, “Nganong hilum man kaayo mo?” Ug wala gyu’y si kinsa man ang misulti og bisan unsa. Ug ngano man? Kita n’yo, nangahadlok man sila nianang Pulong. Miingon ko, “Kung ingon-ana, kung dili man diay ninyo mahimo, nan nganong ginasaway man ko ninyo? Maghilum lang unta kamo. Pagsangyaw mo, pagbuhay og usa ka butang. Ug kung dili ninyo mapamatud-an kana sa Pulong, nan magpabilin na lang mo nga hilum.”

296 Ug, pagkahuman, kadtong mao ra nga grupo sa mga kalalakin-an nagpaadto og usa ka babaye didto, miingon, “Igsoong Branham, kung gisulti kanimo sa Manulonda sa Ginoo.” Ang Manulonda sa Ginoo, kabalo na mo, ang Iyang—Iyang hulagway anaa gani dinha, nakita n’yo. “Kung gisulti Kadto sa imoha sa Manulonda sa Ginoo, bueno, toohan namo Kadto.”

297 Ingon ko, “Ang si kinsa man, nga usa ka grupo sa mga ministro nga ingon niana ka mahuyang, ‘Kung misulti ang Manulonda sa Ginoo.’ Unya kung kana nga Manulonda nagsulti og unsa mang butang nga sukwahi niining Pulong, nan dili kana Manulonda sa Ginoo.”

298 Hinoon pagapanghimatud-an man gyud sa Manulonda sa Ginoo ang Pulong. Ingon niana mismo sa una pa ang gibuhat Niya sa matag kapanahonan. Mao ra usab gihapon ang ginabuhat Niya. Nagapabilin Siya sa Pulong. Ug ang si kinsa mang ministro nga dinihogan sa Espiritu Santo magapabilin mismo sa mao ra nga Pulong, kay miingon ang Biblia nga ang tibuok Biblia gisulat man sa Espiritu Santo.

299 Ug unsaon man ninyo pagkaaduna og Espiritu Santo ug unya ipanghimakak kung unsa ang ginasulti sa Biblia? Ang espiritu mismo nga anaa kaninyo, nagapamatuod nga dili kana husto. Kita n’yo? Dugay nang nagakaon ang lukton, mao gyud, uh-uh, ginakaon ang tinuod nga mga butang sa Dios. Oo, sir. Ang pulong nga walay awtoridad sukwahi gayud sa Doktrina sa mga apostoles. Oh, my!

300 Kini mao ang apostolikanhong Doktrina. Kini mao ang Biblia. Kini mao ang Balaang Espiritu. Ang matag Pulong Niini mao’y tinuod. Toohi lang ninyo ug dawata Kini, ug ayaw gyud kamo pagtaktak gikan niini, ug tan-awa nga mamatuman gayud ang matag saad, ingon nga ang kapadayagan sa Dios ania mismo karon.

301 Kung dili Siya mao gihapon nga Dios sa karon maingon sa kung unsa Siya kaniadtong mitabok ang mga anak sa Israel sa Dagat nga Mapula, nan dili Siya Dios. Kung dili Siya ang mao ra nga Dios nga mikunsad niadtong Pentecostes nga Mao’y ania karon, mismo, nan dili Siya ang mao ra nga Dios. Kung ingon-ana, walay pagkabanhaw, kung dili Siya ingon niana, kung Siya . . . Oh, unsa ma’y kaayohan nga mahimo kanimo sa usa ka Dios sa kasaysayan, kung dili Siya ang mao gihapon nga Dios sa karong panahon? Kita n’yo? Unsa ma’y kaayohan nga mahimo sa pagpadala og mga magwawali ngadto sa mga seminaryo, ug ginapusa sila sama sa usa ka manok nga anaa sa incubator, ug mangsangyaw nga ingon niana, kung walay usa ka Dios?

302 Unsa ma’y ginabuhat ninyo, ginataktak ang Pulong sa Dios? Asa man ang inyong awtoridad? Moingon mo, “Ang iglesia.” Ang iglesia, aduna ma’y nuebe ka gatus ug saisenta’y-nuebe ka

nagkalainlaing mga organisasyon sa mga niini. Kinsa ba kanila ang husto? Wala na'y nahibalo kung unsay buhaton. Malibog kamo. Husto. Mao nga dili pagahukman sa Dios ang mga tawo pinaagi sa iglesia.

³⁰³ Kondili pagahukman Niya sila pinaagi ni Cristo, ug si Cristo mao ang Pulong. Miingon ang Biblia, "Sa sinugdan mao na ang Pulong, ug ang Pulong kauban sa Dios, ug ang Pulong mao ang Dios. Ug ang Pulong nahimong unod, ug mipuyo ipon kanato." Pagahukman Niya ang iglesia ug ang mga tawo pinaagi sa Pulong, husto, sa buhi, nabanhaw nga Pulong.

³⁰⁴ Dayon kung kanang buhing, nabanhaw nga pulong magasulti og unsa mang butang nga sukwahi niining Pulong *dinhi*, kung ingon-ana dili kana ang mibangon, nabanhaw nga pulong. Tungod kay, Kini, magapamatuod man Kini sa niini nga Kamatuoran. Dili Siya mahimong mosulti og usa ka butang *dinhi*, ug lahi na pud nga butang *dinhi*.

³⁰⁵ Mahimo kong mosulti og usa ka butang *dinhi*, ug usa ka butang na pud *dinha*, tungod kay usa ra ako ka tawo. Kamo man, usab. Mahimo n'yong magkaaduna pa og dugang kahibalo ug pagsabot.

³⁰⁶ Apan, dili ang Dios; ingon nga Siya wala ma'y kinutoban. Kita n'yo? Siya adunay . . . Ang unang desisyon, ang Iyang unang butang nga isulti Niya, siguradong magapabilin gayud sa Walay Katapusan. Kini'y mao sa gihapon. Dili Siya mahimong magsulti og usa ka butang *dinhi*, ug usa ka butang na pud *dinhi*. Kinahanglan Niyang isulti ang mao gihapong butang sa tanang higayon, aron nga mamahimong Dios.

³⁰⁷ Busa kung ang Espiritu nga anaa kaninyo, mao'y sa Dios, nan magapamatuod kana nga *kini* nga Pulong mao ang Kamatuoran, ang matag Pulong Niini. Ug Kini mao sa gihapon kagahapon, karon, ug hangtud sa kahangturan. Mao kana'y ginaingon sa Biblia. Oo, sir. Bueno.

Karon, dalion na nato ug hisgotan na ang sunod nga hugna niining gamay'ng insekto.

³⁰⁸ Una, usa siya ka ulod nga dangaw-dangaw. Unsa ma'y gikaon niya gikan sa Kahoy sa Dios? Bunga.

³⁰⁹ Ang sunod nga hugna nga iyang gisudlan; namatay siya diha niana nga hugna, ug mipaingon sa lahi na pud nga hugna. Unsa na ma'y gibuhat niya karon? Miabot siya niining higayona ingon nga usa ka dulon. Gikaon niya ang tanang mga dahon. Ingon niana ang gawi sa dulon.

³¹⁰ Karon, unsa ma'y sunod nga gibuhat niya? Mibalik siya sa lahi na nga hugna, ingon nga usa na ka lukton, ug misulod siya sa panit sa kahoy.

³¹¹ Karon, ania siya nagaabot ingon nga usa ka du- . . . ingon nga usa ka ulod nga hantatawo, ang iyang ikaupat nga hugna,

karon ingon nga usa na ka ulod nga hantatawo. Unsa ba ang ulod nga hantatawo? Usa kini ka manunupsop; ginasupsop ang Kinabuhi, ang Espiritu, ang Kinabuhi. Ingon-ana ang ginabuhat niya, mosulod dinha, motaput sa unod sa kahoy, ug hinay-hinay nga manupsop. Ulod nga hantatawo, ania siya. Unsa ma'y itawag nato sa iyaha? Denominasyon. Mao kana ang husto nga ngalan niana nga insekto. Ngano man? Usa siya ka tigpamatay; ginasupsop ang Kinabuhi.

³¹² Sa matag higayon nga magpadala ang Dios og usa ka pagpamuhat sa taliwala sa Iyang mga katawhan, sa matag higayon, ug unya maghimo sila og denominasyon, dinha mismo sila mamatay. Gusto ko og tawo nga nasayod sa kasaysayan sa iglesia, ang mopanghimakak niana. Ipakita n'yo kanako kon may usa ba ka organisasyon nga naorganisa, nga wala namatay dihadiha mismo. Pagkakaon niini sa lukton, gikuha ang relihiyon niini. Ug pagkahuman miabot ang manunupsop ug gikuha ang . . . gisupsop ang Kinabuhi gikan mismo sa maong Punoan.

³¹³ Unsa ba nga matang sa Kinabuhi ang anaa sa sulod Niini? Balaang Espiritu. Unsa ma'y gibuhat niini? Dili niini mapapabilin ang Balaang Espiritu dinha ug unya magkaaduna gihapon og mga dogma. Dili gayud kana mapahanugotan sa Balaang Espiritu. Busa ginakuha niini ang Balaan, ang Kinabuhi pagawas sa Punoan, ug ginahatagan kini og usa ka dogma, nagahimo og usa ka denominasyon. “Dili namo igsapayan kung unsa ang ginaingon Niini. Ang ginasulti sa among denominasyon *ingon-ani* man.” Mao kana. Hinumdumi, human nga mahimo kining denominasyon, nagakamatay kini sa kanunay, ug dili na gyud makabangon pag-usab.

³¹⁴ Ang unang organisasyon mao ang Katoliko; namatay kini sa gilayon. Siyempre, kana mao'y dogma, sa sugod pa lang.

³¹⁵ Gikan didto miabot ang unang repormasyon, si Luther, nag-organisa ug namatay.

Sunod miabot si Wesley; nag-organisa, namatay.

Sunod miabot ang Pentecostal; nag-organisa ug namatay.

³¹⁶ Ang Presbyterian, Lutheran, kining tanang uban pa, ug ang—ug ang Nazarene, Pilgrim Holiness, ug tanan niining mga organisasyon nga misunod sama niana mismo, ang matag usa namatay gayud. Tan-awa n'yo sila. Ngano man? Tungod nag-organisa sila, ug kana ang nagapatay kanila. Unsa ma'y gibuhat nila? Nanagdawat sila niining mga dogma.

³¹⁷ Kamong mga Nazarene, nga usa ka maanindot, nga iglesia nga gisundan sa—sa nagaabot nga Pentecostal. Unsa man kadto? Nagatoo kamo sa pagpabalaan, apan paghisgotan na ang bahin sa mga gasa sa Espiritu, pagsulti og laing mga pinulongan ug ang mga dakung gahum sa Dios, gitawag n'yo Kining “mga yawa,” ug dinha kamo namatay. Husto kana. Asa na ba siya karon? Patay

na. Oh, mas daghan na lagi siya'g mga miyembro, pero asa na man siya? Siya'y usa na ka patay'ng lawas.

³¹⁸ Nakita ko siya, niadtong miaging gabii, tinuod, ang maong tibuok butang. Ang ilang pastor, nakapatong, ginahalokan ang usa ka patay'ng lawas, nagapakighilawas niini. Ang ingon, "Wala na man gyu'y panahon, hinoon. Mao na lang kini." Bueno, ipahayag ko kini sa inyo, sa teyp, sa ubang higayon. Kita n'yo? Bueno.

³¹⁹ Gitanum sa Dios ang Iyang Punoan, aron mamunga og espirituhanon nga bunga, mga bunga sa Espiritu. Husto ba? Apan unsa ma'y gibuhat sa tawo? Sa una pa ginapaningkamotan na sa tawo nga himoon Kining usa ka artipisyal nga porma. Ang gibuhat niya, kaniadto; ginabuhat pud niya karon. Bueno, kini, hisgotan nato og ayo karon, sa ingon kapasas. Sa una pa gyud gipaningkamotan na sa tawo nga pulihan ang espirituwal nga Iglesia ug himoon kining usa ka artipisyal nga porma.

³²⁰ Nagkaaduna si Luther og usa ka espirituwal nga Iglesia kaniadto. Unsa ma'y nahitabo? Sa pagkamatay ni Luther, gihimo nila kining usa ka pormang, artipisyal.

³²¹ Unsa ma'y gibuhat ni Wesley? Si John Wesley, nga usa ka halangdong tawo sa Dios! Si kinsa man ang makasulti nga si John Wesley dili usa ka tawo sa Dios? Unsa ma'y gibuhat niya? Sa pagkamatay niya ug ni Juan ug ni Charles, giorganisa nila kini. Sa dihang naorganisa siya, namatay siya. Eksakto.

³²² Mao ra kini sa gihapon sa tanang nangaging kapanahonan, sa matag higayon, sa matag usa. Nagapakaaron-ingnon lang sila, may maayong mga buhat, pinakadaku nga kongregasyon, pinaka-utokan nga mga tawo. "Ang ilado nga mga tawo sa siyudad gustong magpamiyembro kanamo."

³²³ Eksaktong ingon niana usab ang nahitabo kaninyo nga grupo sa mga Pentecostal. Eksakto gayud. Kamo—gipaubos na ninyo ang sukaranan. Mipahilayo na kamo sa Espiritu. Nagtinguha kamo og dagkung mga bilding, ug magarbo nga mga pagdayandayan, ug tanan nang sama niana, ug aduna kamo'y dungganon nga mga pastor. Unsay gibuhat ninyo? Kamong mga inahan ginapaeskwela n'yo ang inyong mga batang lalaki sa pipila niining mga seminaryo dinhi, aron mahimong mga pastor. Unsa ma'y ilang gipangtudlo kanila? Teolohiya ug tanan nang matang sa mga butang nga hinimo-sa-tawo. Ug asa na kini karon? Mibalik sila, nga usa na ka pundok sa mga Ricky ug mga Elvis. Tinuod gayud kana. Unsa ma'y anaa sa inyo karon? Usa ra ka pundok sa mga kabuang, "Dagway ra sa pagkadiosnon."

³²⁴ Miingon ang Biblia, "Sa kaulahiing mga adlaw magkaaduna sila og dagway sa pagkadiosnon, apan ipanghimakak ang Gahum niini, ang Kinabuhi niini." Ngano man? Gisupsop na Kini sa ulod nga hantatawo. Husto. Gikuha na Kini sa organisasyon. Unang Timoteo 3, ang ingon ni Pablo,

“Mahibaloan mo kini, nga sa kaulahi-ang mga adlaw, moabot ang mga malisud nga panahon. Ang mga tawo unya magamahigugmaon sa ilang kaugalingon, hambogiro, mga tigpagawal, mga tampalasan, masukihon, dili-mapasalamaton, dili-balaan, walay pagbati sa paghigugma, mapatuyangon, dili mahigugmaon sa maayo, mabudhion, hambogiro, adunay dagway sa pagkadiosnon, ug ipanghimakak ang Gahum niini.” Gisupsop kana sa ulod nga hantatawo. Nakasulod niana ang lukton, dugay na nga panahon. Ipahayag namo sa inyo kana nga Kahoy, ang kinatibuk-an, sa dili na madugay, kon itugot sa Ginoo.

³²⁵ “Ang pinakadakung lugar.” Oh, lagi. “Buena, kabalo mo, nakatigum gyud og daku ang among iglesia niadtong miaging tuig.” Oh, sigurado.

³²⁶ Nalabwan ra kamo sa Katoliko og usa ka milyon ka milya. Sigurado gayud. Gani nakatigum gayud kini’g daku didto sa Rusya hangtud nga ila kining gipapahawa didto ug nagpahimutang na, nagtukod og komunismo. Mao sa gihapon ang gibuhat nila sa Mexico. Ug siguradong buhaton usab nila ang maong butang sa tibuok kalibutan, kon diin siya napahimutang. Tinuod kana.

³²⁷ Pero ayaw gayud kahadlok sa komunismo. Ang komunismo usa ra ka walay-Dios nga kalihokan. Apan madungog ninyo ang uban sa niining mga magwawali, nga nagatindog sa pulpito, og ginakondena ang “Komunismo! Komunismo!” Wala man sàb ko nagatoo niini. Mao nga ayaw. . . Ug sultihan ang ilang iglesia, “Oh, pagalamyon gyud kitang tanan. Ang tibuok kalibutan mamahimo na nga komunista.” Kana’y sukwahi gayud sa Pulong sa Dios. Wala ma’y bahin sa Biblia nga nagaingon nga mahitabo kana nga ingon niana.

³²⁸ Hinoon ang ginaingon sa Biblia nga ang Romanismo, ang iglesi-ang Katoliko, ang modominar sa kalibutan. Tun-i n’yo ang Daniel ug mahibaloan ninyo. Ang ulo nga bulawan, si Haring Nabucodonosor, sa gingharian sa Babilonia; ang Medes ug Persia mao’y mipuli kaniya; dayon ang Imperyo sa Gresya pud ang mipuli niana; ug ang Roma na ang nagpadayon hangtud sa katapusan. Ang maong napulo ka tudlo sa mga tiil anaa sa matag gingharian sa yuta. Ayaw kamo. . .

³²⁹ Adunay puthaw nga tabil. Adunay kawayan nga tabil. Adunay kolor purpura nga tabil. Igsoon, kamo, ayaw mo kahadlok sa uban pa niini, kondili bantayi n’yo kanang kolor purpura nga tabil.

³³⁰ Nagalingkod siya dinhi mismo sa trono, karon, sa niini nga nasud. Hinumdumi, sama lang kang Ahab kaniadto, nga si Jezabel ang nagapaluyo kaniya. Ingon-ana. . . Mao nga ginatawag sa Biblia ang iglesi-ang Katoliko nga “Jezabel; bigaon.” Ug si Ahab dili man ingon nga dautan nga tawo. Dili

puḁ nako ginaingon nga si Mr. Kennedy dili maayo nga tawo. Wala ko'y nahibaloan nga unsa man mahitungod kaniya. Usa siya ka lalaki. Kana lang ang nahibaloan ko. Siya mao ang Presidente. Nagatoo ko nga siya'y mamahimong usa ka maayo nga Presidente. Dili man siya; kondili ang kanang sistema nga nagapaluyo kaniya. Hulata lang ninyo pag hinay-hinay na kining makasulod sa gabinete, ug sa kon asa man nga mahimo niini, dayon bantayi n'yo kung unsay mahitabo. Tan-awa n'yo kung unsa ang gibuhāt niini sa uban pang mga nasud. Tan-awa kung unsa ang ginabuhāt niini sa una pa.

³³¹ Ug dili ba ginaingon sa Biblia, sa Pinadayag 13? Nga kini nga nasud mao'y mao'y trese. Aduna kini'y trese ka mga raya ug trese ka mga bitoon sa bandila. Trese ka mga raya sa bandila. Trese, ang tanan-tanan nga anaa niini trese; trese ka mga kolonya, trese ang tanan-tanan. Ug makita kini diha sa ika-13 nga kapitulo sa Pinadayag.

³³² Ug miingon ang Biblia, nga, "Migimaw siya nga mora'g usa ka gamay'ng cordero," may kagawasan sa relihiyon; "may duha ka gagmay'ng sungay," sibil ug pang-simbahan. Ug wala magdugay, naghiusa na sila, "Ug misulti siya nga sama na sa dragon, ug gibuhāt ang tanang butang nga gibuhāt sa dragon nga nauna kaniya." Ug miingon ang Biblia, "Naghimo sila ug usa ka larawan alang sa mapintas nga mananap," ang konpederasyon sa kaiglesiahan, nga mao gayud kung unsay gisudlan nila karon mismo, dinhi sa Lungsod sa New York. Ug atua kanang dakung morge didto! Ug kamong tanan nga mga Methodist, mga Baptist, ug mga Pentecostal, ug matag usa kaninyo, nga pang-ekonomiya... ekuminikanhong mga tawo dinhi, nga nagapaningkamot nga mobuhāt og ingon nianang mga butang, ug ginabaligya ang inyong pagkapanganay, aron magpasakop nianang grupo sa Babilonia. Unsa na ma'y nagakahitabo sa inyo? Sigurado. Ginabaligya n'yo ang inyong pagkapanganay, sama sa gibuhāt ni Esau kaniadto, baylo sa usa lang ka sinabawan. Mao lang gyud kana ang makuha ninyo. Kana lang.

³³³ "Nagbuhāt og usa ka larawan alang sa mapintas nga mananap." Eksakto gayud. Ayaw kamo kahadlok sa komunismo. Kahadloki ninyo hinoon ang Katolisismo. Oh, ingon Niya, "Moabot kini nga dunay mga pag-ulog-ulog, og mora'g usa ka cordero. Apan," miingon, "bantayi kini." Sa luyo niini, usa kini ka lobo. Malimbongon kini. Bantayi ninyo kini. Oo, sir. Kay, sukwahi kini sa Pulong. Ang ginaingon sa Biblia kinahanglang mamahitabo gayud.

³³⁴ Walay laing ginabuhāt ang komunismo kondili nagapanglihok lang sumala sa mga kamot sa Dios. Eksaktong ingon niana. Ug ngano mang kinahanglan nilang buhaton kana? Gikinahanglan nga tugotan sa Dios ang komunismo, aron himoon ang mga niini, ang Iyang Pulong, nga mamahitabo.

Sigurado. Kana'y . . . Naamgo ba ninyo kana? Nahunahuna n'yo ba kana? Kinahanglan nga ipahitabo sa Dios ang Iyang Pulong.

³³⁵ Ania. Adunay upat ka gatus ka mga propeta nga nanagtindog, sa atubangan, ni Ahab ug ni Josaphat, usa niadto ka adlaw. Si Josaphat, nga usa ka matarung nga tawo. Ingon niya, "Apan, sa dili pa kita motungas sa Ramoth-Gilead," miingon, "dili ba angay'ng mokonsulta úna kita sa Ginoo?"

³³⁶ Miingon si Ahab, "Oo. Siyempre." Kita n'yo? Si Jezabel baya ang nagapaluyo niadtong tanan, kabalo mo. Miingon, "Atong—atong . . . aduna man ko'y upat ka gatus ka mga propeta dinhi. Paanhion nato sila."

³³⁷ Mga maayong tawo tanan. Gipaadto sila. Nanagpropesiya silang tanan, ang ingon, "Tumungas kamo. Ang Ginoo magauban kaninyo."

³³⁸ Pero mora'g dili kadto husto, para niining diosnon nga tawo. Ang hari sa Israel, o ang hari sa Israel nga atua . . . Mora'g dili gayud kadto husto para kaniya. Miingon si Josaphat, "Aduna pa ba'y usa?"

³³⁹ "Upat ka gatus ka mga magwawali, nga nagkahiusa na, nga nagaingon, "Tumungas kamo. Ang Ginoo nagpakigsulti na kanamo ug miingon, "Tumungas kamo.""

Miingon si Josaphat, "Apan basin aduna pa'y usa unta sa kon asa man."

³⁴⁰ Miingon si Ahab, "Aduna pa ko'y usa, pero gikapungtan ko siya." Tinuod, mao gayud. Oo. Miingon pa, "Pirmi man gud siyang mamadlong kanako. Pirmi siyang nagasulti og dautan batok kanako." Unsaon man niya paghimo og unsa pa mang ubang butang, sa dihang ang Pulong sa Dios batok man sa maong hari?

³⁴¹ Busa nagpasugo sila ug gipakuha si Micheas. Miingon si Micheas, "Tumungas kamo. Oo. Husto kana. Apan nakita ko ang Israel nga nagkatibulaag, sama sa mga karnero nga walay magbalantay."

³⁴² Dayon siya, aba, miduol kadtong dakung magwawali, ang obispo, ug gisagpa siya sa baba. Miingon pa, "Hain man mipaingon ang Espiritu sa Dios sa dihang migawas Kini kanako?"

³⁴³ Dayon miingon si Micheas, "Wala man gyud kanimo, sa sugod pa lang." Ug busa—ug busa ang ingon niya, "Mahibaloan ra nimo, usa sa niining mga adlaw." Ingon niya—ingon niya—ingon niya . . .

³⁴⁴ Miingon si Ahab, "Ibalhog ninyo siya sa kinasuloran nga bilangoan. Pakan-a siya og tinapay sa kagul-anan ug sa—ug sa tubig sa kagul-anan." Miingon pa, "Sa pagbalik ko nga may kalinaw, ako na ang bahala niining tawhana."

345 Miingon si Micheas, “Kung makabalik ka pa, tungod ang Pulong sa Dios wala man magsulti kanako.” Ngano? Ngano man? Tungod anaa man siya sa Pulong, takdo mismo sa Pulong.

346 Ang unsa mang propesiya nga dili nagapabilin nianang Pulong. . . Eksaktong ingon niana. Mao kana’y hinungdan nga ginaingon ko karon; bisan unsa pa kini ka maayong tanawon, unsa man ka daghang mga ministro ang nagaingon *niini*, *niana*, o *uban pa* nga, “Ang komunismo na ang magakontrolar sa kalibutan ug magpapukan niini.” Ayaw gayud sulayi nga batokan ang komunismo. Batoki ninyo ang Romanismo. Tungod kay, kana’y MAO KINI ANG GINAINGON SA GINOO. Ang ingon sa Ginoo nga ang Romanismo mao’y mangulo, dili komunismo. Usa lang kini ka galamiton.

347 Mao nga, nakita n’yo, kinahanglan niyang buhaton kadto. Ingon nga gisultihan sa Dios si Micheas, “Kinahanglan Kong paadtoon si Ahab didto. Pasultihon kadtong mga magwawali og ingon-ana, aron mapaadto si Ahab didto, aron nga ipahitabo ang mga pulong ni Elias.”

348 Kinahanglan nga tugotan sa Dios nga motungha ang komunismo. Tungod unsa ma’y gibuhath nila? Sila ang nagapadagan sa tanan niining mga morge dinhi, ug naghimo og usa ka konpederasyon sa mga kaiglesiahan, aron magkahiusa, sa paghimo og usa ka larawan sa mapintas nga mananap, sumala gayud sa kung unsay gisulti sa Iyang Pulong nga mahitabo. Ayaw kamo’g kabalaka. Bantayi ninyo ang maong butang nga ginaporma niini. Husto kana. Hmm!

349 Akong. . . siguro nahago ko na kamo, pero. . . [Nagaingon ang kongregasyon, “Wala.”—Ed.] Pero tinuod kana. Wala ko mahibalo kung kanus-a kaha ako makapamulong pag-usab sa inyoha. Tingali’g dili na ako makapamulong pa. Wala kita mahibalo. Tingali’g dili na kita magkita-kita pag-usab, mao nga gusto kong mahibaloan gyud ninyo kung unsa ang Kamatuoran.

350 Matikdi n’yo kining Pulong. Kini mao ang Kamatuoran; dili ako. Kini nga Pulong, Kini mao Kana. Kung ang akong pulong sukwahi man *Niini*, nan ayaw ninyo ako toohi. Toohi ninyo Kana. Dayon, kung moingon mo, “Bueno, anaa kanamo Kana, ug nagawali ka nga sukwahi Niini,” kung ingon-ana katungdanan n’yo nga moduol kanako. Husto. Katungdanan ninyo nga moduol kanako. Kita n’yo? Duol lang kamo, ug tan-awon nato kung unsa gyud ang Pulong, karon.

351 Busa, karon, hingsayran nato nga kadto mao’y. . . komunismo kadto nga nagkatigum. Ang ingon sa Dios, “Ang Gog ug Magog, didto, pagatigumon,” sigurado, “aron ipahinabo ang gubat.” Tinuod gayud kana, tungod kay hiusahon man niini kini nga mga puwersa. Siguradong mahitabo kini. Miingon ang Biblia nga mahitabo kini.

Gitanum sa Dios kini nga Punoan, aron ipamunga ang Iyang espirituhanon nga bunga.

³⁵² Ug sa una pa ginapaningkamotan sa tawo nga himoon kining usa ra ka artipisyal, “Adunay dagway sa pagkadiosnon.” Ang pinakadagkung mga bilding sa siyudad, oo, minilyon ka dolyares ang kantidad! Grabe, gyud! Ug nagawali ang mga tawo nga si Jesus moabot na, pero mogasto og unom ug walo ka milyon nga dolyares sa usa ka bilding sa kon asa man. Ug samtang, ang mga misyonaryo, aduna ko’y kaila nga mga misyonaryo nga anaa sa natad sa pagpangmision, nga nagawali sa Maayong Balita, nga walay sul-ob nga sapatos, og nagakaon og duha ra ka kananan sa usa ka semana. Nakita ba ninyo kung ngano, igsoon, kita . . . Unsa na man ang nagakahitabo sa mga tawo? Mao nga wala gayud ako nagatoo nga nagatoo sila nga moabot na Siya. Ang inyong—inyong—inyong—inyong mga pulong nagasulti . . . Bueno, ang inyong—inyong kinabuhi mas lanog pa man nga nagasulti kaysa inyong mga pulong. Kamo . . . Kita n’yo? Ug Siya’y . . .

³⁵³ Silang ubos nga mga misyonaryo, niadtong nagpahigayon ako sa akong panagtigum nga sama niini, wala sila’y sul-ob nga sapatos; ang sul-ob nga karsones nakahikot ra sa iyang hawakan, nga nakaingon *niana*; nagapuyo didto nga may mga pulgas, ug ameba, ug mga tughok, ug matakboyan pa og tanan nang matang sa mga sakit, ug tanan nang uban pa didtong dapita; nangunot na ang mga kamot, nangunot tungod sa ameba ug tanan nang uban pa. Atua didto, miingon, “Ikaw ba si Igsoong Branham?”

Miingon ko, “Oo.”

Ang ingon, “Oh, panalanginan ka! Kanunay akong nagaampo para kanimo.”

³⁵⁴ Sa hunahuna ko, “Oh Dios, tugoti nga iampo gyud ako niini nga tawo. Oo. Ingon-ani ang maayo nga tawo. Mao kini.”

³⁵⁵ “Ako’y . . . ako—ako—ginabasa ko ang imong mga artikulo, Igsoong Branham. Nagasulti ka gayud sa Kamatuoran. Kauban mo kami mismo.” Oh, igsoon, ingon-ana—ingon-ana ang tinuod. Ingon niadto siya; ang luoy’ng ubos nga tawo.

Aduna ko’y nadungog nga miingon, “Nakaila ka ba kung kinsa kana?”

“Oh,” miingon, “dili man siya miyembro sa among organisasyon.”

“Mao ba? Kinsa diay siya?”

“Aba, dili man namo siya kauban.”

“Bueno, kinsa lagi siya?”

“Oh, usa siya—usa siya ka nagkinaugalingon.”

“Oh, mao ba? Uh-huh. Bueno, unsa ma’y ginabuhat niya?”

“Oh, aduna siya’y gamay’ng buluhaton didto. Siya—dili man siya magpasakop sa amoa.”

“Bueno, gusto kong mahibaloan ang mahitungod kaniya.”

³⁵⁶ Kabalo mo, kaniadtong bata pa ako, pag manguha ko og mga mansanas sa tanaman sa mga mansanas, pangitaon gyud nako pirmi ang punoan nga adunay gimarkahan nga tukog sa ubos niini, kabalo mo. May gimarkahan nga tukog nga maayo ug lignon, dinha ang lamian nga mga mansanas.

Moingon sila, “Bueno, usa lang siya ka holy-roller.”

³⁵⁷ Kabalo mo, kanunay ninyong ginabutang ang panghadlok dinha kon asa ang maayong punoan. Mao ra usab ang ginabuhat sa yawa, aron hadlokon kamo palayo Niini. Ayaw kamo’g kabalaka. Diretso lang kamo sa luyo nianang panghadlok.

³⁵⁸ Usa niana ka adlaw ginalantaw ko ang usa ka groundhog, nga nagakaon sa akong tinanum nga mga butter bean. Sa matag higayon nga magtanum ko og usa ka laray sa mga butter bean, mogawas kanang gamay’ng mananap, og kaonon ang maong mga tanum. Nahunahuna ko, “Hadlokon ko gayud siya.” Busa nagkuha ko og usa ka sudlanan nga papel. Ug usa gayud ako ka pintor; nakita ko unta ninyo. Nagdrowing ko og sa hunahuna ko nga usa ka makahahadlok nga hulagway. Oh, makahahadlok kadto, usab, ingon nga ako ang nagdrowing niadto. Ug gibutang ko kadto sa sudlanan nga papel, ug nagbutang pud ko didto og pipila ka butter bean, ug gisab-it kadto sa usa ka sanga sa kahoy. Ug pagmohuyop ang hangin, molihok-lihok kadto nga nakaingon *niana*.

³⁵⁹ Tuod man migawas gyud ang usa ka gamay’ng groundhog gikan sa lungag, kabalo mo. Ug midagan kini paingon didto, para kaonon ang mga butter bean, ug sa nakaduol na siya niadto mismong sudlanan. Miatras siya. Gitan-aw niya kadto, gitutokan kadto nga nakaingon *niana*. Ug mipadayon siya, “whew,” milukso niadto, ug, oh, wala man milihok ang sudlanan. Mao nga gitan-aw niya kadto pag-usab, kabalo mo, gitutokan gyud kadto, pag-usab. Milingi siya ug nakita kadtong mga butter bean nga nakalinya. Ug pagkalami gyud niadto nga mga tanum, kabalo mo. Busa milantaw siya, sa panghadlok nga anaa sa iyang agianan. Busa miduol siya, ug padayon nga nagapaduol pa, ingon *niana*, aron hadlokon kadto, pero wala kadto nagalihok. Ayaw’g kabalaka; patay man kana. Ingon niana ra ang tanang mga panghadlok. Busa siya—busa siya’y . . .

³⁶⁰ Ang gibuhat niya, gisipa niya sa iyang gamay’ng tiil kadtong sudlanan, ug nagkinagaskas ra, nga nagkinagaskas. Miatras siya ug gitan-aw kadto, nga nakaingon *niana*. Gisipa na usab niya kadto, nagkinagaskas ra, nga nagkinagaskas. Ingon-ana lang kadto, kagaskas lang diay. Sama ra sa mang-ak sa Irishman, kabanha lang tanan ug mga balhibo, pero walay mang-ak, kabalo mo. Busa gisipa-sipa niya kadto nga nakaingon *niana*,

ug nagkinagaskas ra nga ingon niana sa makaupat o makalima ka higayon. Kabalo ba mo kung unsay gibuhat niya? Midiretso mismo sa luyo niadtong sudlanan ug nagpadayon nga gikaon ang akong mga butter bean. Mas nasayod gyud siya, kaysa sa ako. Kita n'yo? Unsa man kadto? Nakita n'yo, wala niya tugoti nga mapugngan siya niadtong panghadlok. Aduna man gud og usa ka butang nga lamian sa luyo niadtong panghadlok.

³⁶¹ Pagmoingon sila, “Oh, sila’y mga holy-roller,” diretso lang mismo sa luyo niana nga panghadlok ug magpadayon. Kita n'yo? Magpadayon lang ug toohi kana. Kita n'yo? Tingali’g adunay Balaang Espiritu didto, usab, nakita n'yo. Wala mo kabalo. Kita n'yo? Bueno.

³⁶² Oh, kanang den- . . . tan-awon nato kining denominasyong ulod nga hantatawo nga nagapanglihok. Iglesiang natural; Iglesiang espirituwal. Matikdi n'yo kining ulod nga hantatawo karon, kung sa unsang paagi niya kining gihimo nga denominasyon. Gikaon na niya ang panit sa kahoy, ug gikaon na pud ang mga bunga gikan niadto, ug, oh, igsoon, wala na gayud kadto. Wala na ang tanang mga gasa sa Espiritu; wala na’y Balaanong pagpang-ayo, wala na’y pagsulti og laing mga pinulongan, wala na’y pagpropesiya, wala na’y bisan unsa, wala na nagatoo sa—nagatoo sa mga propeta. Wala na sila nagatoo niini nga mga butang. Wala na sila mahibalo. Tungod ang tanan, hinimo’g-tawo man! Tanan nga anaa kanila hinimo’g-tawo, artipisyal na. Kita n'yo? Bueno. Ang iglesiang natural, adunay iglesiang natural. Mao kana ang hinimo sa tawo. Pero ang Iglesiang espirituwal . . .

³⁶³ Nasayod ba mo, nga ginaingon kana sa Biblia? Oo, sir. Ang iglesiang natural; ug ang Iglesiang espirituwal. Ug nagaingon ang Biblia, “Isalikway ang babayeng-ulipon ug ang iyang anak:” (si Hagar) “kay dili siya mahimong manununod uban sa babayeng may kagawasan ug sa iyang anak.” Kita n'yo?

³⁶⁴ Busa, ang natural nga iglesia, kana ang magapanunod (Sa unsa?) sa pagbugkos sa mga binangan, sa pagbugkos sa mga pinungpong, aron pagasunogon. “Ug dili siya magapanunod, mahimong manununod, uban sa babayeng may kagawasan.” Kung ang babayeng-ulipon anaa sa pagkaulipon uban ang iyang organisasyon nga mga anak, dili siya mahimong manununod uban sa babayeng may kagawasan, tungod kay ang mga anak sa babayeng may kagawasan mahiuban man sa Pagsakgaw. Ug ang mga anak sa babayeng-ulipon magatindog sa Paghukom, kita n'yo, sinalikway. Oo. Gawasnon ang mga espirituwal. Oo, sir.

³⁶⁵ Ang ulod nga hantatawo, ang denominasyong mga Esau. Karon, si Esau. Atua si Esau ug si Jacob, silang duha kaluha, pareho silang relihiyoso. Si Esau usa ka karnal nga tawo. Usa siya ka maayong tawo. Wala siya miingon, bueno, kaniadto . . . Wala siya migawas ug nangawat, naghuboghubog, o unsa man

kaniadto. Usa siya ka relihiyoso nga tawo. Pero naghunahuna siya, “Bueno, basta relihiyoso ako, unsa ma’y kalahian niana?”

³⁶⁶ Apan, ang ubos nga si Jacob, dili igsapayan kaniya kung sa unsa mang paagi niya maangkon kadto, kadtong pagkapanganay mao gyu’y gitinguha niya. Bisan sa unsa pa mang paagi niya maangkon kadto, basta lang nga maangkon niya kadto! Kung gikinahanglan niyang moluhod sa altar, ug mosinggit ug mohilak, ug motiyabaw ug magkasip-on sip-on. Pasensya na. O kaha, kabalo na mo, magluha gyud ang mata. Dili ko tuyo nga isulti kana. Ug busa. . . Pasensya na. Bueno, moluhod sa altar ug mohilak pag-ayo hangtud nga maangkon niya kadto, aba, naangkon gyud niya kadto. Kita n’yo? Dili igsapayan kaniya kung sa unsa mang paagi niya maangkon kadto, basta lang nga maangkon gyud niya kadto.

³⁶⁷ Moingon ang uban kanila, “Ako. . . Igsoong Branham, sila nga mga tawo didto, nagatiyabaw gyud sa altar, ug nagahilak, nga nagahilak. Dili ko gusto kana sa ingon-anang paagi.” Bueno, dili gyud nimo maangkon kana.

³⁶⁸ May tigulang itum, itum nga igsoon, didto sa Habagatan, kaniadto, nga kanunay’ng malipayon. Ug siya, miingon ang iyang agalon, “Unsa ma’y—unsa ma’y nakapalipay kanimo sa kanunay, dong?”

Ingon niya, “Aduna man gud ko’y kinasingkasing nga relihiyon.”

Miingon, “Wala na’y ingon-ana.”

³⁶⁹ Ingon niya, “Nasayup ka. ‘Sa nasayran mo, wala na’y ingon-ana.’” Lahi ang iyang nahibaloan. Miingon, “‘Sa nasayran mo.’ Ingon niana unta ang pagkasulti mo niini.”

Usa niana ka adlaw, miingon siya, “Gusto kong magkaaduna usab og ingon-anang kinasingkasing nga relihiyon.”

Ingon niya, “Kanus-a man nimo gustong madawat kini?”

Miingon, “Karon.”

Miingon, “Bueno, moadto na kita og angkonon na nato.”

³⁷⁰ Migawas sila. Miingon ang agalon, “Aniay usa ka kamalig sa dagami. Nindot dinhi.” Ug miingon pa, “Oo, dili pud ko madungog sa akong asawa, ug sa unsa man dinhi,” miingon. Sa ingon nianang paagi kini gusto sa mga tawo, kabalo mo; ang itunol kini sa ilaha, nga anaa sa usa ka plato. Miingon, “Moluhod na kita dinhi.”

Miingon ang tigulang nga igsoon, “Dili mo kini makuha dinhi.”

³⁷¹ Bueno, sir, miadto ang agalon ngadto sa kuwadra. Miingon siya, “Makuha ba nato kini dinhi?”

Ang ingon, “Dili.”

Miingon siya, “Moadto kita didto sa kamalig sa mga mais.”

Ang ingon, “Dili.”

Miingon, “Asa ba diay nimo makuha kini?”

³⁷² Ang ingon, “Sunod kanako.” Gilulho niya ang iyang karsones, milakaw pasulod sa tangkal sa baboy, kutob sa mahimo niya, didto sa lapok, ang ingon, “Umari ka dinhi mismo. Dinhi nimo madawat kini.”

Miingon ang agalon, “Dili ko gustong moanha dinha.”

Ingon niya, “Dili pa diay nimo gustong makuha kini, agalon. Wala pa nimo ginatinguha kini.”

³⁷³ Kabalo mo, naghunahuna man usab si Naaman, og ingon niana. Si Naaman, miingon si Naaman, “Karon, gusto ko nga mawala na ang akong sanla.”

³⁷⁴ Miingon si Elias, “Umadto ka didto sa lapokon nga Jordan, kon diin nagadagayday kadto paingon didto sa Mediterranean.” Ug miingon, “Ingon gayud kadto ka lapokon. Motuslob ka didto sa makapito ka higayon.”

³⁷⁵ “Oh,” ingon si Naaman, “my, grabe! Dili ba mas maayo ang mga tubig, didto sa Damascus ug didtong dapita? Oooh, maanindot kadto ug tin-aw gyud didto.” Aba, nakita nato dinhi niadtong miaging gabii, sa maong salida, dinhi, kabalo mo. Miingon, “Oh,” miingon, “aba, aba, dili namo gustong moadto didto. Dili ko mahimong moadto didto. Ug kabalo ba mo kung kinsa ako? Ako ang kapitan sa mga tigbantay. Ako ang heneral sa kasundalohan.”

³⁷⁶ “Bueno, kung gusto nimong mawala na ang imong sanla, nan motuslob ka dinha. Pero kung gusto nimong magpabilin ra kana, umadto ka didto. Ingon niya, ‘Pagtuslob na.’”

³⁷⁷ Ug makita ko siya nga nagalakaw na paingon didto niadto nga tubig. Mahanduraw ba ninyo? Oh, gipakaubos gyud niadto ang iyang dungog. Makita ko siya, kabalo mo, nagkinto-kinto nga nakaingon *niini*; ginapislit-ang-ilong, kabalo na mo.

³⁷⁸ Ingon niana pud ang ubang mga tawo pagmosulay nga moduol kang Cristo, “Gusto kong mamaayo na, gusto ko gayud, kabalo mo, nga makaadto sa Langit, pero, oh grabe, unsa kaha kung tan-awon ako sa ubang tawo?” Uh-huh. Ikaw nga hipokrito. Dili gyud nimo madawat kini, sa gihapon. Husto kana. Kita n’yo? Dili mo gayud kini madawat, sa gihapon. Ayaw’g kabalaka. Wala pa gayud nimo ginatinguha kini. Husto. Wala pa gayud nimo ginatinguha kini. Eksakto gayud. Pero sa diha nga andam ka na nga dawaton kini, nan madawat mo gayud kini, sigurado. Ihatag kini sa Dios nganha kanimo pag andam ka na. Bueno.

³⁷⁹ Karon, ang tanang denominasyon nga mga ulod nga hantatawo, bug-os nang gikaon ang maong tibuok butang. Matikdi n’yo ang matag insekto, ang matag usa niini nga mga insekto, sa dihang gidaut niini ang maong Punoan, nagbuhat siya

og paagi para sa usa pa nga mosunod kaniya. Oh, usa siya ka utokan nga linalang. Oo, sir. Kita n'yo? Gikuha niya ang mga bunga, kita n'yo, ang Espiritu, aron nga (Unsa?) makuha niya ang pagpakig-fellowship, kita n'yo, ang mga dahon.

³⁸⁰ Dayon miabot ang usa pa ug naghimo siya og kaugalingon niyang kabuhian, giut-ot ang mga dahon. Nganong gibuhat niya kadto? Giut-ot niya ang mga dahon aron wala na'y malandongan ug wala na'y kabugnaw, aron makita sa ubang tawo, aron nga makasulod siya sa panit sa kahoy. Kita n'yo?

³⁸¹ Misulod siya sa panit sa kahoy, ug nagkutkot pasulod mismo sa sanga, ug gikuha ang Doktrina gikan kanila, kita n'yo, ang mismong butang nga nagapapadayon sa Kinabuhi.

³⁸² Ug pagkahuman, sa pagkutkot niya pasulod dinha, aduna siya'y, sunod nga hugna, miabot ang manunupsop nga ulod nga hantatawo, nga mao'y nagdala og denominasyon, ug gisupsup kana ug giorganisa kana aron dili ninyo madawat Kini.

³⁸³ Ug unsa ma'y gibuhat sa Kinabuhi? Mikanaug paingon sa mga gamut. Eksaktong ingon niana. Diretso Kini mismo nga mikanaug paingon sa mga gamut. Oo.

³⁸⁴ Karon, ang mao ra nga insekto nga nagbangag-bangag pasulod sa kinauyokan, hangtud nga nakaabot kini sa Kinabuhi. Padayon kining nagadaut gikan sa bunga, paingon sa mga dahon, hangtud sa panit sa kahoy, og hangtud nga nakasulod kini mismo sa kinauyokan, sa agianan sa Kinabuhi. Bueno.

³⁸⁵ Karon susihon nato ang maong tigdaut nga nagapanglihok. Ang una . . . Laktawan ko na lang ang pipila niini dinhi, sa hunahuna ko; dili, dili na lang diay. Ang—ang unang butang nga gibuhat niining insekto, sa diha nga nakasulod na siya sa kinauyokan sa Punoan . . . Matikdan nato siya, dinha sa iyang unang hugna, sa wala pa siya nakasugod og maayo. Matikdan nato siya. Karon matikdan nato siya nga nagapanglihok. Ang unang butang nga iyang giataki, mao ang dauton ang unang tinuod, og pinakamahinungdanong Punoan nga nagapamunga nga aduna ang Dios kaniadto sa ibabaw sa yuta.

³⁸⁶ Karon, kung mahimo makapailub unta mo uban kanako sa pipila pa ka minuto. Gusto kong—gusto kong masabtan n'yo kini karon. Ayaw . . . Kini mao ang Mensahe sa Pasko sa Pagkabanhaw para sa inyo, nga nagaabot na mismo karon. Uh-huh, uh-huh, uh-huh.

³⁸⁷ Ang unang butang nga gibuhat niya, iyang gidaut ang unang, pinakabililhong nagapamunga nga Punoan sa Dios, si Cristo. Siya mao kadtong Kahoy nga atua sa tanaman sa Eden. Tinuod kana. Ang unang nagapamunga nga Punoan, gidaut niya Kini. Ang Unang gitanum sa Dios dinhi sa yuta, mao si Cristo. Gidaut niya kana nga Punoan nga nagapamunga sa bunga sa Dios. Karon, aduna sila og tanan nang matang sa mga organisasyon, ug anaa kana mismo sa iyang mga kamot. Pero sa dihang miabot

siya sa usa ka Punoan nga ginapamunga ang tinuod nga bunga, misulod Dinha ang Romanong insekto, kita n'yo, og gidaut ang maong Punoan.

³⁸⁸ Ang Punoan? Oo. Miingon si Jesus, “Kung ginabuhat Ko . . .” Sa San Juan, “Kung wala Ko ginabuhat ang mga buhat sa Akong Amahan, o wala ang mga bunga sa Akong Amahan, ayaw ninyo Ako toohi.” Ginapamunga gyud Niya ang bunga sa Dios. Unsa man nga matang sa bunga ang gipamunga Niya? Unsa nga matang sa bunga?

³⁸⁹ Atong susihon Siya sa pipila ka gutlo. Nahisgotan na man nato kini sa makadaghang higayon. Mao nga hisgotan lang nato ang maong diyutay'ng pasiuna, para sa mga tawo nga ania nanaglingkod dinhi, nga nagahulat sa makadiyut, para maiampo.

³⁹⁰ Unsa ba ang unang butang nga nahibaloan nila, nga iyang, naila Siya ingon nga mao ang Mesias? Kaniadtong unang pagduol ni Pedro ngadto Kaniya, tungod gidala man siya ni Andres, ug nakita Niya si Pedro ug miingon, “Ang imong ngalan mao si Simon, ug anak ka ni Jonas.” Nasayod siya niadtong tungora mismo, sumala sa Kasulatan, nga mao na kadto ang Mesias. Aduna na kaniadto . . .

³⁹¹ Nasayod ba mo nga daghan na kaniadto ang nagpanungha sa wala pa kadto, sumala sa kasaysayan, ug gitawag ang ilang mga kaugalingon nga mga Mesias? Apan wala ni usa kanila ang nakabuhat *nini*. Uh-huh. Kay, “Ang Mesias,” miingon si Moises, (Ang Pulong sa Dios, nga dili mapakyas, gipamulong ni Moises.), ingon niya, “Ang inyong Mesias mamahimong usa ka Propeta nga sama kanako.”

³⁹² Ug busa sa dihang miduol kini nga estranyo sa atubangan ni Jesus, ug miingon si Jesus, “Ania, ang imong ngalan mao si Simon, ug anak ka ni Jonas,” nasayod dayon si Pedro niadtong tungora mismo kung Kinsa Siya. Hingsayran niya nga mao na kadto Siya.

³⁹³ Sa dihang miadto si Natanael ug gidala si Felipe, o . . . miadto si Felipe, og gidala si Natanael, diay, ug gidala siya didto. Ug si Natanael, nga usa ka halangdong lalaki, kita n'yo, halangdong lalaki, relihiyoso nga lalaki. Ug—ug gisultihan siya ni Felipe mahitungod niadto, sa pagpaingon nila didto, kung unsay gibuhat ni Jesus kang Simon. Ug sa dihang miduol na si Natanael sa Presensiya ni Jesus, unsa ma'y gisulti ni Jesus? Miingon Siya, “Tan-awa ang usa ka Israelinhon, nga kaniya walay limbong.”

Ingon niya, “Rabbi, kanus-a Mo man ako hiilhi?”

³⁹⁴ Miingon Siya, “Sa wala ka pa gitawag ni Felipe, sa didto ka pa ilalum sa kahoy, nakita Ko na ikaw.”

395 Ingon niya, “Rabbi! Rabbi, Ikaw mao ang Anak sa Dios; Ikaw mao ang Hari sa Israel.” Kita n’yo?

396 Ngano man? Mao man kadto ang bunga. “Kung wala Ko ginabuhat ang mga buhat sa Akong Amahan. . .” Hingsayran Niya ang mga hunahuna mismo nga atua sa mga kasingkasing nila.

397 Gihikap sa usa ka babaye ang Iyang bisti, usa niadto ka adlaw, ug mihawa dayon ug milingkod na sa kongregasyon. Mitan-aw si Jesus sa palibot ug miingon, “Kinsay mihikap Kanako?” Nangulipas silang tanan niadto. Mitan-aw Siya sa palibot, ug nakita ang babaye. Adunay talinugo ang babaye. Miingon Siya, “Ang imong pagtoo mao’y nagluwas kanimo.” Oh, grabe!

Kadtong luoy’ng babaye nga taga-Samaria . . .

398 Karon hinumdumi, wala gayud Siya miadto sa mga Gentil, sama niana. Wala, sir. Gisultihan Niya ang Iyang mga tinunan nga dili moadto kanila. Kita kadto. Kini man ang atong panahon. Mianhi Siya sa porma sa Balaang Espiritu, nganhi kanato, sumala sa Iyang gisulti nga buhaton Niya.

399 Pero kaniadtong miadto Siya kanila, unsa ma’y nahitabo? Sa dihang miduol Siya ngadto sa babaye nga taga-Samaria, miingon ang babaye. . . miingon Siya sa babaye, “Hatagi Ako og mainom.”

400 Ug miingon ang babaye, “Dili baya nabatasan para Kanimo, ingon nga usa ka Judio, nga mohangyo kanako, nga usa ka Samarianhon.”

401 Aduna ma’y panaglainlain kaniadto sumala sa ilang mga kolor ug uban pa. Pero gipahibalo Niya kanila niadtong tungora mismo, nga wala gyu’y mga panagkalahi, ingon nga ang tanan naggikan man sa mao ra nga punoan. Kitang tanan mga anak nga lalaki ug mga anak nga babaye sa Dios. Kitang tanan, kita n’yo. Ug miingon Siya . . .

402 Miingon ang babaye, “Bueno, nagasimba kami. Ang among ginikanan, nga si Jacob. . .” Kita n’yo, ug kadto man ang ginikanan sa mga Judio, usab. Kita n’yo? “Ang among amahan, nga si Jacob, ang nagkalot niining atabay, ug moingon Ka nga labaw pa Ka kay kaniya?”

403 Ug miingon Siya, “Ang mga Tubig nga igahatag Ko kanimo mao ang Kinabuhing walay katapusan.” Kita n’yo? Miingon Siya. . .

“Kami, bueno, nagasimba kami dinhi niining bukira, ug Ikaw sa Jerusalem.”

Miingon Siya, “Lakaw ug kuhaa ang imong bana ug balik dinhi. Kini ang magapanghimatuod niini.”

Miingon ang babaye, “Wala man ko’y bana.”

404 Miingon, “Husto ang imong giingon.” Miingon pa, “Nagkaaduna ka na og lima; ug ang usa nga aduna ka karon dili man imong bana.”

405 Miingon ang babaye, “Sir, kabalo Ka, upat na ka gatus ka tuig sukad niadtong nagkaaduna kami og usa ka propeta, apan siguradong usa gyud Ikaw ka propeta. Giunsa Mo man pagkahibalo nga aduna ako’y lima ka bana?” Ingon siya, “Karon, nasayod kami nga ang...Panahon na para sa Mesias nga mahianhi, nga gitawag, ‘ang Cristo.’ Ug pagmoabot na Siya, isulti Niya kanamo ang ingon niini nga mga butang.” Oh, mao kana ang Iyang mga bunga.

Miingon Siya, “Ako mao Siya.”

406 Gibiyaan niya ang banga, ang karaang banga sa organisasyon. Miadto siya sa siyudad. Bisan unsa pa ka maayo ang atabay, nga aduna si Jacob, nakakaplag siya og usa ka bag-ong Tubod. Miadto siya sa siyudad, og miingon, “Umari kamo, tan-awa ninyo ang usa ka Tawo Nga nagsulti kanako sa butang nga nabuhat ko: dili ba mao na Kini ang mismong Mesias? Dili ba mao na Kini ang bunga? Dili ba mao na Kini ang kapanghimatuoran nga Kini mao na ang Mesias?”

407 Wala Kadto mahisabti sa mga Judio. Miingon sila, “Usa Siya ka manghihimalad, Beelzebub.”

408 Miingon si Jesus, “Ginapasaylo Ko kamo, kamo. Apan, sa umaabot nga panahon, moabot ang Espiritu Santo aron buhaton ang mao gihapong butang; ug, kon mosulti kamo og batok Niana, dili na gayud kamo mapasaylo.” Kita n’yo?

409 Karon, “Kung wala Ko ginabuhat ang mga buhat sa Akong Amahan, toohi... ayaw ninyo Ako toohi.” Apan kadtong nagapamunga nga Punoan ginapamunga man ang maong mga bunga.

410 Karon unsa na man? Unsa ma’y gisulti Niya? Kung ingon-ana unsa—unsa ba nga matang sa Iglesia ang gitukod Niya? Karon, kamong mga Katoliko nga gustong moingon nga si Jesus nagtukod og usa ka iglesia, unsa ba nga matang sa Iglesia ang gitukod Niya?

411 Naghisgot ba Siya og usa ka denominasyon, usa ka kredo? [Nagaingon ang kongregasyon, “Wala.”—Ed.] Batok na Siya niana sa una pa. Miingon, “Kamo nga mga pinaputi ang mga bungbong. Kamo nga mga bukog sa mga patay.” Gitawag Niya sila og tanan na nga mahimo Niyang itawag kanila. Tinuod kana. Batok gyud Siya niana. Ingon-ana ang bunga sa Dios. Karon, mahimo ninyong himoon ang duha ug duha, upat, kung gusto ninyo. Bueno. Siya’y batok gayud sa maong butang, organisasyon, batok sa ilang mga teorya. Gitawag sila nga, “Mga tigpakaaron-ingnon, mga bitin sa kasagbotan,” ug miingon nga sila’y “mga yawa.” Miingon Siya, “Ang yawa mao ang inyong amahan, ug ang iyang mga binuhatan inyong pagabuhaton.

Kinsa ba sa inyong mga ginikanan ang wala naglutos sa mga propeta nga Akong gipadala sa unahan Nako?” Kita n’yo? Miingon pa, “Dayon inyong ginatukod ang ilang mga pantiyon.” Miingon, “Kamo man ang nagbutang kanila dinha.” Oh, igsoon, wala gyud Siya nagpugong-pugong sa pagsaway kanila. Tinuod.

⁴¹² Mao kadto ang bunga sa Dios. Unsa man kadto? Ang magpabilin sa Pulong sa Dios, ginapadayag ang Pulong sa Dios.

⁴¹³ Miingon Siya, sa laing paagi, “Unsa ba’y giingon sa mga Kasulatan nga pagabuhaton Ko nga Mesias pagmoabot na Ako? Karon, kung wala Ko ginapamunga kanang bunga nianang Pulong, nan dili Ako ang Mesias. Apan kung ginapamunga Ko ang bunga nianang Pulong nga angay’ng buhaton sa Mesias, kung ingon-ana Ako mao Siya.” Amen. “Karon, kinsa man kaninyo ang makapasangil nga Ako nakasala?” miingon Siya. Mao kana. “Kinsa ba sa inyong mga organisasyon ang nagabuhat niining mao gihapong butang?” Mao kana. “Ingon-ani man ang angay’ng buhaton sa Mesias. Ang Mesias angay man nga mamahimong usa ka propeta. Karon tan-awon nato ang pipila sa inyong tanan,” miingon Siya, “pinaagi sa inyong hataas nga mga ideya, tan-awon nato kung mahimo ba ninyo kini.” Karon, mihilum ra sila. Oo. Unsa man kadto? Gipamunga Niya mismo ang bunga sa Dios. Anaa Kaniya ang Balaang Espiritu. Gipamunga Niya ang bunga sa Dios. Unsa man Siya? Siya . . .

⁴¹⁴ Karon paminaw mo og ayo. Magdali na ko sa ingon ka dali nga mahimo ko, aron dili ko kamo mapalangan para sa inyong pang-Pasko sa Pagkabanhaw nga paniudto. Tan-awa. Pero, inyong—ang inyong pang-Pasko sa Pagkabanhaw nga paniudto angay lang nga mao ang pagkabanhaw. Kita n’yo?

⁴¹⁵ Pero unsa man? Siya mao ang hingpit nga Punoang Propeta sa Dios, ang ehemplo nga Punoan, ang Punoang Pamanhonon. Amen. Himaya! Aduna ko’y isulti nga diretsahan: Kung Siya mao ang Punoang Pamanhonon (Nagatoo ba mo niini? Gikan sa tanaman sa Eden?), nan ang Punoang Pamanhonon, kon wala ang Babaye, dili magapamunga, busa kinahanglan magkaaduna Siya og usa ka Punoang Pangasaw-onon. Ang maong babaye kinahanglan nga matawo gikan sa mao gihapong materyales, ang Pulong nga nahimong unod diha sa Punoan. Nagalaum ko nga nasabtan n’yo unta kini. Kini’y ang mao gihapong Kinabuhi nga anaa sa niining babayeng Punoan, ang Pamanhonon, maingon nga anaa Kini sa Pangasaw-onon. “Ang mga buhat nga Akong ginabuhat pagabuhaton usab ninyo.” Husto ba? Siya mao ang Pamanhonon, hinumdumi.

⁴¹⁶ Moingon mo, “Dili kana uyon sa Kasulatan.” Oh, kini uyon gayud. Nakuha ko kana karon lang gyud. Kita n’yo? Nagaandam na kita nga magpahigayon og panagtigum para sa pagpang-ayo sa dili madugay. Nakuha ko kana. Siya mao gayud.

417 Gusto ba ninyo og kapanghimatuoran niini? Miingon Siya, “Ako mao ang Punoan sa parras, kamo mao ang mga sanga.” Ginaingon kini sa San Juan: “Ako mao ang Punoan sa parras, kamo mao ang mga sanga; kamo ang magapamunga.” Kita n’yo? Ug ang punoang lalaki ug ang punoang babaye ang nagahatag sa pollen, ngadto sa usa’g usa, nga mao’y nagapabunga. Ug mao pud gihapon ang buhaton sa sanga ug sa punoan sa parras. Kita n’yo? Eksaktong ingon niana.

418 Busa miingon Siya, ania, kining unang Punoan mao’y usa ka Punoang Propeta, usa ka hingpit nga Punoan, ang Dios sa mga propeta. Usa Siya ka medyor nga Punoan. Siya ang hingpit nga Punoang Propeta sa Dios. Ngano man? Siya mao ang Pulong. Bueno, ang uban pa mao’y minor ra nga mga propeta. “Ang Pulong miabot sa mga propeta.” Apan Siya mao ang Pulong, Mismo, sa porma sa usa ka Propeta. Amen.

419 Karon aduna kita’y ginapadulngan. Karon paminaw mo og ayo. Ug ayaw n’yo kini pakyasa karon. Pagkanindot gyud niini, bag-ohay ko lang kining gisulat dinhi. Uh-hum. Amen.

420 [Nadungog ang serbato sa usa ka sakyanan—Ed.] Aduna na’y nagasinggit, ginapatingog ang ilang serbato, dinha sa gawas. Uh-huh, ako gayu’y, oh, nagalaum ko nga nagakalipay gyud kamong mga anaa dinha sa gawas. Kami man pud, dinhi sa sulod. Maayo.

421 Bueno, Siya mao ang Punoang Propeta sa Dios. Ngano man? Giwali Niya ang tibuok og hingpit nga Pulong sa Dios, kay Siya mao man ang Pulong sa Dios nga nadayag. Siya mao ang hingpit nga Punoang Propeta nga nagwali sa hingpit nga Propetang Pulong, nga nagbunga sa hingpit nga Propetang bunga pinaagi sa hingpit nga Pulong sa Dios. Oh, igsoon, pagkanindot hisgotan ang maong Punoan! Usa ka Punoan, Siya mao kadtong Kahoy sa Kinabuhi nga gipahilayo sa Manulonda gikan kang Eva ug Adan, nga dunay nagabantay nga mga Kerubin, aron ipahilayo sila gikan niana nga Kahoy. Karon ang mao gihapon nga mga Kerubin nagapaningkamot nga ipaduol sila ngadto Niini, kay aduna na ma’y paagi nga gibuhat para kanila. Kita n’yo? Pero karon nagaatras hinoon sila; oh, ang mga tawo gayud. Hmm!

Karon, giwali gayud ang tibuok Pulong, wala Siya nagputol *dinhi o dinha*.

422 Kaniadtong miduol Kaniya si Satanas, kadtong bantugang teologo, ug miingon, “Nahisulat. . .”

Miingon si Jesus, “Oo, ug nahisulat usab. . .” Uh-huh.

“Apan nahisulat. . .”

Ug miingon Siya, “Ug nahisulat man usab. . .”

423 Hingpit nga Punoang Propeta nga nagawali sa hingpit nga Pulong sa Propeta, nga inubanan og mga ilhanan sa Propeta,

hingpit nga mga resulta sa Propeta, hingpit nga mga bunga sa Espiritu.

424 Ug ingon nga pagbiaybiay. . . Akong—hisgotan ko kini sa ingon na ka paspas karon. Tungod kay, ingon nga pagbiaybiay, gibitay nila Siya sa . . . Siya mao ang Pulong, kabalo mo. Gibitay nila Siya, ang Punoang Pulong; ang Punoang Pulong, gibitay Siya ngadto sa usa ka hinimo'g-tawo nga Romanong kahoy. Hum! Igsoon, nagalaum ako nga mituhop kana. Siya, ingon nga hingpit nga espirituwal nga Kahoy sa Dios, gibitay nila Siya ngadto sa usa ka hinimo'g-tawo nga Romanong kahoy. Amen.

425 Mao gihapon karon. Ginapaningkamotan nilang kuhaon ang hingpit nga Kahoy sa Dios, ang Pulong, ug sagolan Kini, ug ibitay Kini didto sa kung unsa nga matang sa kredo. Ang kamatayon ug Kinabuhi dili mahimong magsagol. Wala sukad-sukad mitambong si Jesus sa usa ka panerbisyo sa paglubong; banhawon man gud Niya ang patay. Ngano man? Tungod ang kamatayon ug Kinabuhi dili man puedeng mag-uban. Sila'y sukwahi, sa usa'g usa. Wala Siya nagwali diha sa mga paglubong. Gibanhaw lang Niya sila. Amen. Oo. Ngano man? Kinabuhi; ug kamatayon.

426 Karon tan-awa. Gibitay nila Siya ngadto sa usa ka kahoy. Husto ba? “Matinunglo siya nga pagabitayon diha sa kahoy.” Husto ba? Miingon ang Biblia, “Matinunglo siya nga pagabitayon diha sa unsa mang hinimo'g-tawo nga kahoy.”

427 Busa kung, sa karong panahon, kung ginapaningkamotan ninyong magkumbitay sa usa ka matang sa kahoy nga hinimo'g-tawo, nan pangbuhi na mo niana. Ug ayaw n'yo tugoti nga ibitay usab kamo, dinha. Kay, lugar kana para sa mga patay, nga usa ka hinimo'g-tawo nga Luther, Baptist, Presbyterian, Pentecostal nga organisasyon, husto kana, usa ka hinimo'g-tawo nga kahoy. Ayaw gyud mo pagkumbitay dinha. Ayaw n'yo tugoti nga ibitay usab kamo, dinha. Ibitay gayud nila kamo dinha kung mahimo nila, hangtud nga ang tanang Kinabuhi mawala na kaninyo, hangtud nga ilhon na ninyo ang ilang doktrina. Tinuod kana.

428 Bisan pa niana dinha nila gibitay kining hingpit nga Kahoy. Ang hingpit nga nagapamungang Punoan sa Dios gibitay diha sa usa ka hinimo'g-tawo nga Romanong kahoy. Mao kana. Usa ka tunglo ang pagabitayon diha sa unsa mang kahoy nga hinimo'g-tawo. Unsa man kadto? Aron walaon Siya sa ilang panan-aw, human Niyang gipamunga ang tanang mga bunga.

429 Human nga si Maria Magdalena, sumala sa sulti sa kasaysayan, midagan ngadto sa atubangan nila ug miingon, “Unsa ba'y nabuhat Niya? Unsa ba nga kadautan ang gibuhat Niya?” Gipahunong niya ang prosesyon, og miingon, “Unsa ba'y gibuhat Niya nga dautan? May gibuhat ba Siya og unsa man kondili giwali lang ang Maayong Balita ngadto sa mga kabus? May gibuhat ba Siya og unsa man kondili giayo lang ang mga

may sakit, gibanhaw ang mga patay? Ug ang mismong mga ilhanan sa buhi nga Dios anaa man Kaniya. Unsaon man ninyo pagkondena Kaniya?"

⁴³⁰ Ug ilang gisagpa siya sa baba, ug miingon, "Maminaw ba kamo nianang babaye nga mahugaw'g-dungog imbis nga sa inyong sacerdote," mao kana, "sa inyong obispo?" Uh-huh. Ingon-ana. Mao gihapon sa karon. Tinuod. Uh-huh. Oo.

⁴³¹ Bueno, kaniadtong gibuhat Niya ang tanan niini, ug gipamatud-an ang Iyang Kaugalingon, kung unsa Siya, ug gipahayag kadto sa ilaha ug miingon, "Kung dili Ako Siya, kung ingon-ana kinsa man kamo?" Uh-hum, uh-hum. "Kung makapasangil kamo nga Ako nakasala, kung sayup Ako sa kon asa man sa Pulong, nan ipakita ninyo Kanako. Karon ipakita Ko kaninyo kung asa kamo nasayup." Kita n'yo? Ang *sala* mao'y "dili-pagtoo." Nasayod kita niana.

⁴³² Karon, aron walaon na Siya sa ilang panan-aw, gidumtan man nila Siya og ayo, tungod kay giguba Niya ang tanan nilang mga organisasyon, mao nga aron walaon na Siya sa ilang panan-aw, gilubong nila Siya, ug giligid ang usa ka daku kaayong, bato sa denominasyon didto sa may pultahan, aron masigurado nga dili gayud Siya mabanhaw. Oh, grabe!

⁴³³ Palandunga n'yo kadtong hingpit nga Kahoy! Ngani mitan-aw si David kaniadto ug nakita Kini. Ingon niya, "Atua kini sa daplin sa kasapaan sa Tubig. Ginapagitib Niya ang Iyang mga dahon sa Iyang panahon, ang Iyang bunga; dili matakatak, kini—dili kini malaya. Bisan unsa man nga ginabuhat Niya magamauswagon." Siya mao ang Anak sa kauswagan.

⁴³⁴ Usa ka tipo Niya si Joseph. Siya mao ang Anti-tipo ni Joseph. Bisan asa man miadto si Joseph, nagmauswagon kini.

⁴³⁵ Mao ra usab kang Jesus, ang Iyang Pulong. "Ang Akong Pulong magamauswagon, ug dili Kini magabalik Kanako nga walay-kapuslanan. Pagatumanon Niini kung unsay katuyoan Niini." Kita n'yo? Siya mao ang Pulong. Gipadala ang Pulong nganhi sa yuta, sa Dios, ug pagatumanon Niini sa ingon ka eksakto ang katuyoan nga gipadala Kini sa Dios.

⁴³⁶ Karon, paminaw mo og ayo ha. Nagaka-undanon na kini, nga may krema sa ibabaw niini. Karon matikdi.

⁴³⁷ Ania na Siya nga nagaabot, karon, ug sila . . . tungod sa mismong mga buhat sa Dios, kaniadtong mitindog Siya ug gipangutana sila. Miingon Siya, "Kung wala Ko ginabuhat ang mga buhat nga gisulti sa Dios nga Akong pagabuhaton, kung ingon-ana dili Ako Siya; ayaw ninyo Ako toohi. Apan kung ginabuhat Ko kini, nan toohi ninyo ang mga buhat. Kung dili kamo makatoo Kanako, ingon nga usa ka Tawo nga ginabuhat kini, nan toohi ninyo ang mga buhat nga Akong ginabuhat. Ang mga niini ang nagapanghimatuod Kanako. Mas lanog man nga nagasulti ang mga niini kaysa masulti sa Akong tingog." Husto.

Ug ang mao ra mismong butang maaplikar gihapon sa unsa mang panahon. Oo, sir. Sigurado gayud.

438 Karon matikdi. “Kung wala Ko ginabuhat ang mga buhat sa Akong Amahan, kung ingon-ana ayaw . . . ayaw ninyo Ako toohi, ayaw ninyo Ako toohi. Dayon, kung ginabuhat Ko ang mga buhat, toohi ninyo Ako.”

439 Pagkahuman unsa ma’y gibuhat nila? Gikuha kadtong pinakamahinungdanon nga Punoan, giputol Kadto, og gibitay Kadto sa usa ka kahoy nga hinimo’g-tawo. Husto, giputol ang Kinabuhi gikan Niini, ug gibitay sa usa ka kahoy nga hinimo’g-tawo, ingon nga pagbiaybiay.

440 Niadtong tungora, wala nila kadto nagustohi. Daghan kaayong mga tawo ang atua nagatindog didto, nanaghilak tungod Niini, busa gikuha nila Siya didto. Ingon sila, “Hugtan gyud nato ang atong denominasyon aron dili makasulod dinhi sila nga mga holy-roller.” Busa gipahimutang dayon nila Siya didto sa lungag nga iya ni Joseph nga taga-Arimatea, ug giligid ang usa ka daku kaayong bato. Nagkinahanglan kadto og usa ka gatus ka mga kalalakin-an para mapaligid kadto didto.

441 Inyo bang nakita—nakita, niadtong miaging gabii, sa hulagway, ang dakung lakra sa pagpaligid nila niadtong bato? Nga mga pila ka tonelada ang gibug-aton.

442 Giligid didto ang ilang dakung bato sa organisasyon, aron nga dili Siya kono mabanhaw. Pero nakapugong ba kadto Kaniya? Wala.

443 “Apan Akong ipahiuli, nagaingon ang Ginoo.” Lakbitan nato kana nga teksto karon, ug ipatuhop kana. “Akong ipahiuli, nagaingon ang Ginoo. Ipahiuli Ko Siya sulod sa tulo ka adlaw. Pagabanhawon Ko Siya pag-usab.” Mao nga dili gyud nila mahimong itago Siya niadtong bato. Dili nila mahimong itago Siya gikan sa ilang panan-aw. Dili nila matangtang Siya gikan sa mga kamot nila. “Akong ipahiuli Siya, nagaingon ang Ginoo.” Ug sulod sa tulo ka adlaw nabanhaw gyud Siya, gipahiuli.

444 Human sa Pasko sa Pagkabanhaw, sa Iyang pagkabanhaw, miingon Siya, “Panglakaw kamo sa tibuok kalibutan, ug Ako magauban kaninyo. Ingon nga ang buhing Amahan nagsugo Kanako, ug ania Siya Kanako, sa maong pagkaagi Ako nagsugo kaninyo ug maanaa kaninyo. Ako’y kauban ninyo, hangtud sa katapusan sa kalibutan. Ang mga buhat, ang mao gihapong butang nga Akong gibuhat, aron pamatud-an nga Ako mao, pagabuhaton usab ninyo ang mao gihapong mga butang aron pamatud-an nga kamo mao gayud.” Gusto ko kana.

445 “Kini nga mga ilhanan maganunot kanila nga mga magtotoo,” dili mga nagapatoo-too lang, kondili mga magtotoo. Kita n’yo? “Kini nga mga butang nga Akong ginabuhat, buhaton ninyo kini ug panghimatud-an nga kamo usa gyud ka magtotoo. Maingon mismo sa mga buhat nga Akong gibuhat, tungod kay

ang buhing Amahan nagapuyo man Kanako. Dili Ako ang nagabuhat sa maong buhat; ang Akong Amahan kini. Ug dili kamo ang magabuhat sa mga buhat; Ako kini nga anaa kaninyo, ang magabuhat sa maong mga buhat.” Kita n’yo? “Karon, panglakaw kamo sa tibuok kalibutan.”

⁴⁴⁶ Sa laing pagkasulti, “Pagapormahon ninyo ang napaila na, Kanako, ingon nga usa ka Pangasaw-onon.” Kita n’yo? Bueno. “Ako magauban kaninyo. Ug Ako...mamahimo kamo nga kabahin Kanako. Kamo ang mamahimo Kong Pangasaw-onon. Ang Akong Kinabuhi maanaa sa inyong Lawas. Sama lang sa bana ug asawa nga usa na ka persona, kamo ug Ako mamahimo pud nga Usa na. Unya nianang adlaw kamo makaila nga Ako anaa sa Amahan, ang Amahan ania Kanako, ug Ako anaa kaninyo, ug kamo ania Kanako.” Hmm! Gusto ko gayud kana. Suko gyud kaayo niana si Satanas. Nakita n’yo ang pagka-Usa sa Dios? Ang tanan kung unsa ang Dios, gibubo Niya ngadto kang Cristo; ug ang tanan kung unsa si Cristo, gibubo Niya ngadto sa Iglesia. Mao kana. Ginahimo silang tanan nga Usa ra.

⁴⁴⁷ Karon ania. Mao nga, ang Pangasaw-onon usa ra ka Kahoy sa Kinabuhi. Sa ubang pagkasulti, sama ra sa bana ug asawa nga usa ra, si Cristo ug ang Iyang Pangasaw-onon Usa ra: mao ra mismo, mao ra nga Espiritu, mao ra nga mga buhat, mao ra nga mga ilhanan, tanan nang uban pa. “Kay ang mga buhat nga Akong ginabuhat pagabuhaton usab ninyo.” Hangtud asa man? “Sa tibuok kalibutan.” Unsa man ka daghan? “Sa tanang binuhat.” Husto ba?

Oh, paminaw mo og ayo karon, magpabuto na ko og usa ka magnum.

⁴⁴⁸ Ang Romanong ulod nga hantatawo hinay-hinay nga gikaon kanang Punoang Pangasaw-onon hangtud nga nakaabot kini sa mga gamut Niini. Ang mao gihapong Romano nga kahoy nga...Unsa ba nga matang sa kahoy ang miputol kang Cristo? [Nagaingon ang kongregasyon, “Romano.”—Ed.] Unsa ba nga matang sa kahoy ang miputol sa Pangasaw-onon ni Cristo? [“Romano.”] Sa unsa mang paagi? Pinaagi sa pagpuli og usa ka butang nga gawas sa Pulong. Busa, nakita n’yo, ang iglesiang Protestante nga wala nagadawat sa Pulong sa Dios usa mismo ka anak sa iglesiang Romano. Wala gayud ang Dios sukad-sukad, sa unsa mang panahon, nag-organisa og iglesia. Ang iglesiang Romano Katoliko mao ang unang organisasyon. Ug ang matag usa kanila mao’y mga anak, niya, nga nanag-organisa.

⁴⁴⁹ Mangamatay gyud sila uban kaniya. Miingon ang Biblia, nga, “Pagasunogon Niya ang iyang mga anak pinaagi og kalayo.” Pila man ang nasayod niana? Mao kana’y gisulti sa Biblia. Bueno, miingon ang Biblia nga ang trigo ug ang mga bunglayon dungan nga managtubo hangtud sa kaulahiing adlaw, dayon pagabugkoson Niya ang mga bunglayon (husto ba?), una, ug

pagasunogon ang mga niini. Ug pagadalhon ang trigo ngadto sa dapa. Husto ba? Ang mga bunglayon magkauban nga ginabugkos na diha sa organisasyon, Konpederasyon sa mga Kaiglesiahan, para sa atomikang pagsunog. Eksakto gayud. Apan ang Iglesia nagaandam na aron pagadalhon ngadto sa dapa, sa ingon ka sigurado gayud, para sa Pagsakgaw, kay ang babayeng may kagawasan dili man mahimong manununod nga uban ang babayeng-ulipon. Oooh, Igsoong Anthony!

Oh, ginahulat na nato ang pag-abot nianang malipayong adlaw sa Milenyum,
 Sa dihang moabot na ang atong mapanalanginong Ginoo ug ang nagahulat Niyang Pangasaw-onon pagasakgawon na;
 Oh! Ang akong kalag napuno sa kalipay samtang ako nagapamuhat, nagahulat ug nagaampo,
 Kay ang atong Ginoo mobalik na pag-usab sa yuta.

⁴⁵⁰ Alleлуйah! Oo, sir. Oh, pagasunogon Niya ang mga bunglayon. Ug ang trigo, pagadalhon Niya ngadto sa dapa.

⁴⁵¹ Ang Romanong ulod nga hantatawo hinay-hinay nga gikaon kanang Punoan, niadtong mga adlaw ni Pablo. Ingon niya, “Kumbinsido ako,” dinhi sa Kasulatan, “nga, sa tapos sa akong paggikan, adunay managpanungha nga mga tawo sa inyong taliwala, mga igsoon, nga daw sa nanagsul-ob og mga panit sa mga karnero, pero lobo sa kinasuloran, ug magabira sa kadaghanan ngadto kanila. Kay ang espiritu sa anticristo, nga inyong nadungog nga moabot sa kalibutan, anaa na sa kalibutan karon, nagapamuhat diha sa mga anak sa” (unsa?) “pagkadilimasinugtanon.” Dili-dilimasinugtanon sa (unsa?) sa Pulong. Mao kana. Hinay-hinay na nga nagasugod ang organisasyon.

⁴⁵² Nasabtan ba ninyo ang buot kong ipasabot, mga higala? Ang tanan nga nakasabot niana, moingon og, “Amen.” [Nagaingon ang kongregasyon, “Amen.”—Ed.]

⁴⁵³ Hinay-hinay na nga nagakaon! Unsa ma’y gibuhat niana? Nagsugod na kaniadto ang ulod nga hantatawo, kanang karaang lukton. Nga . . . nakita kadto ni Joel.

Paminaw karon. Paingon na kita sa pagtapos.

⁴⁵⁴ Nakita kadto ni Joel. Ug ingon niya, “Ang gibiyaan sa ulod nga dangaw-dangaw, gikaon sa dulon; ang gikaon sa dulon, pagkahuman gikaon sa lukton; ang gibiyaan sa lukton, aba, gikaon kini sa ulod nga hantatawo.” Mao kana’y gisulti niya. Ug eksakto gayud. Kadto mao ang Kahoy sa Dios. Ang Punoan, giputol niya Kadto, sa lukton. Bueno.

⁴⁵⁵ Ang Romanong ulod nga hantatawo hinay-hinay nga gikaon kanang Punoang Pangasaw-onon ug giut-ot Kini paingon sa mga gamut. Gidaut Kini hangtud sa pinakaubos, tanan-tanan! Bug-

os nga gidaut ang Punoan, sama sa gibuhat niya kang Cristo Jesus, ang Pamanhonon. Gidaut ang Pangasaw-onon hangtud sa pinakaubos, ug nagsugod og mga kredo ug mga denominasyon. Mao ra mismo nga insekto! Pero unsa man? Oh, himaya! Apan sa mga gamut Niini atua ang gitagana-nang-daan nga Binhi, ang Harianong Binhi ni Abraham. Dili Kini mahimong mamatay. Ang Pulong anaa sa mga gamut nga adunay saad, “Akong ipahiuli, nagaingon ang Ginoo.” Ang unsa man? “Ang tanang mga tuig nga gidaut sa ulod nga hantatawo, ang tanan nga gikaon sa dulon, ang tanan nga gikaon sa tanang uban pa nga mga insekto, Akong ipahiuli Kini, nagaingon ang Ginoo.”

⁴⁵⁶ Karon itandi kini sa niadtong miaging Dominggo, ug niadtong miagi pang Dominggo, kini nga mga Mensahe karon. Paminaw mo og ayo karon, samtang nagapaingon na kamo sa pagtapos. Matikdi.

⁴⁵⁷ “Akong ipahiuli, nagaingon ang Ginoo, ang tanan nga gikaon sa mga insekto. Akong ibalik pag-usab ang matag tipik Niini.”

⁴⁵⁸ Karon maglingkod lang nga hilum kung mahimo ninyo, sa pipila ka gutlo, ug paminaw mo og ayo. Pangandam kamo. Ug mag-ampo sa tibuok n’yong kasingkasing, nga ipadayag Kini sa Dios diha kaninyo.

⁴⁵⁹ Busa, hinay-hinay nang ginapahiuli ang saad sa Dios, kay miingon man ang Dios nga Iya Kining ipahiuli. Maingon nga Iyang gibanhaw ang Punoang Pangasaw-onon. . . Punoang Pamanhonon, pagabanhawon pud Niya ang Punoang Pangasaw-onon, tungod kay aduna ma’y Usa didto, sa ingon ka sigurado gayud. Unsa na man karon? Bueno. Busa nagasugod na ang saad sa Dios, “Akong ipahiuli, nagaingon ang Ginoo, ang tanan nga gikaon sa dulon, sa ulod nga hantatawo.”

Sama sa unang higayon, kaniadtong gitukod Niya ang unang Iglesia.

⁴⁶⁰ Hisgotan ko ang pipila ka mga Doktrina karon. Kung dili n’yo gustong toohan Kini, okey lang. Apan inyo lang. . . Mas maayo nga susihon n’yo Kini, una. Kita n’yo? Matikdi.

Giunsa man Niya pagpatubo kana nga Punoan, sa sugod pa lang? Oh, grabe!

⁴⁶¹ Nagahatag kini kanako og maayo gayud nga pagbati. Kabalo ko nga ako medyo dili gyud usa ka ministro, nga nagatindog dinhi sama niini, pero ako—ako—ako—gusto ko gayud ang akong ginasulti. Nasabtan n’yo ba ang buot kong ipasabot?

⁴⁶² Ug karon matikdi. Sama sa unang higayon, kaniadtong gisugdan Niya kadtong unang Iglesia nga gikaon sa Romanong ulod nga hantatawo, sa lukton, ug uban pa, nagsugod Siya sa pagpamatarung pinaagi sa pagtoo. Kang Juan Bautista.

⁴⁶³ Sa San Juan, sa ika-13, o, sa ika-17 nga kapitulo, ika-17 nga bersekulo, miingon si Jesus, “Balaana sila, Amahan, pinaagi sa

Kamatuoran: Ang Imong Pulong mao ang Kamatuoran.” Ang ikaduhang buhat mao ang pagpabalaan, sa Iglesia. Human sa pagpamatarung mao ang pagpabalaan.

⁴⁶⁴ Ug human niadtong gipabalaan sila, giingnan Niya sila nga magpabilin úsa sa siyudad sa Jerusalem, Lucas 24:49, hangtud nga masul-oban na sila og gahum gikan sa Kahitas-an. Ug didto gihimugso Niya ang Punoan, ang Espiritu Santo, Pentecostes; pagpamatarung, pagpabalaan, og bautismo sa Espiritu Santo.

⁴⁶⁵ Ug pagkahuman miabot si Cristo aron mopuyo Niini, aron ipamunga ang mga bunga. Amen. Husto ba?

Giwali ni Juan ang pagpamatarung.

⁴⁶⁶ Karon ania. Sa . . . Kana ang nagalangkob sa natural nga pagpanganak. Pag ihimugso na sa usa ka babaye ang bata, (Paminawa n’yo kini.), unsa man ang unang butang nga mahitabo sa babaye, unsa man ang mogawas? Ang, una, mao ang tubig. “Maghinulsol kamo, ug magpabautismo sa Ngalan ni Jesus Cristo,” pagpamatarung. Unsa man ang ikaduhang butang nga mahitabo sa babaye? Ang dugo. Husto ba? Dugo; pagpabalaan. Dayon unsa na man ang sunod? Ang kinabuhi. Tubig, dugo, espiritu.

⁴⁶⁷ San Juan, o, Unang Juan 5:7, 7:5, diay, nagatoo ko nga mao kana, gikaingon:

. . .adunay tulo nga nagapamatuod sa langit, ang Amahan, ang Pulong (Nga mao ang Anak.), ug ang ang Espiritu Santo: . . . kining tulo usa ra.

Ug adunay tulo nga nagapamatuod sa yuta, ang tubig, ang dugo, ug ang Espiritu; ug kini sila dili usa ra, kondili nagakahiusa sila.

⁴⁶⁸ Dili mo maangkon ang Amahan nga wala ang Anak; dili mo usab maangkon ang Anak nga wala ang Espiritu Santo. Apan mahimo ra ka nga mapamatarung nga dili gipabalaan; mahimo ra pud kang mapabalaan nga wala ang Espiritu Santo.

⁴⁶⁹ Unsa man kana, igsoong Nazarene? Gipabalaan sila ni Jesus Cristo, usa ka tuig ug unom ka bulan wala pa miabot ang Espiritu Santo. Husto ba? Gipabalaan sila ni Jesus Cristo.

⁴⁷⁰ Karon, maingon nga gihimugso Niya ang unang Punoang Pangsaw-onon nga gikaon sa dulon ug sa ulod nga dangaw-dangaw, ginapahiuli usab Niya ang ikaduhang Punoan, ginapatungha Niya Kini gikan sa gitagana-nang-daan nga mga gamut nga dili mamatay. Ingon nga anaa kini napahimutang sa daplin sa kasapaan. Nabuhi Kini sa niini nga mga tubig. Dili Niini mapakita ang Kaugalingon Niini, apan anaa Kini mismo dinha, bisan pa man.

⁴⁷¹ Karon nagasugod pud kini, matikdi, ang mao ra nga insekto; samtang ginapahiuli Niya ang mao gihapong butang pinaagi sa mao gihapon nga pamaagi.

472 Ang una, sa diha nga kanang Punoan nagsugod nga migawas gikan sa Katolisismo, si Martin Luther, ang nagwali og pagpamatarung. Ang ikaduhang manulonda mao si John Wesley, nga nagwali og pagpabalaan. Giwali ni Luther ang pagpamatarung, “Ang matarung mabuhi pinaagi sa pagtoo.” Giwali ni Wesley ang pagpabalaan, ang ikaduhang dili-malalis nga buhat sa grasya. Ug dayon miabot ang Espiritu Santo. Maingon nga gipatubo Niya ang maong Punoan, sa unang higayon, ania Siya nga ginapahiuli pag-usab, sa mao gihapong pamaagi, sa ikaduhang higayon. Nasabtan n’yo ba kana?

473 Matikdi. Ang mao rang insekto, kadtong gamay’ng dautan, ang mao rang insekto nga nagsugod ug mipatay niadtong Punoan sa sinugdanan, misugod na usab kanila nga mga sangang Lutheran, pero (unsa man?) dili niini mapatay Kini. Dili gyud niini mapatay Kini, tungod kay nagsulti na ang Dios, “Akong ipahiuli.” Misugod kana nga insekto sa kang Luther, aron patyon ang tanan nga mga sangang Lutheran. Nagpadayon kini ngadto kang Wesley, ug gipatay ang tanan nga mga sangang Wesley. Apan ang pinakamahinungdanong bahin sa Punoan padayon ra nga nagatubo.

474 Karon matikdi. Sa kaniadtong panahon, sa dihang napatay ang maong Punoan, gipatay gyud Kadto, hangtud mismo sa mga gamut sa dihang gipatay niini Kadto didto. Apan niining higayona, tungod kay gitagana-nang-daan ang Pulong, wala gyu’y unsa man ang makapugong Niini. Ang ingon sa Dios, “Akong ipahiuli. Bisan pila pa sila ka higayon mag-organisa, bisan unsaon pa nila pagbuhat ang *ingon niini*, *ingon niana*, o ang *uban pa*, Ako Kining ipahiuli.” Mao na kana. Ang tanang pagbugalbugal, pagbiaybiay, pagyubit, pagtawag og mga “holy-roller, walay pulos,” tanan na nga gusto n’yo. Miingon sa gihapon ang Dios, “Akong ipahiuli, nagaingon ang Ginoo.” Sa ingon ka sigurado nga gibanhaw Niya si Jesus gikan sa lubnganan, sa wala pa’y tulo ka adlaw, ilalum sa tulo ka dispensasyon, o sa tulo ka bahin, pagabangonon gayud Niya ang Iglesia ngadto sa kahupnganan ug gahum Niini. “Akong ipahiuli, nagaingon ang Ginoo.”

475 Unsa ma’y nahitabo? Ang maong karaang ulod nga hantatawo nagsugod na pud nga mikaon ug naghinungdan og mao ra gihapon nga matang sa mga kadaut nga gibuhat niya kaniadto, pero (unsa ma’y gibuhat niya?) ang nakaon lang niya mao ang mga sangang Lutheran. Wala gayud niya nakuha ang Espiritu nga anaa sa luyo niadto, nga anaa kang Luther, tungod kay padayon man Kining nabuhi. Dayon, miabot si Wesley. Ug human nga namatay si Wesley, kadtong halangdong propeta, human nga namatay si Wesley (unsa ma’y gibuhat nila?), nag-organisa sila, ug namatay ang tanang mga sanga, pero (unsa ma’y gibuhat Niya?) padayon nga nabuhi gihapon ang Iglesia, og nagpadayon mismo hangtud sa Pentecostal. Sa dihang nag-

organisa na pud sila (unsa ma'y nahitabo?), namatay ang mga sanga, pero (unsa?) nagpadayon ra mismo ang Iglesia.

⁴⁷⁶ Unsa na man? Ang mao gihapong butang nga gibuhat sa Pentecostal, ang mao rang karaan nga taktika, ang denominasyonhong kredo nga miut-ot Niini sa sugod pa lang, aron dauton ang Punoan—ang Punoang Pangasaw-onon, sa sinugdan pa lang, mao pud gihapon nga mga karaang taktika ang gigamit sa yawa ngadto niining ikaduhang Punoan, pero (unsa?) gitagana-nang-daan Kini sa Dios. Mao nga siguradong magpadayon gyud Siya, bisan unsa pa'y mahitabo. Kung kini lang. . . Kung wala gihimong ingon-ana, kaniadtong nag-organisa si Luther, nan natapos na unta kini didto mismo; natapos na unta kini nga sama sa uban; tingali'g nahimo na kini nga ikaduhang iglesiang Katoliko, iglesiang Romano Katoliko. Kita n'yo?

⁴⁷⁷ Apan, determinado gayud ang Dios. Ingon nga gilitok na Niya ang Iyang Pulong. Siguradohon mismo sa Iyang balaod nga mamahitabo kini. Bisan unsa pa kadaghang ulahi nga mga niyebe ang masinati Niini, mabuhi gyud Kini, sa gihapon. Mahimong makasinati kita og pagkabugnaw ug denominasyonhong panagkalahi, ug tanan na, apan mabuhi gayud kana nga Punoan sa ingon ka sigurado nga adunay buhi nga Dios aron himoon Kining buhi. Oo, sir. Miingon Siya, “Akong ipahiuli.”

⁴⁷⁸ Nasayod ko nga aduna kita'y ulahi na nga tingpamulak, ulahi na nga bahin sa panahon sa Pasko sa Pagkabanhaw nga moabot. “Nagalangay pa ang Dios sa Iyang Pag-abot,” ingon nila, ug tanan nang ingon niana. Ug gipatay na sa mabugnaw nga mga hangin ang daghang denominasyonhong mga sanga, apan dili gyud niini mapatay ang Kinabuhi nga gitagana-nang-daan.

⁴⁷⁹ “Ang mga langit ug yuta mangahanaw, apan ang Akong Pulong dili mahanaw.” “Ang tanan nga Iyang giila-nang-daan, Iyang gitawag: kadtong Iyang mga gitawag, Iyang gimatarung: kadtong Iyang mga gimatarung, Iya nang gihimaya.” Alleluyah! Nahisulat na kini sa Libro, sa Libro sa Kinabuhi nga iya sa Cordero, ug dili mahimong mamatay.

⁴⁸⁰ Tanan nga—tanan nga mga insekto nga mahimong buhian sa impiyerno diha Kaniya dili gayud makapugong Kaniya. Walay komunismo, Katolisismo, walay bisan unsa pa man ang makapugong Niini. “Akong ipahiuli, nagaingon ang Ginoo.” Tanang mga Romanong kahoy nga hinimo'g-tawo dili gyud magabitay Niini didto. Tanang mga lubnganan dili gyud magpapabilin Niini didto. Tanang mga dagkung bato sa denominasyon nga nakasap-ong sa pultahan dili gyud magpapabilin Niini didto sa sulod. “Akong ipahiuli, nagaingon ang Ginoo. Magkaaduna gyud og usa ka Pasko sa Pagkabanhaw. Pagabanhawon Ko kanang mao ra nga Iglesia sa mao gihapon

nga gahum Niini. Pagawason ko kanang Pangasaw-onon maingon sa kung unsa Siya kaniadto, pinaagi sa mao gihapong mga ilhanan, mao gihapon nga bunga, mao gihapong butang nga gibuhat nila kaniadto. Igabalik Ko Siya pag-usab. Akong ipahiuli, nagaingon ang Ginoo,” (ang unsa?) “ipahiuli ang tanan nga gikaon sa mga denominasyon, ipahiuli ang tanan nga gikaon sa organisasyon. Akong ipahiuli, nagaingon ang Ginoo, ang tanan niini.”

⁴⁸¹ Karon, moingon mo, “Unsa na man kadtong mga nahitipas, diha sa denominasyon?”

⁴⁸² Ang Dios ang maayo nga Tig-alima. Giputlan Niya ang Punoan, kana lang, giputol ang tanang patay nga mga sanga. Unsa ma’y buhaton Niya? Sunogon sila, didto. Eksakto. Ang Dios man ang Tig-alima sa—sa niini nga Punoan. Siya ang nagaatiman Niini. Ginabantayan Niya ang Iyang Kabilin. Siya . . . Unsa ba ang Iyang Kabilin? Ang Kaugalingon Niyang Pulong. Ginabantayan Niya ang Iyang Pulong, aron panghimatud-an Kini; aron bantayan Kini; siguradohon kung asa Niya Kini pagadalhon. Ipahiuli Niya. Busa sa diha nga kining mga iglesia misugod nga nag-organisa, ug mga butang nga ingon niana, ginaputol lang Niya ang mga niini, ug magapadayon mismo ang Iglesia.

⁴⁸³ Sa dihang—sa dihang miingon ang Lutheran, “Mamahimo kitang usa ka organisasyon. Mamahimo kitang ingon ka daku sama sa Katoliko.” Bueno. Giputol lang Niya ang maong sanga. Ug gipapadayon Kini ni Wesley, nagpatungha og usa pa ka propeta. Dayon, sa diha nga gibuhat kini ni Wesley . . . Bueno, namatay si Wesley, ang halangdong propeta. Unsa ma’y gibuhat nila? Giorganisa kini. Unya miabot ang Pentecostal. Sa diha nga namatay kini, giputol Niya kana. Kini’y padayon ra nga nagatubo. Kita n’yo? Iyang ipahiuli.

⁴⁸⁴ Asa ba nagatubo ang mga bunga? Dili kana nagasugod dinhi sa ubos. Nagasugod kana sa ibabaw. Asa ba unang nagadan-ag ang adlaw diha sa Punoan? Ah, himaya! Sa pang-gabii nga Kahayag, sa ibabaw sa Punoan. Amen. Dili dinha sa mga sanga nga anaa sa ubos, kondili dinha sa ibabaw sa Punoan kon diin dinha nagakahinog ang bunga.

Amen!

Gihigugma ba ninyo Siya? Amen!

Alagaran ba ninyo Siya? Amen!

Ginatoohan ba ninyo Siya? Amen!

Nagatoo gyud ko Kaniya, sa tibuok kong kasingkasing.

⁴⁸⁵ Karon, unsa na man? Pagaputlon Niya kadtong dugay nang patay nga mga sanga samtang nagatubo Kini, kadtong tanan nga mga sanga nga organisasyon, hangtud nga moabot Kini sa ibabaw sa maong Punoan. Dinha Niya kuhaon ang Iyang bunga. Karon matikdi. Ginaputlan Kini sa Dios. Bueno. Mga

patay na sila, ug dili na makaduol sa—sa Presensiya sa Dios, dili makaapil sa unang pagkabanhaw. Kondili kauban sa . . . Ang bunga sa Punoan sa orihinal nga organisa- . . . Punoan sa Dios. Mahidangat sila sa pundok sa organisasyon, mao nga dili sila mahiuban sa bunga sa maong Punoan.

⁴⁸⁶ Karon tan-awa. Wala gayud sukad nagpatungha ang Dios og usa ka organisasyon. Ang iglesia ang nagabutang og mga sumbak, usa ka organisasyon, ug ginaputol kini sa Dios, ginaputol ang agianan sa kinabuhi niini. Ginapamunga man niini ang bunga nga organisasyon.

⁴⁸⁷ Apan kung kana nga Punoan manalingsing og usa ka sanga nga nagagikan mismo sa maong Punoan, nan igapamunga Niini ang mao rang gipamunga Niana. Busa, nakita n'yo, kung unsa ang usa nga nauna. Ug gipadala sa Roma ang ilang mga bakukang didto ug gikaon Kini, apan magapatubo man ang Dios og Usa nga ingon ka habog nga dili niini mahilabtan Kana. Motubo Kana nga habog gayud. Amen. Ako . . . Padayon kita. Ang maong Punoan napaingon sa usa ka dapit ngadto sa usa na usab, gikan sa usa ka dispensasyon paingon sa usa na usab ka dispensasyon. Gikan kang Luther, mipaingon Kini kang Wesley; gikan kang Wesley, mipaingon sa Pentecostal; gikan sa Pentecostal, mipaingon na Kini sa Pulong.

⁴⁸⁸ Mao nga kini ang Pasko sa Pagkabanhaw pag-usab para sa tinuod nga mga magtotoo sa Iyang walay-pagkapakyas nga Pulong. Kini ang Pasko sa Pagkabanhaw. Usa kini ka pagkabanhaw. Aduna ang Dios og mga tawo sa tanang dapit. Kini ang Pasko sa Pagkabanhaw para kanila. Ngano man? Tungod nga nabanhaw na sila, amen, nabanhaw gikan niadto nga mga kredo ug mga denominasyon. Migawas mismo gikan sa mga niini. Kini ang Pasko sa Pagkabanhaw pag-usab. Dugay nang natago ang Harianong Binhi diha sa mga gamut, ang Pulong, natago dinhi niining Pulong, sulod sa daghang mga katuigan, ug mga katuigan, ug mga katuigan, ug nagasugod pa lamang karon nga mapadayag. Kini ang panahon sa Pasko sa Pagkabanhaw. Gitagana-nang-daan sukad pa sa pagkatukod sa kalibutan, kini nga Iglesia nagasugod nang nagatungha. Matikdi n'yo kung unsa nga nagtagana-nang-daan ang Dios, sa sinugdan. Aduna ako'y . . .

Bueno, isulti ko kini, bisan pa man. Bueno.

⁴⁸⁹ Matikdi dinhi, nga, ingon nga ipahiuli ang unang hingpit nga Punoan sulod sa tulo ka adlaw human sa pagkamatay Niini. Human sa pagkamatay sa unang Punoan, gipahiuli Niya Kini sulod sa tulo ka adlaw. Husto ba? Gipahiuli kini! Karon ang Punoang Pangasaw-onon igapahiuli usab sulod sa tulo ka kapanahonan, tulod ka hugna, diay. Sa tulo ka hugna, igapahiuli Kini. Karon ania. Unsa man? Pagpamatarung, pagpabalaan, bautismo sa Espiritu Santo; usa, duha, tulo.

490 Karon matikdi. Human sa tulo ka adlaw, ang unang Punoan gipahiuli nga sama sa kung unsa mismo sa sinugdan, nga adunay mao gihapon nga mga ilhanan, mao gihapon nga mga katingalahan. Mibalik si Jesus, ang mao gihapon nga Jesus, nga ginabuhat ang mao gihapong butang. Sa pagtapos sa ikatulo nga adlaw, nagpakita ang mga ilhanan, dili sa pagtapos sa unang adlaw. Oh, igsoon! Nagalaum ako nga nasabtan ninyo kini. Dinha sa ikatulong adlaw nga napaila ang tinuod nga kapadayagan ni Cristo, sa *pagtapos* sa ikatulong adlaw. Kita n'yo? Matikdi. Nasabtan ba ninyo kini? [Nagaingon ang kongregasyon, "Amen."—Ed.]

491 Dili sa unang adlaw, patay nga porma; ikaduhang adlaw, aduna na'y mga dungog-dungog, kita n'yo, o, sa ikaduhang adlaw diay, patay sa gihapon kadto; si Luther, si Wesley. Pero sa pagsugod sa ikatulong adlaw, aduna na'y mga dungog-dungog. Wala pa sa unang adlaw, kang Luther; wala pa sa ikaduhang adlaw. Ug sa ikatulong adlaw, sa dispensasyon sa Balaang Espiritu, aduna na'y dungog-dungog, nga, "Siya mao sa gihapon kagahapon, karon, ug hangtud sa kahangturan."

492 Apan sa *pagtapos* sa ikatulong adlaw, didto na Niya gipaila ang Iyang Kaugalingon, miabot sa taliwala nila mismo, miabot sa taliwala sa Iyang katawhan ug miingon, "Tan-awa n'yo Ako. Ako Mao sa gihapon."

493 Nagpadayon ang patay nga mga porma hangtud nga nakadangat sila sa Pentecostes, dayon aduna na'y dungog-dungog, nga, "Siya kadto."

494 Karon, dinhi sa kaulahiag adlaw, ania Siya mismo uban kanato, nga nagapanglihok mismo sa taliwala nato. Sa *pagtapos* sa ikatulong adlaw, nagpakita Siya ug gipakita kanilang tanan ang Iyang ilhanan sa pagkabanhaw, nga Siya'y buhi gayud, mao sa gihapon kagahapon, karon, ug hangtud sa kahangturan, buhi nga mga bunga sa Iyang Presensiya. Buhi nga mga bunga sa Iyang Presensiya! Nasabtan na ba ninyo? [Nagaingon ang kongregasyon, "Amen."—Ed.] Napadayag sa mismong pagtapos na sa adlaw, kaniadtong nagpakita Siya ngadto kanilang tanan, sa Iyang Iglesia. Amen. Ngano man? Tungod nanagkatigum silang tanan, oh, amen, sa pagtapos na sa ikatulong adlaw.

495 "Ang pang-gabii nga mga Kahayag," miingon ang Biblia, "magadan-ag sa kaulahiag mga adlaw." Ang pang-gabii nga Kahayag mao gihapon nga Kahayag nga ania sa Kasadpan, nga mao ra nga Kahayag nga atua kaniadto sa Sidlakan. Ug ang mao ra nga Kahayag nga midan-ag sa Sidlakan, nga nagpatubo sa unang Iglesia nga gipatay sa mga Romano pinaagi sa ilang-ilang paganong pagsimba ug uban pa, sa pang-gabii nga Kahayag mao gihapon kini nga Kahayag kaniadto. Karon matikdi, ang mao gihapon nga Kahayag!

496 Ug unsa ma'y hinungdan nga miabot ang pang-gabii nga Kahayag? Para sa unsa man ang pang-gabii nga Kahayag? Ang ipahiuli. Whew! Nasabtan n'yo ba? [Nagaingon ang kongregasyon, "Amen."—Ed.] Ang pang-gabii nga Kahayag mao'y para sa mao gihapon nga katuyoan sama sa pang-buntag nga Kahayag, ang ipahiuli kung unsay giputol kaniadto sa Mangiub nga mga Kapanahonan, pinaagi sa Roma. Igapahiuli sa Dios, pinaagi sa pagdan-ag sa pang-gabii nga Kahayag (ang unsa?), ipahiuli pag-usab ang tibuok Pulong sa Dios, ang bug-os nga pagkapinadayag ni Cristo sa Iyang Iglesia. Ang tanan-tanan nga gibuhat Niya kaniadto, sa eksaktong paagi mismo nga gibuhat Niya, mahitabo pag-usab sa pang-gabii nga Kahayag. Nasabtan n'yo ba ang buot kong ipasabot? Oh, dili ba kahibulongan kana? ["Amen."] Ug ang mahibaloan nga nagapuyo na kita dinhi mismo aron makita Kini karon, ang pang-gabii nga Kahayag, nga eksaktong sumala gayud sa propesiya. Miabot ang pang-gabii nga Kahayag aron ipahiuli ang unsa? Aron ipahiuli ang gikaon sa mga insekto.

497 Misugod Kini sa pagtubo, ug dayon unsa ma'y gibuhat niini? Nahimo kining denominasyon, mao nga giputol sila sa Dios, gibugkos sila, gipadaplin sila, gipasagdan sila nga magpadayon ug mag-organisa. Dayon miabot ang usa nga misunod; gibugkos Niya sila, gipadaplin sila. Nagpadayon ra ang Punoan. Dayon gibugkos Niya sila, gipadaplin sila, og miingon, "Karon, usa sa niining mga adlaw pagasunogon ra unya sila." Bugkoson sila diha sa ilang organisasyon.

498 Pero pagkahuman unsa na? Dinha mismo sa ibabaw sa Punoan kon diin ang bunga mahinog una, husto kana, sa ibabaw mismo sa Punoan. Busa ang sa ibabaw sa Punoan, dinhi, ang makakita sa pang-gabii nga Kahayag.

499 Bueno, aduna si Noe og tulo ka lawak sa iyang arka kaniadto. Ang usa ka lawak para sa mga hayop nga nagakamang. Kita n'yo? Ang ikaduhang lawak para sa mga kalangaman. Apan ang ibabaw nga lawak mao'y kon asa atua ang kahayag. Midan-ag ang kahayag, una, wala gayud miabot sa unang andana, ikaduhang andana, kondili sa ibabaw nga andana.

500 Wala ginapamunga una sa punoan ang bunga niini sa ubos, sa ikaduha, nga sama niana. Giputol na kadtong tanan, tungod sa organisasyon.

501 Apan sa ibabaw nga bahin kini, kon diin, "Akong ipahiuli, nagaingon ang Ginoo. Ipadala Ko ang pang-gabii nga Kahayag. Igabalik niini, igabalik ang Pulong, nga ginapadayag Kini. Akong ipahiuli ang tanan nga gisaad Ko. Ang tanan nga Akong gisaad, ipahinabo sa mao ra nga Balaang Espiritu, ipamunga ang mao ra nga mga ilhanan. Magkaaduna Ako og Pasko sa Pagkabanhaw, usa ka pagkabanhaw para sa Pangasaw-onon, sama ra mismo sa Akong gibuhat kaniadto para sa

Pamanhonon.” Kita n’yo? Nagaabot ang pang-gabii nga mga Kahayag aron modan-ag, sama ra usab sa pang-buntag, nga may mao ra nga mga ilhanan, mao ra nga mga butang. Ang mao ra nga Kahayag ang magpabunga og mao ra nga bunga nga aduna sila kaniadto, kung nagadan-ag Kini sa mao ra nga Punoan. Amen. Nagapamatuod gyud nga natuman na karon ang Iyang Pulong, “Akong ipahiuli, nagaingon ang Ginoo.”

⁵⁰² Karon paminaw mo og ayo. Bueno, adunay . . . Paminaw mo karon. Ayaw n’yo Kini sipyata karon. Aduna kaniadto og upat ka mensahero sa kamatayon.

⁵⁰³ O, mas gusto ba ninyo nga tapuson na lang nato? Mas—mas gusto ba ninyo nga manguli na lang kita og sayo? [Nagaingon ang kongregasyon, “Dili.”—Ed.]

⁵⁰⁴ Paminaw gyud mo og ayo karon. Ania. Adunay upat. Upat ka mensahero sa kamatayon ang nagpatay niadto nga Punoan. Husto ba? Unsa man kadto? Ulod nga dangaw-dangaw, dulon, lukton, og ulod nga hantatawo. Husto ba? Upat ka mensahero sa Romanong mga yawa, mga dogma, ang nagpatay niadto nga Punoan. Gikaon sa usa ang bunga Niini; gikaon sa usa ang panit Niini, o, gikaon ang mga dahon Niini; gikaon pud sa usa ang panit Niini; gikaon pud sa usa pa ang Kinabuhi. Husto ba? Upat ka mensahero sa mga dogma ang mipatay sa Punoan, tanan gawas lang sa mga gamut.

⁵⁰⁵ Ug kung upat ka mensahero sa kamatayon ang mipatay sa Punoan, nan upat pud ka mensahero sa Kinabuhi ang mopahiuli sa Punoan. Nasabtan n’yo ba kini? [Nagaingon ang kongregasyon, “Amen.”—Ed.] Amen. Kay miingon man ang Dios, “Akong ipahiuli Kini.” Ipahiuli gyud Niya Kini. Sa unsa mang paagi? Ingon nga upat ka mensahero sa kamatayon, ang mipatay Niini, kung ingon-ana upat pud ka mensahero sa Kinabuhi ang mopahiuli Niini. Unsa man ang una? Si Martin Luther, pagpamatarung. Unsa man ang ikaduha? Si John Wesley, pinaagi sa pagpabalaan. Unsa man pud ang ikatulo? Ang Pentecostal, nga adunay pagpahiuli sa mga gasa, ang Espiritu Santo, bautismo sa Espiritu Santo. Unsa ba ang ikaupat? Ang Pulong. Unsa? Ang Pulong. Adunay upat ka halangdong propeta.

⁵⁰⁶ Ang usa kanila, si Martin Luther, misugod siya pagpadan-ag og usa ka Kahayag. Aduna kaniadto og diyutay’ng Kahayag, usa lamang ka gamay kaayo nga kusog, sa pagpamatarung.

Dayon miabot si Wesley, nagakakusgan na, pagpabalaan.

⁵⁰⁷ Human ni Wesley, miabot ang mas kusgan kay kaniya, ang Pentecostal, ang bautismo sa Espiritu Santo, sa usa na usab ka halangdong propeta. Kita n’yo?

⁵⁰⁸ Apan sa kaulahiang mga adlaw, sa Malaquias 4, moabot si Elias nga dala ang mismong Pulong. “Ang Pulong sa Ginoo miabot sa propeta.” Sa pang-gabii nga mga Kahayag, siya moabot, aron magpahiuli ug magapabalik. Sa unsa?

“Magapabalik sa mga kasingkasing sa mga anak ngadto sa Pagtoo sa Dios.” Ikaupat nga Kahayag!

509 Gikaon Kini sa upat ka tigpamatay. Gidaut Kini sa upat ka mensahero. Gipatay Kini sa upat ka mensahero sa kamatayon, pinaagi sa mga dogma.

Upat pud ka mensahero sa pagkamatarung ang magpahiuli Kaniya.

510 “Panagna, anak sa tawo. Mabuhi pa ba kining mga bukoga?” Unta aduna pa kita’y oras. Gisulat ko kana dinhi, pero laktawan ko na lang kana. “Panagna. Mabuhi pa ba kining mga bukoga?” Unsa ba ang upat ka hugna sa pagtungnga niana nga Iglesia? Unsa ba ang upat ka hugna sa pagtungnga sa uga nga mga bukog ni Ezekiel? Pero miabot lamang ang Kinabuhi, dili kaniadtong anaa na sa mga niadto ang ugat sa panit, kondili sa dihang gihuypan sila og hangin. Mao kadto ang higayon nga mibalik ang ikaupat nga Mensahe sa Kinabuhi.

511 “Akong ipahiuli, nagaingon ang Ginoo.” Alleluyah! Himaya! Dalaygon ang Dios. Moabot gayud ang ikaupat nga Kahayag, nga magpabunga og mao ra nga mga ilhanan. Matikdi. Gibalik kaniadto sa pagpamatarung ang unod.

Gibalik pud sa pagpabalaan ang panit sa kahoy, ang doktrina sa pagkabalaan.

512 Unsa man ang nagpabalik sa dahon? Mga Pentecostal. Unsa man kini? Mga Pentecostal, mga dahon, ginapalakpak ang ilang kamot, sa kalipay, kasadya, Pentecostal.

513 Unsa na man? Ang ikaupat mao ang Pulong, Mismo. Ang Pulong nga nahimong unod, mga bunga nga kapanghimatuoran sa ilhanan sa pagkabanhaw nga sa katapusan gipamunga ni Cristo, human nga naitanum ang pagpamatarung, naitanum ang pagpabalaan, bautismo sa Espiritu Santo. Namatay ang mga organisasyon. Ug gipasentro pag-usab ni Cristo ang Iyang Kaugalingon sama niadtong taklob sa piramide. Unang laray, pagpamatarung; pagpabalaan; bautismo sa Espiritu Santo; dayon ang pag-abot na sa maong Taklob.

514 Unsa man kini? Kanang pundok nga may Espiritu Santo ginatapyas na aron nga mohaum kini sa mao ra nga matang sa ministerio nga aduna Siya kaniadtong paggikan Niya, aron, pagmobalik na Siya, pagasakgawon niini ang tibuok butang para sa Pagsakgaw, ingon nga ang mga gipamatarung na, gipabalaan na, ug may bautismo na sa Espiritu Santo. Magabarug pag-usab ang piramide. Mabuhi pag-usab ang Panimalay sa Dios. Motubo na pag-usab ang Kahoy sa Kinabuhi.

Mga nasud nanagkabulag, nagakahigmata na ang Israel,
Mga ilhanan nga gipanagna na sa mga propeta;

Inihap na lang ang mga adlaw sa Gentil,
inubanan sa mabug-at nga kasakit;
“Balik na, Oh mga nagkatibulaag, sa inyong
kaugalingong yuta.”

Ang adlaw sa katubsanan haduol na,
Nangaluya na sa kalisang ang kasingkasing sa
mga tawo;
Pagpapuno sa Espiritu, hikaya ug limpyohi ang
inyong mga lamparahan,
Paghangad! Tungod haduol na ang inyong
katubsanan.

Nagapamakak nga mga mining propeta, ang
Kamatuoran sa Dios ginapanghimakak nila,
Nga si Jesus ang Cristo mao ang atong Dios;
(Amen.)

Apan kita manglakaw diha sa gilakwan sa mga
apostoles.

Kay ang adlaw sa katubsanan haduol na,
Nangaluya na sa kalisang ang kasingkasing sa
mga tawo; (Sa mga atomika ug tanan nang
uban pa.)

Mao nga pagpapuno sa Espiritu, hikaya ug
limpyohi ang inyong mga lamparahan,
Paghangad! Tungod haduol na ang inyong
katubsanan.

⁵¹⁵ Amen. Ipahiuli ang tanang mga ilhanan! Ang ilhanan kang Lot sa katapusang panahon. Nahisgotan na nato kana. Kung unsa nga si Lot. . .Kini nga Manulonda, ni Jehovah nga nahimong unod sa taliwala sa mga tawo, milingkod Siya nga nakatalikod sa balongbalong ug miingon, “Asa ba si Sarah nga imong asawa?”

“Anaa sulod sa balongbalong sa likod Mo.”

⁵¹⁶ Miingon Siya, “Pagaduawon Ko kamo.” Ug mikatawa man si Sarah. Mao nga miingon Siya, “Nganong mikatawa man si Sarah?” Ang maong babaye nga anaa sa sulod sa balongbalong kaniadto. Amen.

⁵¹⁷ Miingon si Jesus nga mahitabo ang mao gihapong butang sa Pag-abot na. Oh, kung ingon-ana ang pang-gabii nga Kahayag, sa Malaquias 4, moabot na nga magadan-ag diha sa kangitngit, amen, aron ihatud ang pang-gabii nga Kahayag sa gitagana-nang-daan nga Pulong. Alleluyah! Mamahimong unsa ba kanang ikaupat nga Mensahe? Unsa ba kanang ikaupat nga mensahero? Aron ipadan-ag ang Kahayag sa Pulong. Gitagana-nang-daan ang Pulong. Siguradong moabot gyud Kini. Siguradong aduna gyu’y mamuhat niini, tungod kay miingon ang Dios, “Akong ipahiuli, nagaingon ang Ginoo. Akong ipahiuli.” Oo. Ang pang-gabii nga mga Kahayag moabot

na nga magadan-ag mismo, nianang gitagana-nang-daan nga Pulong. Oo, sir.

Oh, it shall be Light in the evening time,
The path to Glory you will surely find;
In the water way, is the Light today,
Buried in the precious Name of Jesus.
Young and old, repent of all your sins,
The Holy Ghost will surely enter in;
For the evening Lights have come,
It is a fact that God and Christ are One.

⁵¹⁸ Mao kana Sila, Usa ra, nga magkauban; Usa ra, nga ania kanato. Ang mao ra nga mga ilhanan nga dili arang mabuhat sa mga tawo, ginapadayag na mismo, ginapahayag na, ang Pulong, aron ipagitib ang gitagana-nang-daan nga Pulong sa Dios, gikan sa mga gamut sa Kahoy nga kaniadto pa, gisalikway sa tanang mga denominasyon, ug gisalikway, nga gisalikway. Apan aduna gyu'y moabot nga usa ka Kahayag. Adunay moabot nga usa ka Kahayag, nga mosubang.

⁵¹⁹ Asa man, didto ba sa Jerusalem? Dili, sir. Ang pang-gabii nga mga Kahayag dili man mosubang sa Jerusalem. Ang pang-gabii nga mga Kahayag nagapaingon (sa asa man?) sa Kasadpan. Nagkaaduna na sila sa panahon nila kaniadto ug gisalikway Kini.

⁵²⁰ Apan ang pang-gabii nga Kahayag mosubang sa Kasadpan (para unsa?), aron magadan-ag sa Pulong (unsa man?), aron pahinogon ang bunga, og ipagitib ang Punoang Pangasawonon nga may mao ra nga mga ilhanan, mga katingalahan, ug mga bunga nga aduna sila kaniadto sa sinugdan. "Sa panahon sa kagabhion motungha ang Kahayag." Husto. Oh! Dayon igapamunga sa Pulong ang bunga Niini sa panahon Niini. "Dili Kini malaya, kondili igapamunga Niini ang bunga Niini," ang ingon ni David, "sa Iyahang mga panahon," amen, ang mao sa gihapon nga bunga nga aduna Kini sa sinugdan kaniadto.

⁵²¹ Karon ingon nga ang Iyang Pulong anaa na sa Iyang gitagana-nang-daan nga hugna og maingon nga anaa na gyud Kini sa Iyaha karon, ug makita nato nga kini nga mga Pulong bug-os nang napadayag. Unsa man kini? Usa kini ka hingpit nga pagpanghimatuod nga haduol na ang Pag-abot sa Ginoo, ug ang panahon nga gisulti Niya kaniadto, "Akong ipahiuli, nagaingon ang Ginoo, ang tanan nga gibiyaan niadtong mga ulod, tanan nga gibiyaan sa mga Methodist, tanan nga gikaon sa ulod nga hantatawo, og tanan nang gibuhat niini didto, hangtud nga bug-os na nila Kining gidaut. Apan Akong ipahiuli, sa panahon sa kagabhion." Oh, grabe! Whew!

Sa hunahuna ko halos makawali na gyud ko karon, sa tinuod lang.

Oh, how I love Jesus,

Oh, how I love Jesus,
 Oh, how I love Jesus,
 Because He first loved me.
 I'll never forsake Him,
 I'll never forsake Him,
 I'll never forsake Him,
 Because He first loved me.

522 Amen. Di ba gihigugma man ninyo Siya? Gihigugma ko gayud Siya sa tibuok kong kasingkasing. Puede na ba kitang magpahigayon og linya sa pagpaampo? [Nagaingon ang kongregasyon, "Amen."—Ed.]

523 Amahan nga Dios, sa Imong mga kamot akong—akong ginatugyan kini nga Mensahe. Bisan pa man nga putol-putol Kini, sa unsa mang paagi ginaampo ko nga ang Balaang Espiritu magauban unta Niini sa niining mga teyp, ug sa mga kanasuran. Ug kon ugaling pagakuhaon na ako sa yuta, hinaut nga mabuhi Kini, Ginoo. Ingon nga Pulong Mo man Kini. Ipadan-ag ang pang-gabii nga Kahayag, Ginoo, ipagitib kining mahimayaong Pangasaw-onon ni Cristo. Panalangini Kini, Ginoo. Hinaut nga dili Kini magabalik Kanimo nga walay kapuslanan. Hinaut nga matuman Niini kung unsa'y katuyoan Niini. Itugot kini, Amahan. Mamaimo ang tanang mga pagdayeg.

524 Karon, nasayod kami, Amahan, nga bisan unsa pa'y among isulti, Kini mao sa gihapon ang Pulong ug nagatoo kami Niini. Apan among ginatinguha Kanimo, Ginoo, sa niining buntag sa Pasko sa Pagkabanhaw, nga Imong pamatud-an sa niini nga kongregasyon, tingali aniay pipila dinhi sa una pa lang nilang higayon, nga Ikaw ang mao sa gihapon nga Jesus, nga Ikaw dili usa ka patay nga porma, kondili buhi gayud Ikaw, nga nabanhaw nga Dios, og nga buhi Ikaw sa among taliwala karon. Itugot kana, Amahan, ug pagadayegon Ka namo, pinaagi sa Ngalan ni Jesus. Amen.

525 Pila man ang ania karon nga mga may sakit? Patan-aw sa inyong mga kamot. Ipataas lang ang inyong mga kamot. Oh, si . . .

526 Si Billy Paul...Mikuha ba siya...Sa hunahuna ko nanghatag siya og mga prayer kard. Dili ba? [Nagaingon ang usa ka igsoong lalaki, "Oo."—Ed.] Unsa man ang mga niini? ["E, uno hangtud usa ka gatus."] E, uno hangtud usa ka gatus. Dili man nato sila matawag tanan, pero motawag kita og pipila kanila. Tindog lang mo dinhi dapit, kung mahimo.

527 Kinsa ma'y aduna og numero uno? Patan-aw sa numero uno. E, numero uno, ipataas ang imong kamot. Sa prayer kard; tan-awa n'yo ang inyong kard. Kung mahimo ninyong motindog, sige. Numero uno.

528 Bueno, sigurado ba ka nga husto ang anaa sa imoha? Sige. Sige. Sige na, magsugod na kita sa kon asa man. [Nagaingon si

Igsoong Neville, “Anaa diay dinha.”—Ed.] Oh, bueno, okey. Kung anaa man sa imoha kana, magsugod kita dinha, kung ingon-ana. Okey.

⁵²⁹ Numero uno, duol lang dinhi dapit, kung makalakaw ka. Kung dili man, bueno, alsahon ka namo. Kita n’yo? Sige. Numero uno.

⁵³⁰ Numero dos. Ipataas ang imong kamot, sa gilayon karon. Numero dos, duol dinhi.

Numero tres. Dinhi mismo, sir.

Numero kuwatro, numero kuwatro.

⁵³¹ Numero singko. Karon, ang tanan manglingkod lang úna sa pipila ka gutlo. Numero singko.

⁵³² Numero sais. Ipataas ang imong kamot sa gilayon. Numero sais. Sais, sais, patan-aw niini, palihog. Adunay nagatudlo sa ilang kamot. Wala ko . . . Oh, gikan sa . . . Anaa siya luyo sa lawak dinha. Sige. Numero sais. Bueno. Kadiyut lang ha.

Siete, siete. Sige, ang gining nga anaa dinha sa luyo. Otso.

⁵³³ Karon, kung mahimo magpabilin lang ang tanan sa inyong . . . Palihog, sa makadiyut lang karon. Mahilumon lang gayud. Karon, kini ang mamahimong kapanghimatuoran. Kini ang kapanghimatuoran.

⁵³⁴ Sais, siete. Uno, dos, tres, kuwatro, singko, sais, siete. Saka mo dinha. Sige. Siete. Sige, sir, maayo kana.

⁵³⁵ Otso. [Nagaingon si Igsoong Neville, “Siya ang otso.”—Ed.] Otso, otso. Sige, igsoon. Otso, nuebe, diyes. Diyes, onse, dose.

⁵³⁶ Bueno, mora’g mihunong na kamo sa pagduol. Bueno, magsugod kita dinha. Okey lang kana. Siguro sa pipila ka gutlo . . . Sige.

Karon mag-ampo kita.

⁵³⁷ Amahan nga Dios, usa lang ka Pulong gikan Kanimo mahimong mahinungdanon na gayud. Itugot—itugot—itugot nga makita sa mga tawo, Ginoo. Ako—gipaningkamotan ko nga magmatinuoron, gipaningkamotan kong isulti kanila ang Imong Pulong. Ginoo, pasayloa ang mga kasaypanan sa Imong alagad. Ako—ako gayu’y, ako—nakabuhat gyud ako og ingon ka daghan, Ginoo. Ako—ginaampo ko nga dili Mo unta tanawon ang sayup sa Imong alagad, kondili tan-awon Mo ang Imong Pulong, nga ginapaningkamotan kong iwali. Ginoo, ginapasalamatan ko Ikaw tungod Niini. Malipayon ako, sa tibuok kong kasingkasing. Ginoo, labaw pa gyud Kini sa kinabuhi, alang kanako. Ginatugyan ko ang akong kinabuhi, sa unsa mang orasa, alang Niini. Ako—nasayod ako nga tinuod Kini. Pulong Mo Kini.

⁵³⁸ Ug pasayloa intawon ko sa akong binurong nga mga pamaagi, Ginoo. Makadaghang higayon nga ako—nagapakatawa

ako, nga dili ko unta angay'ng buhaton. Ginakaulaw ko kadto, Ginoo. Naggikan lang gyud ako sa ingon-ana nga matang sa pamilya. Sayloan Mo unta kadto, kung mahimo, Amahan, kung itugot Mo. Taboni kadto sa Imong Dugo. Mao kana'y ginapangamuyo ko Kanimo nga buhaton. Basta, ginasugid ko kini. Dili Mo man masayloan kini, apan mapasaylo Mo ako sa diha nga isugid ko kini.

⁵³⁹ Karon, gisugid ko ang akong mga sala. Ginasugid ko usab ang mga sala sa niining mga tawo. Ginaampo ko, Dios, nga pasayloon Mo sila, ang matag usa.

⁵⁴⁰ Ug ang mga tawo, hinaut nga maamgo nila nga wala kami nagasulay nga magpakaaron-ingnon lang sa kung unsa nga matang sa buhat. Kondili ang Balaang Espiritu Kini sa kaulahiing mga adlaw, nga nagapamatuod sa Iyang Pulong, maingon nga bag-ohay ko lang gisulti Kini. Apan, Amahan, bisan unsa pa man, usa lang ako ka tawo. Ug kung gisulti ko Kini, moingon sila, "Interpretasyon ra niya kana. Ingon niana ang panghunahuna niya mahitungod Niini." Apan, Amahan, kung mosulti Ka lang ug pamatud-an nga husto Kini, nan kinahanglan úna nila, kinahanglan nilang moagi Kanimo, aron mapaduol Niini, kung ingon-ana man, Ginoo. Dayon dili Kini mamahimong interpretasyon ko; kondili Imoha mismo. Itugot kini, Ginoo. Ug kung ako Imong alagad, ug—ug—ug napasaylo na ang akong mga sala, ug gitawag Mo ako para niini nga buluhaton, kung ingon-ana manulti Ka niini, Ginoo. Ginaampo ko nga itugot Mo kini. Ayoha ang mga may sakit ug mga nagaantus sa tanang dapit, sa Ngalan ni Jesus, ako nagaampo.

⁵⁴¹ Ug kung ipadayag Mo lang ang Imong Kaugalingon nganhi kanamo karon, sama lang sa gibuhat Mo kaniadto didto sa atabay, sa maong babaye, sa dihang nagpakigsulti Ka kaniya. Gisulti Mo kaniya ang usa ka butang nga sayup kaniya. Aduna siya'y lima ka bana. Karon, gisaad Mo nga buhaton ingon niadto sa panahon sa kagabhion. Gisaad Mo nga buhaton kadto sa kaulahiing mga adlaw. Miingon Ka, "Ug mao, mao man usab ang mahitabo sa Pag-abot sa Anak sa tawo. Maingon sa nahitabo kaniadto sa mga adlaw ni Lot, mao man usab ang mahitabo," ang Dios nga nagapuyo sa tawhanong lawas, nga nagapanglihok sa among taliwala, sa porma sa Iyang Iglesia, sa Balaang Espiritu, nga ginapamuhat ang mao gihapon nga mga ilhanan. Itugot kini, Ginoo, niining adlaw mismo. Mahimo Mo ba, Amahan? Dayon, ginaampo ko nga tugotan Mo ang mga tawo nga makita kini, ug ang matag usa unta mamaayo na ug maluwas, alang sa kahimayaan sa Dios. Amen.

⁵⁴² Bueno, awhagon ko ang inyong pagtagad karon, kung mahimo magmatinahuron gayud kamo sa pipila ka gutlo. Karon, ang tanan, maghilum lang kutob sa mahimo n'yo karon.

⁵⁴³ Sigurado ba mo nga nasabtan gyud ninyo ang kahimtang nga

nahimutangan ko dinhi karon? Akong giwali dinhi ang Pulong, ang Pulong sa Dios. Gisulti ko nga tinuod Kining tanan. Miingon si Jesus, nga, “Ang nagatoo Kanako, ang mga buhat nga Akong ginabuhat pagabuhaton usab niya.”

⁵⁴⁴ Karon, aduna ko’y gustong ipangutana kaninyo. Magbantay mo kung kamo—kung kamo moingon og “amen” o dili, karon. Si Jesus, Mismo, wala gayud nag-angkon nga may giayo Siya nga si kinsa man. Tinuod kana. Miingon Siya, “Dili Ako ang nagabuhat sa mga buhat. Kondili ang Akong Amahan nga nagapuyo Kanako.” Husto ba? Ug miingon si Jesus, diha sa San Juan 5:19, “Sa pagkatinuod, sa pagkatinuod, bug-os gayud, magaingon Ako kaninyo, ang Anak Mismo. . .” Ingon nga usa ka Tawo, usa lamang Siya ka Tabernakulo kon diin nagpuyo ang Dios. Kita n’yo? Miingon Siya, “Walay bisan unsa nga arang mabuhat ang Anak sa Iyang Kaugalingon; gawas lamang sa Iyang makita nga ginabuhat sa Amahan, ginabuhat usab kana sa Anak.” Sa ubang pagkasulti, “Ginapakita Kanako sa Amahan ang usa ka panan-awon, kung unsa ang pagabuhaton, ug ginabuhat Ko lang kung unsa ang ginasulti Niya Kanako.”

⁵⁴⁵ Bueno, usa niadto ka adlaw nahibaloan nato nga adunay, ingnon nato, usa ka luoy’ng babaye nga dili makaapil sa linya sa pagpaampo. Aduna siya’y talinugo, ug nag-antus siya niadto sulod sa daghan nang mga katuigan. Busa gihikap lang niya ang bisti ni Jesus, nga nagaingon sulod sa iyang kaugalingon. . . Ubos lamang siya; usa lang siya ka kabus, luoy’ng, babaye, walay salapi. Ug dili siya makaduol didto niadtong mga sacerdote ug kanilang tanan nga nagatindog didto, nga adunay katungod nga maatua didto ug tanan na. Mao nga dili gyud siya makaduol didto, busa daw sa mikamang na lang siya hangtud nga nakaduol didto ug gihikap ang Iyang bisti. Miingon ang babaye, “Nagatoo ako nga Siya’y tinuod gayud. Siya’y, ginahatud Niya kanamo ang Kamatuoran, ang Kinabuhi. Nagatoo ako nga Siya mao ang Pulong sa Dios. Ug kung mahikap ko lang unta Siya, ako—mamaayo gayud ako.”

⁵⁴⁶ Nagatoo ba kamo? Mahimo ba ninyong toohan ang mao gihapong butang nga gitooan niadtong babaye, nga Siya mao ang Pulong sa Dios? [Nagaingon ang kongregasyon, “Amen.”—Ed.] Karon, nagaingon ang Biblia, sa karong panahon, nga, “Siya ang Labaw’ng Sacerdote, ang atong Labaw’ng Sacerdote karon mismo.” Nagatoo ba mo niana? “Human sa Iyang pagkabanhaw ug sa Iyang pagkayab, mikayab Siya sa Kahitas-an ug naghatag og mga gasa sa mga tawo. Ug karon nagalingkod Siya sa tuo sa Dios, sa Halangdon sa Kahitas-an, ug aron sa pagpangaliya sa kung unsay atong ginasugid.” Husto ba kana? “Ug Siya’y usa ka Labaw’ng Sacerdote nga arang. . .” Unsa man? [“Matandog.”] “Matandog sa. . .” Unsa? “Sa pagbati sa atong kaluyahan.” Karon, kung Siya mao. . . Nagatoo ba mo nga Siya mao sa gihapon?

547 Karon tan-awa, kung moanhi kamo, ug hikapon ako, tibuok adlaw, wala kana'y bisan gamay'ng kalahian. Kung hikapon ninyo ang si kinsa mang uban pa nga igsoong lalaki, igsoong babaye, wala gihapon kana'y kalahian; sama lang kana sa sugo bahin sa pagpandong og mga kamot, kana lang. Apan kung mahikap lang ninyo Siya, mao lang gyud kana ang kinahanglan ninyong buhaton.

548 Ug tan-awa, kung hikapon n'yo Siya nga may...nga may sa kung unsa nga seremonya nga sama sa gibuhat nila kaniadto. Miingon sila, "Oh, nagatoo kami niining halangdon nga Magtutudlo. Usa kini ka Propeta." Bueno, wala Siya'y unsa man nga gisulti.

549 Apan kadtong luoy'ng babaye aduna gyu'y usa ka siguradong butang nga mao'y mihikap Kaniya: ang iyang pagtoo. Gihikap niya ang bisti ni Jesus, ug miingon Siya, "Kinsa ba'y mihikap Kanako?"

550 Wala ba mo nagatoo nga nagaingon ang Biblia nga Siya mao sa gihapon ang Labaw'ng Sacerdote karon maingon sa kung unsa Siya kaniadto, Siya, nga arang matandog sa pagbati sa atong kaluyahon? Mahimo man ninyong mahikap Siya dinha, ania man kamo sa niining linya sa pagpaampo o wala. Kung may sakit kamo, o kung aduna kamo'y minahal sa kinabuhi nga may sakit, kung may sa kung unsang butang sa inyong kasingkasing, duol lang kamo nga matinahuron gayud sa atubangan sa Dios ug moingon, "Dios, wala ko'y nahibaloan mahitungod nianang tawo nga nagatindog dinha. Usa siya ka medyo opaw na nga lalaki. Siya, walay unsa man kaniya, apan nagatoo ako nga ang iyang giwali mao gayud ang Kamatuoran. Ug nagatoo ako nga gisulti niya ang hustong butang, nga Ikaw mao ang Labaw'ng Sacerdote. Karon ginatinguha ko nga mahikap Ka. Ug kung gisulti niya kanako ang Kamatuoran, kung ingon-ana gamiton Mo ang iyang mga ngabil aron sa pagtubag ug sultihan ako, sama sa gibuhat Mo niadtong babaye kaniadto." Tan-awa kung Siya ba mao sa gihapon kagahapon ug hangtud sa kahangturan. Buhata n'yo kana. Dili lang para himoon Siyang mao sa gihapon kagahapon, karon, ug hangtud sa kahangturan? Di ba?

Bueno, ang matag usa magpabilin sa inyong puwesto ug matinahuron gayud nga mag-ampo.

551 Unsay sulti mo? [Nagaingon ang igsoong lalaki, "Nanghatag ko og pipila ka mga prayer kard."—Ed.] Huh? ["Nanghatag ko og baynte-singko."] Aduna na ba ko'y napulo dinha karon? ["Katorse."]

552 Diyes, onse, dose, trese, katorse, kinse; ang adunay mga prayer kard nga diyes, onse, dose, trese, katorse, kinse, dise-sais, dise-siete, dise-otso, dise-nuebe, baynte, baynte-uno, bayntedos, baynte-tres, baynte-kuwatro, baynte-singko: makahimo na kana og hapsay nga linya. Kung kita . . . nagalaum ako nga dili na

namo kinahanglan nga ipapabilin kamo dinhi sa ingon ka dugay. Pero karon . . .

⁵⁵³ [Adunay nagapakig-istorya kang Igsoong Branham—Ed.] (. . .? . . .Ikaw ba ang piyanista? Okey lang kana. Sige lang. . . Okey lang kana.)

Atong laylayon karon, dungan ang tanan, samtang ginatono nila kini. *Only Believe*.

Only believe, only believe,
All things are possible, only believe;
Only believe, just only . . .

Toohan ang unsa? Ang Iyang Pulong ug saad. Tungod kay unsa man?

All things are possible, only believe.

⁵⁵⁴ Paglugsong Niya gikan sa bukid, atua didto ang mga tinunan. Napildi sila niadtong sakit nga patol. Nagatindog didto ang amahan, nagalantaw sa iyang anak, nga nagahilak. Gibuhat na kaniadto sa mga tinun-an ang tanan nga mahimo nila, apan wala kadto nagpulos. Miduol didto si Jesus. Miingon ang pipila kanila, “Anaa na Siya.” Aduna ma’y nagtudlo kanila ngadto kang Jesus; palayo sa mga ministro, paingon kang Jesus. Dinha ko gustong itudlo ang mga tawo; dili sa ako, o sa kung unsa nga iglesia, kondili kang Jesus mismo. Miingon, “Arang Niyang mahimo.”

⁵⁵⁵ Busa midagan ang amahan, mihapa sa Iyang tilan, ug miingon, “Ginoo, kaloy-i ang akong anak. Ginasakit siya pagayo sa yawa. Luya na siya. Nagabula ang iyang baba. Ginaataki siya,” epilepsy. Ug ingon pa ang amahan, “Ug gidala na nako siya bisan asa. Ug bisan ang Imong mga tinun-an walay nahimo para kaniya.”

⁵⁵⁶ Miingon si Jesus, “Mahimo Ko, kung motoo ka, kay ang tanang butang mamahimo alang kaniya nga nagatoo.”

Just only . . .

Mao sa gihapon kagahapon, karon, ug hangtud sa kahangturan! Ania na Kini karon. Magmahilumon ang tanan.

. . . believe,
All things are . . . (Pagkaanindot nga higayon!)
Only believe, just only believe,
All things are possible, just only believe.

⁵⁵⁷ Oh Ginoo, bug-os nang nailatag ang Pulong dinhi karon. Ipadan-ag ang pang-gabii nga Kahayag, Ginoo, og himoon Kini nga buhi. Pinaagi sa Ngalan ni Jesus Cristo, ako nagaampo. Amen.

⁵⁵⁸ Karon, sa Ngalan ni Ginoong Jesus Cristo, ginapahimutang ko ang matag espiritu dinhi ilalum sa akong pagkontrola, alang sa Iyang kahimayaan.

559 Ginatan-aw ko kining linya sa pagpaampo. Wala ni usa ka tawo nga anaa nianang linya sa pagpaampo ang akong nailhan. Sila, ang matag usa, mga estranyo gyud kanako. Kamong tanan nga anaa sa linya sa pagpaampo, nga mga estranyo kanako, ug kon wala ko’y unsa man nga nahibaloan mahitungod kaninyo, sa inyong mga problema o unsa man, ipataas n’yo ang inyong mga kamot, tanan dinha sa linya sa pagpaampo.

560 Pila man sa mga mananambong ang mga estranyo kanako, ug wala ko’y unsa man nga nahibaloan mahitungod kaninyo? Aduna pud kamo dinha og mao ra nga pagbulot-an, nga sama ra kanila dinhi. Hinoon, tagsa-tagsa kong ginatawag ang matag tawo.

561 Ania, isibog ko úna kini dinhi dapit, kadiyut lang. [Ginasibog ni Igsoong Branham ang mikropono—Ed.] Madungog ba ko ninyo karon nga ingon niini? [Nagaingon ang kongregasyon, “Oo.”]

562 Kining gining dinhi. Ania ang usa ka lalaki ug babaye, sa ingon-ani na usab nga pagtagbo. Wala ako makaila kaniya, wala ko pa siya nakita sukad-sukad. Usa siya ka estranyo kanako, bug-os gyud nga usa ka estranyo.

563 Nagapanglihok lang ako sumala nianang Pulong. Ang ingon sa Pulong, “Ang mga buhat nga Akong ginabuhat pagabuhaton usab ninyo, kung nagatoo kamo Kanako.”

564 Niadtong miaging buntag, sa dihang miabot pag-usab kadtong panan-awon, human ang liboan niadto, ug miingon, “Ang dili-nagakapakyas nga Presensiya ni Jesus Cristo kauban mo bisan asa ka man moadto.” Nagatoo ako niana, nga sinseryo gayud, sa tibuok kong kasingkasing. Kung dili ko na kamo makita pag-usab, nagatoo ba mo niana ingon nga mao ang Kamatuoran? Tinuod kana.

565 Ania ang usa ka babaye nga wala ko pa nakita sukad-sukad sa tibuok kong kinabuhi. Usa siya ka babaye nga nakadawat lang og prayer kard.

566 Ang kasagaran nga ginabuhat sa akong anak sa mga niini, moanhi siya kuhaon ang mga prayer kard ug ginasagol-sagol, ang tanan niini, mismo, sa atubangan ninyo nga mga tawo. Hatagan og usa ka prayer kard ang si kinsa man nga gusto niini, sa kon asa man. Walay usa nga nasayod kung asa ba magsugod ang linya, o unsa man mahitungod niini. Busa, dili mahimong masulti sa batang lalaki, “Oh, karon *ania*, kung hatagan ko nimo og *ingon-ani nga kantidad*, nan ipahimutang nako ka sa unahan, ug siguradohon ko nga maatua gyud ka didto.” Wala siya mismo nahibalo. Uh-huh. Walay si kinsa man ang nahibalo.

567 Basta nagasugod lang kita. Kon asa man ang Balaang Espiritu mosulti nga “pagtawag na,” nan nagatawag kita dinha mismo. Ug usahay nagasalig ako nga ang usa ka tawo nga akong maistorya, ilabina, pag ania na ko dinhi, nga ang maong tawo

wala ko pa sukad. . . mga estranyo, kita n'yo, nga dili gyud nako kaila.

568 Karon, kung kining babaye nga nagatindog dinhi, kung ang. . . Adunay problema. Tingali may sakit siya. Tingali aduna siya'y kauban, nga may sakit. Siya—siya—siya tingali nagatindog lang dinha, tingali nagpakaaron-ingnon lang siya nga may sakit. Ug tingali nagatindog lang siya dinha, nagasulay nga magbutyag og usa ka butang. Kung mao man, nan bantayi lang kung unsay mahitabo. Kita n'yo? Ngani kamo, nakasaksi na man nga may nagsulay og ingon-ana, usab. Dili ba? Oo, sir. Makita na lang nga ginaalsa na nila siya pagawas sa pultahan, nga patay na. Kita n'yo? Uh-huh. Busa karon inyong—mahibaloan ra ninyo, tan-awa n'yo kung husto ba kini o dili. Kita n'yo? Sulayi n'yo kini, kita n'yo.

569 Bueno, wala kita ingon nga nagasimba-simba lang, mga higala. Ania na kita sa katapusang panahon. Ang bunga anaa na mismo ibabaw sa punoan, nagakahinog na. Tinuod kana. Moabot na ang Ginoo.

570 Wala ako makaila kaniya. Pero nakaila man ang Dios kaniya. Nakaila Siya kaniya. Sa wala pa magkaaduna og kalibutan, naila na Niya ang babaye. Hingsayran na Niya nga motindog siya dinha mismo. Hingsayran na Niya nga magatindog pud ko dinhi mismo. Kay, Siya wala ma'y kinutoban. Husto ba? Karon, kung wala Siya'y kinutoban ug hingsayran na Niya kini, kung ingon-ana hingsayran pud Niya kung ngano nga nagatindog dinha ang babaye. Kung ingon-ana, ang mao sa gihapon nga Dios nga. . .

571 Si Jesus, kaniadtong ania pa Siya sa yuta, nga ang Dios anaa Kaniya, nga nakig-istorya sa babaye nga atua sa atabay, ug gisulti kaniya nga adunay butang nga sayup kaniya. Nasayod man kitang tanan kung unsa kadto. Dili ba? Ug miingon ang babaye, “Sir, siguradong usa gyud Ikaw ka propeta.” Mao kadto ang una niyang pagpahayag. “Karon, nasayod kami nga panahon na nga mahianhi ang Mesias, nga gitawag og Cristo. Ug pagmoabot na Siya, mao kana ang butang nga pagabuhaton Niya.”

572 Karon, kung Siya'y “mao sa gihapon kagahapon, karon, ug hangtud sa kahangturan,” ug nagsaad pinaagi niining Pulong nga bag-ohay lang nakong giwali, nga sa panahon sa kagabhion maania Siya dinhi ug buhaton ang mao gihapong butang, kung ingon-ana nagapaabot gyud kita niana. Dili ba? Dili ba nagapaabot kita? Nagapaabot sa pagkabanhaw nianang Iglesia. Karon, kung ipamuhat Niya nganhi niining babaye ang sama ra mismo sa gibuhat Niya didto kaniadto, nan panghimatud-an niana ang Pulong, nga husto Kini.

573 Karon, bag-ohay lang gipataas sa babaye ang iyang kamot, ug ako usab, ingon nga dili kami magkaila, sa usa'g usa. Wala ako makaila kaniya. Wala ko pa siya nakita sukad-sukad. Usa

siya mismo ka estranyo, nga nagatindog dinhi. Kamo man pud, nga anaa dinha, daghan sa inyo.

⁵⁷⁴ Hinoon kaila man nako ang pipila sa niining mga tawo nga nagalingkod dinhi. Ug daghan pud ang dili nako kaila. Kaila ko si Mrs. Collins dinhi. Sigurado ko niana. Ang igsoong babaye, nga asawa ni Igsoong Ben, ug nakita pud nako sila ni Igsoong lalaki ug Igsoong babayeng Dauch dinhi, kaganina . . . Si Igsoong Wright; sila ni Igsoong lalaki, Igsoong babayeng Dauch; ang igsoong lalaki pud nga anaa dinha sa tumoy. Kaila nako ang pipila sa inyo, nga ania dinhi. Pero ako—dili nako kaila ang kadaghanan sa inyo, tungod kay wala man ko kanunay dinhi, para maila-ila kamo. Ug aduna kita’y mga bag-ohan pud dinhi.

Ug busa mag-ampo lang kamo.

⁵⁷⁵ Kung usa ako ka estranyo kanimo, ug ginapamahayag ko nga miabot na ang pang-gabii nga mga Kahayag. Ug ang pang-gabii nga Kahayag mamahimong sama gihapon sa pang-buntag nga Kahayag. Ipadayag Niini ang mao gihapong mysteryoso nga mga bunga sa Dios, sa espirituwal nga pagkasulti. Tinuod kana. Karon, nagapakig-istorya lang ko kanimo nga sama sa gibuhat Niya kaniadto sa maong babaye nga atua sa atabay. Miingon Siya, “Hatagi Ako og mainom.” Kita n’yo? Mao ra gihapon ang ginasulti ko. Dili kana ako. Siya kana. Apan kung ipadayag Niya kanako kung para sa unsa nga nagatindog ka dinha, kita mo, kung ipadayag Niya kanako kung para sa unsa nga anaa ka dinha, kung ingon-ana mahibaloan nimo nga nahibaloan gyud Niya ang tanan mahitungod sa imong kinabuhi. Kung isulti Niya kanimo ang usa ka butang nga nahitabo kaniadto, kita mo, nasayod ka mismo kung husto ba kana o dili. Dayon kung nahibaloan Niya kung unsa ang nahitabo kaniadto, ug masulti sa imoha kadto, mahimo Niyang . . . kung ingon-ana sigurado gayud nga toohan nimo Siya sa kung unsay mahitabo. Kung masulti na Niya kanimo kung unsa ang nabuhat mo kaniadto, nan siguradong ipadayag pud ang anaa sa unahan niini, o ang sa kaniadto, og sa umalabot, tanan niini, og masulti kini sa husto.

⁵⁷⁶ Toohan ba Siya sa kongregasyon, sa tibuok n’yong kasingkasing, kung buhaton Niya kana? Nagatoo ako nga motoo kamo, kung buhaton man Niya o dili. Motoo gihapon kamo, pero kini mismo ang magapanghimatuod niini.

⁵⁷⁷ Karon, nagatan-aw ko mismo sa babaye, ug ginadihogan na siya. Nasayod gyud siya, ingon nga usa ka estranyo kanako.

⁵⁷⁸ Apan ipakita ko lang sa inyoha karon. Daghan sa inyo ang nakakita nianang hulagway nga nakasab-it dinha. Karon, dili Kana, ang anaa . . . Kana nga Kahayag, mao Kana mismo Ang ania dinhi mismo tali kanako ug nianang babaye karon mismo. Nakita n’yo ba Kana? Mora’g usa—mora’g usa ka kolor krema, nga may pagka-dalag-nga-berde, mora’g-esmeralda

nga Kahayag, sama sa tawag nato niini, nagapanglihok Kini mismo . . . Mao Kana ang nagapabati kaniya . . .

579 Karon, ipakita ko lang kanimo ang usa ka butang. Gibati nimo ang usa ka malumo gayud, og pagkamapainubsanon nga pagbati. Kung husto kana, gining, ipataas ang imong kamot aron makita sa mga tawo. Kita n'yo? Kini'y . . . Dili niya mapugngan nga mabati Kini, tungod anaa man Kini mismo dinha. Kita n'yo?

580 Karon, ania, kung magpadayag Kini kaniya, wala ko mahibalo. Depende lang. Ang Dios man niana. Dili ko mahimo kana, nga ako mismo. Siguradong ang—ang Dios gyud ang mobuhat niana. Oo.

581 Ang babaye sa tinuod lang, sa natural nga kahimtang, gikatakda na nga maoperahan. Adunay butang sa iyaha nga siguradong isulti kaniya sa doktor, “Kinahanglan gyud kanang maoperahan,” pero wala man siya miadto sa doktor. Husto kana. Ug siya—siya . . . Kini'y usa—usa ka tumor. Ug kana nga tumor anaa diha sa iyang tuo nga kilid, duol sa dugokan. Husto kana. Kung husto kana ipataas ang imong kamot, aron makita sa mga tawo. [Nagaingon ang igsoong babaye, “Husto kana.”—Ed.]

582 Karon nagatoo ba kamo? Karon, wala ninyo kini makita, (Kita n'yo? Kita n'yo?) pero toohi ninyo kini karon sa tibuok ninyong kasingkasing, nga tinuod kini. Sige. Sige.

583 Karon moingon mo, “Tingali'g gitag-an lang nimo kana, Igsoong Branham.” Dili mo kana matag-an, sa usa ka milyon ka higayon, nga tukma gayud.

584 Bueno, pasagdi lang siya nga magtindog dinha, sa makadiyut. Nawala na kadto sa ako, karon mismo. Karon, ania, tan-awon una nato, sa makadiyut lang, kita n'yo. Daw sa maayo ra man siya; Cristohanon. Karon tan-awon nato. Karon kung isulti lang Niya kanato ang uban pang butang nga mamahimong . . . Oo. Ania siya nga nagabalik. Oo, sir. Siya'y usa—siya'y usa . . . Oo. Usa kini—usa kini ka tumor, nga kini'y, mao'y kuhaon sa mga doktor. Ug kini'y . . . Maghinungdan kini og problema kaniya. Apan nagasalig gyud siya kang Cristo para niini.

585 Ug dili lang kana. Dili siya taga dinhi. Ug aduna siya'y kauban. Iya kining bana. Ug nagaantus siya, usab. Husto kana. Nagatoo ka ba nga masulti sa Dios kanako, samtang nagatan-aw ko mismo sa lalaki dinhi, sa niining panan-awon, kung unsay problema kaniya? [Nagaingon ang igsoong babaye, “Oo.”—Ed.] Bueno, sultihi siya nga mokaon lang sa iyang paniudto. Nawala na ang sakit niya sa tiyan. Nagatoo ka ba nga si Cristo ang nagabuhat niana? Oo? Taga Tennessee ka, Nashville. Husto kana. Mrs. Binkley. Sige. Puede ka nang mouli karon ug mamaayo na, ikaw ug ang imong bana. Panalanginan kamo sa Dios.

586 Nagatoo ba mo sa Ginoong Jesus? Kung dili ba kana ang mao sa gihapon nga Ginoong Jesus nga ania kaniadtong nangaging

mga panahon, nga anaa na sa Iglesia sa pang-gabii nga Kahayag! Pagsusi mo sa babaye, istoryaha n'yo siya, og pangutan-a siya kung husto ba gyud kadtong mga butanga. Kung motoo lang kamo! Karon kumbinsido ba kamo nga Siya ang mao sa gihapon nga Cristo? Karon, kabalo man mo nga dili ko arang mahimo kadto. Usa ra ako ka tawo. Inyo akong igsoon. Apan Siya ang Dios.

⁵⁸⁷ Karon tan-awon nato. Mao ba kini ang sunod? Ikaw ba kadtong anaa sa linya sa pagpaampo? Sige.

⁵⁸⁸ Karon, siyempre, ang maong pagdihog, kon naamgo n'yo, nagapaluya gayud kanako, nga daw sa wala na ko kahibalo kung unsa. Bueno, si Jesus, kaniadtong gihikap niadtong babaye ang Iyang bisti, miingon Siya, “Gibati Ko nga may gahum nga migula Kanako.” Husto ba? Ang buot ipasabot niadto “kusog.” Naluya Siya. Ug kung Siya . . . Kung ingon niadto gani ang nahitabo sa Pulong, Mismo, unsa pa kaha ang epekto niini sa usa nga giabtan lamang sa Pulong? Unsa ma'y buhaton Niini? Kung ingon niadto ang epekto ngadto sa Anak sa Dios, unsa pa kaha kung moabot kana sa ako, nga usa ka makasasala nga giluwat lang pinaagi sa Iyang grasya? Kita n'yo? Mora gayud ko og ginatuyok-tuyok niana. Kita n'yo?

⁵⁸⁹ Apan, bisan pa niana, ania gihapon ako aron irepresentar Siya. Aron irep- . . . usa ra ako ka ubos nga representante. Ako—nagahinulsol ako sa tanan kong mga sala, aron—aron dili kamo motan-aw sa kung unsa ako; kondili ang tan-awon n'yo mao'y kung Kinsa Siya, sa ingon niana kamo nga direksyon motan-aw.

⁵⁹⁰ Karon, usa ako ka estranyo kanimo, gining. Wala ako makaila niining babaye, usab. Dili kita magkaila sa usa'g usa. Husto kana. Karon, kung ang Ginoong Jesus (ingon nga ako wala makaila kanimo, ug ikaw wala makaila kanako), kung ipadayag kanako sa Ginoong Jesus ang usa ka butang, kon para sa unsa nga ania ka, mahimong usa ka butang nga nabuhat mo, o ang usa ka butang nga dili mo unta angay'ng gibuhay, o mora'g ingon niana, nasayod ka nga mamahimo kanang, kana'y mamahimong usa ka talagsaon nga milagro. Butang kana nga dili arang masaysay. Ang milagro usa ka butang nga dili arang masaysay. Nasayod niana ang si kinsa man. Kita n'yo? Kana'y mamahimong usa gayud ka talagsaon nga milagro.

⁵⁹¹ Ngani kana'y mamahimong mas labaw pa nga milagro kaysa kung aniay usa—usa ka babaye dinhi nga naka-wheelchair, ug adunay arthritis, ug bug-os na nga baldado. Sultihan ko siya, “Tumindog ka ug molakaw,” ug molakaw siya pagawas dinha, ang tanan managsiyagit na tungod niana. Apan, nakita n'yo, sa tinuod lang ang gahum man sa—sa iyang pagtoo aron motoo, nga nakatindog siya ug nakalakaw na, mao ang nakapahimo niana.

⁵⁹² Pero ang balikan ug ibutyag ang usa ka kinabuhi sa kon asa man kaniadto, nagkinahanglan kana og labaw pa niana. Dios

lang gyud ang gikinahanglan niana, kon diin masulti n'yo, kita n'yo, mahibaloan n'yo mismo kung husto ba kana.

⁵⁹³ Karon, adunay butang nga nahitabo, sa kung asa man. Karon kadali lang. Nawala na Kini dinhi. Mipaingon na Kini sa. . . mipaingon na diha sa mga mananambong, sa kon asa man, sa kon asa man. Nawala na Kini karon.

Kadali lang. Makig-istorya ko pag-usab sa babaye.

⁵⁹⁴ Karon, magmatinahuron gayud ug magbantay karon. Mag-ampo lang, mag-ampo kamo dinha. Gusto ko nga iampo ninyo, “Ginoo, itugot nga ako na unta kana.” Ang uban kaninyo dinha, nga dili na makaapil sa linya sa pagpaampo, mag-ampo lang mo.

⁵⁹⁵ Nagapakig-istorya ko pag-usab kanimo, aron mapa- . . . para sa imong pagtoo. Kita mo? Kung nahimo kini nga napamuhat para niadtong usa pa ka babaye, nan puede pud kining mapamuhat para kanimo. Ang imong pagtoo kini. Kita mo? Ikaw ang nagapabuhat niini. Dili ako. Kondili ang imong pagtoo sa Dios. Kita mo?

⁵⁹⁶ Wala man miingon si Jesus, “Oh, nasayod Ako nga matagbo Ko kana nga babaye didtong dapita.” Wala.

⁵⁹⁷ Apan kaniadtong nahitabo ang pagkabanhaw ni Lazarus, karon, mao na kadto ang gipakita sa Dios Kaniya para buhaton. Kita n'yo? Miingon ang Dios, “Mopahilayo Ka.” Ug Siya—gipamatud-an Niya kung unsa gayud Siya. Mipalayo úsa didto. Ug dayon sa pagbalik Niya, miingon Siya, “Si Lazarus natulog.” Ug mibalik Siya, ug giadtoan ug gibanhaw si Lazarus gikan sa lubnganan. Gitawag ang kalag niini, human nga mitaliwan kini upat na ka adlaw. Wala Siya miingon nga naluya Siya didto. Ang Dios mismo kadto nga nagagamit sa gasa.

⁵⁹⁸ Apan, kini, sa dihang gihikap Siya niadtong babaye, ang babaye man kadto nga nagagamit sa gasa sa Dios.

Ug mao ra usab gihapon dinhi. Kamo ang nagapabuhat niini.

⁵⁹⁹ Karon, bahin pud niini, sa mga pagbiyahe para sa pagpangayam, kon diin ang. . . Nakita na nako ang oso, ug kung asa ang uban pang mga butang, ug tanan na niining nagkadaiyang mga butang nga nagsulti-nang-daan dinhi, og gisulti na kung nganong mahitabo ang mga niini, pulong sa pulong gayud. Ang Dios mismo kadto. Dili kana nagapaluya kanako.

⁶⁰⁰ Apan sa dihang sugdan na sa mga tawo nga gamiton ang gasa sa Dios, kita n'yo, mahimo na ka nga pang-publiko nga alagad sa Dios, aron igo na lang kamong mokonekta sa linya. Kita n'yo?

Ug dayon hikapon n'yo Siya pinaagi niana, dayon magatubag pud Siya. Kita n'yo?

⁶⁰¹ Karon, oo, karon ginapakita na ang babaye diha sa panan-awon. Nagasulod na siya, o nagaabot na ang panan-awon. Daw

sa makita mo kana sa palibot niya. May sakit ang babaye. Nagmasakiton kaayo siya. Nagaantus siya, sa usa ka butang, tungod sa sakit sa tiyan, nga medyo migrabe na. Ipataas ang imong kamot kung tinuod kana. Ug aduna pud ka'y mga komplikasyon. Tinuod kana.

⁶⁰² Aduna usab ka'y kauban. Imo kining bana, ug may sakit siya. Kung ipadayag kanako sa Dios, nganha sa imong bana, kung unsay problema kaniya, motoo ka ba kanako nga Iyang propeta? Ang maong lalaki ginahasol tungod sa iyang mga mata, tungod sa iyang mga dalunggan, ug migrabe na ang iyang kahintang. Oo, sir.

⁶⁰³ Nagatoo ka ba nga nakaila ang Dios kung kinsa ka? [Nagaingon ang igsoong babaye, "Oo."—Ed.] Motoo ka ba kanako nga Iyang propeta, Iyang magtatan-aw, kung isulti ko kanimo kung kinsa ka? ["Oo."] Nagatoo ka ba niini? Mrs. Robertson. Ug taga Huntsville kamo, kana'y sa Alabama. Balik na kamo, ikaw ug ang imong bana, ug mamaayo na.

⁶⁰⁴ Nagatoo ba mo? "Ang tanang butang mamahimo alang kanila nga nagatoo." Kung mahimo ninyong toohan, kung mobarug—mobarug lang kamo ug motoo nga buhaton kini sa Dios. Karon, ayaw kamo pagduhaduha, kondili motoo lang gayud sa tibuok ninyong kasingkasing, nga igatugot sa Dios kini nga pagkaayo para kaninyo, ug maangkon ninyo ang bisan unsa nga inyong pangayoon.

⁶⁰⁵ Sige, sir, moduol ka na karon. Tan-awon nato. Ikaw na ba ang sunod dinhi? Sige, sir. Sa tan-aw ko dili gyud kita magkaila, sa usa'g usa, sir. Kung . . .miduol si Jesus kaniadto sa usa ka lalaki nga ginganla'g Simon, gisulti kaniya ang mahitungod sa iyang kahintang, ug kadto ang nagpahinungdan kang Simon nga mosangyaw ug motoo, sa tibuok niyang kasingkasing. Magpahinungdan ba usab kini kanimo nga buhaton ang mao rang butang? [Nagaingon ang igsoong lalaki, "Oo."—Ed.] Sigurado gyud. Bueno, kita ingon nga mga dili-magkaila.

⁶⁰⁶ Bueno, wala ma'y kalahian sa Dios tali sa lalaki ug babaye. Siya mao sa gihapon. Dios Siya. Kita n'yo?

⁶⁰⁷ Ug ikaw ba, toohan ba nimo nga (kanang pagbati nga nagapalibot kanimo karon), nga mahimo sa Dios nga ipadayag kanimo, pinaagi kanako, nga Iyang alagad, ang butang nga mao'y imong gianhi dinhi, ang butang nga problema kanimo, kung unsa man kana? Bueno, mahibaloan man nimo kung husto ba kini o dili. Sige. Hinaut nga itugot Niya kini.

⁶⁰⁸ Ginapakita na ang lalaki diha sa panan-awon, o nagaabot na ang panan-awon diha sa lalaki. Wala siya mianhi tungod sa sakit. Ania siya nga nagatinguha og bautismo sa Espiritu Santo. Mao kana'y iyang ginatinguha. Husto kana, sir. Oo, sir. Ug dili ka taga dinhi. Taga didto ka dapit sa unahan nga dalan dinhi, sa usa ka lugar nga gitawag og Seymour, Indiana. Kana, taga—taga

didto ka. Ang tawag nila sa imoha, “Bill.” Bill, mobalik na ka, dawata ang Espiritu Santo, sa Ngalan ni Jesus Cristo. Tumoo ka.

609 Dumuol ka, gining. Nagatoo ka ba kanako nga Iyang propeta? Nagatoo ka ba nga si Jesus Cristo, ang Anak sa Dios, buhi mismo? Ug nagatoo ka ba nga Siya ang nagtugot nga mahitabo kini nga ingon niini? Nagatoo ka ba niini?

610 Pila na ba ang nahuman nato? Unsa? Kita n’yo, dili ko gusto nga maluya og ayo. Sige.

611 Dili, wala ra kini; wala ka mianhi para sa imong kaugalingon. Ania ka para sa ubang tawo. Ug wala dinhi ang maong tawo. Kung isulti ko kanimo kung unsa ang problema nianang usa pa ka tawo, dawaton ba nimo ang kaayohan, ug dawaton ug toohan? Usa kini ka kanser. Nagatoo ka ba nga mamaayo sila? Kung ingon-ana lakaw na, sa Ngalan sa Ginoong Jesus, ug tumoo ka. Ato lang . . .

612 Nagatoo ba kamo, ang tanan kaninyo? Nagatoo ba mo nianang pagdihog sa Balaang Espiritu? Dili ba Siya kahibulongan? Nagatoo ba kamo? Sige.

613 Karon, pila na ba ang nahuman nato? Kasagaran duha, duha o tulo, usa na ka kapanghimatuoran. [Adunay nagaingon, “Tulo.”—Ed.] Unsay sulti mo? [Aduna pa’y usa nga nagaingon, “Upat na ang nahuman nimo.”] Upat? [“Oo.”] Mao ba kining ikalima ang nagatindog dinhi? Sige.

614 Kita’y—managpanoo kita sa tibuok natong kasingkasing, nga si Jesus Cristo ang Anak sa Dios mao sa gihapon kagahapon, karon, ug hangtud sa kahangturan.

615 Ania ka para nianang bata. Kung ipadayag kanako sa Ginoong kung unsay problema sa imong anak, motoo ka ba nga ayohon kini sa Dios? Ang gamay’ng bata adunay grabe nga sakit sa kasingkasing. Husto kana. Ang ba- . . .dili ka, dili taga dinhi ang maong bata. Kini’y taga laing siyudad. Taga-gawas sa estado kini. Nagatoo ka ba nga masulti sa Dios kanako kung asa gikan ang maong bata? Motoo ka ba, ug nagatoo nga mamaayo na kini kung ingon-ana? Dalha na kini balik ngadto sa Franklin, Kentucky. Oo, ma’am, ug tumoo ka sa tibuok mong kasingkasing. Kung motoo ka, mao lang kana ang kinahanglan mong buhaton.

616 Tugoti—tugoti . . .Duol ngari kadiyut lang. Ginakondena ko kanang dautang butang. Sa Ngalan ni Jesus Cristo, hinaut nga mobiya ang kamatayan, ug mosulod ang kinabuhi.

“Pagapandongan nila sa ilang mga kamot ang mga masakiton, mangaayo sila.”

Gusto ba nimong mokaon na? Sa hunahuna mo ba himoon gyud Niya nga moarang-arang ang imong paminaw? Lakaw na. Mibiya na kini sa imoha karon. Amen.

617 Nagatoo ka ba nga mobiya na kanimo ang sakit pang-babaye? Sige. Adto na sa imong gilingkoran ug moingon, “Salamat Kanimo, Ginoo.”

Kumusta man ka, sir? Oh, kanang yawa, nga hubak!

618 Kadiyut lang. Kadiyut lang ha. Adunay butang nga sayup . . . Walay butang nga sayup; maayo mismo ang nahitabo. Karon, adunay butang dinhi, nga pareho, nga miabot nianang lalaki niadtong tungora mismo. Akong tan-awon pag-usab kung unsa kadto. Karon tan-aw lang sa ako. Ayaw mo pagsulti og unsa man. Kadiyut lang.

619 Usa kini ka itum nga lalaki, nga nagalingkod dinhi dapit, og nagatan-aw sa ako. Iya kining. . . siya’y—aduna siya’y kauban nga may sakit. Husto kana. Hubakon ug may sinus. Husto kana. Nahikap mo Siya. Dili ka taga dinhi, sir. Gikan ka sa Sidlakan, amihanang-sidlakan, sa *niini* nga direksyon. Gikan ka sa New York. Oo, sir. Husto kana. Ikaw si Mr. Hunt. Tumoo ka karon. Sige, sir. Maayo kana.

620 Imo kanang higala ang nagalingkod dinha tupad nimo, nga nagaampo. Nagatoo ka ba kanako, sir, ingon nga propeta sa Dios? [Nagaingon ang igsoong lalaki, “Oo.”—Ed.] Mianhi ka dinhi nga kauban siya. Ang imong ngalan mao si Coleman. Ug ikaw—nagaampo ka para sa usa ka amahan. Nga na-stroke. Kana’y MAO KINI ANG GINAINGON SA GINOO. Tumoo ka. Lakaw na, tumoo ka karon, og mobiya na kini kanimo.

621 Aduna ka’y nerbiyos sa tiyan, nga nagapasakit kanimo. Dili ba husto kana? Lakaw na, og mokaon. Sa Ngalan sa Ginoong Jesus.

Nagatoo ka ba nga giayo ka na Niya? Lakaw na ug moingon, “Salamat Kanimo, Ginoong Jesus.” Tumoo ka sa tibuok mong kasingkasing.

622 Ginahasol ka tungod sa sakit nga nerbiyos, bug-os kang nagakabalaka, ug uban pa. Tumoo ka sa tibuok mong kasingkasing. Pauli na ug mamaayo na.

623 Pagkanerbiyos. Magtoo lamang sa tibuok mong kasingkasing. Tumoo ka nga pagaayohon ka sa Dios, ug buhaton Niya kana. Ayaw pagduhaduha bisan gamay.

624 Nerbiyos ug sakit sa kasingkasing. Nagatoo ka ba nga pagaayohon ka ni Jesus Cristo? Lakaw na, mamaayo ka na, sa Ngalan ni Jesus.

625 Ginanerbiyos ka, nagakabalaka, ginahasol ka tungod sa sakit sa tiyan tungod sa kondisyon sa imong tiyan nga mao’y hinungdan nga nagaaslom ang imong pagkaon. Lakaw na, og ayaw pagduhaduha sulod sa imong kasingkasing; ug mamahitabo kini, dili ka na magkaaduna niini.

626 Dugay ka nang ginahasol tungod sa imong likod. Nagatoo ka ba sa tibuok mong kasingkasing? Kung ingon-ana lakaw na, ug giayo ka na ni Jesus Cristo niini.

627 Kadiyut lang. Magpabilin lang nga hilom, sa makadiyut. Karon adunay butang nga nahitabo. Talagsaon kining babaye dinhi. Kana nga Kahayag nagpaibabaw kaniya, sa ingon kapasas, dayon nawala na, ug mibalik ra dayon. Aduna gyu'y butang nga nahitabo. Kadiyut lang. Usa kini ka itum nga lalaki, sigurado ko nga dili kini mao ang itum nga lalaki dinha, kay miabot kini nga . . . Kadali lang. Ania kini. (Atras ka, Billy.) Ania na.

628 Kini mao ang lalaki nga nagalingkod dinhi, itum nga lalaki. Ginahasol ka tungod sa sakit sa likod, usab. Husto kana. Usa ikaw ka estranyo kanako. Ako usab sa imoha. Apan adunay usa ka butang nga mas gikinahanglan nimo kaysa sakit sa likod, kana'y, ang itugyan mo ang imong kasingkasing kang Cristo, og mahimong usa ka Cristohanon. Dili ka . . . Dawaton ba nimo Siya ingon nga imong Manluluwas? Taga Ohio ka. Husto kana. Taga Ohio. Pauli na, og mamaayo na. Ginapasaylo na ni Jesus Cristo ang imong mga sala, ug mahimo ka nang mouli ug mamaayo na. Karon tapos na kana. Karon makauli na ka. Tumoo ka sa tibuok mong kasingkasing.

629 Sige, igsoong babaye, duol na. Mga komplikasyon, ug pagkanerbiyos, ug pagkaluya. Nagatoo ka ba sa tibuok mong kasingkasing nga pagaayohon ka sa Dios? Adto na sa imong gilingkoran, ug moingon, "Salamat Kanimo, Ginoong Jesus, tungod sa tanan nga gibuhath Mo para kanako."

630 Nagatoo ka ba nga pagaayohon ka sa Dios nga Makagagahum-sa-tanan, ug ayohon ang imong likod, ug himoon nga mamaayo ka na, ug ayohon ang sakit sa kidney, himoon . . .? Lakaw—lakaw ka na, nga nagakalipay, ug moingon, "Salamat Kanimo, Ginoong Jesus."

631 Nagatoo ka ba, dong, nga ayohon ka Niya? Moingon ka, "Salamat Kanimo, minahal nga Dios." Lakaw na, nga nagadayeg lang sa Dios.

632 Karon nagatoo ka ba sa tibuok mong kasingkasing, igsoong babaye? Kung ingon-ana lakaw na, ug giayo ka na ni Jesus Cristo.

633 Kadali lang. Dili, dili siya kadto. Kadali lang. Dili kadto ang babaye dinha. Sa makadiyut lang karon. Kadali lang.

634 Duna ko'y nakita nga misablig nga tubig sa kung unsa man. Adunay usa dinhi nga mitabok pa sa dagat, gikan sa kon asa man. Usa kini ka babaye, ug gikan pa siya sa Holland. Asa man siya? Atua siya. Sige, igsoon. Gikan ka pa sa halayo para sa pagkaayo. Nagatoo ka ba kanako nga Iyang propeta? [Nagaingon ang igsoong babaye, "Oh, oo."—Ed.] Nagaantus ka tungod sa rayuma, ug arthritis, pagpanggahi. Tumoo ka kang

Ginoong Jesus Cristo, ug dad-a ang Mensahe ngadto sa imong mga paryente. Panalanginan ka sa Dios. Mobyia na kini kanimo ug mahimo ka nang molakaw ug mamaayo na. Amen.

Nagatoo ba kamo?

⁶³⁵ Dinhi, dinhi dapit sa luyo, may usa ka babaye nga nagalingkod dinhi mismo sa luyo. Ug nagaantus siya tungod sa sakit sa apdo. Oh, basin mapakyas niya kini. Dios, tabangi ako. Siya—gikan pa siya sa Indianapolis. Gilbert ang iyang apelyido. Tindog dinha sa imong nahimutangan, gining. Mao kana. Mamaayo ka na, sa Ngalan ni Jesus Cristo.


⁶³⁶ Nagatoo ba kamong tanan, sa tibuok n'yong kasingkasing? [Nagaingon ang kongregasyon, "Amen."—Ed.] Ipondong ang inyong. . . Nabanhaw ba si Jesus gikan sa mga patay? ["Amen."] Mao ba Siya sa gihapon kagahapon, karon, ug hangtud sa kahangturan? ["Amen."] Ipondong ang inyong mga kamot nganha sa usa'g usa ug mag-ampo kita, samtang nagaampo ako para kang Igsoong babayeng Kelly.

⁶³⁷ Ginoong Jesus, itugot nga mokunsad ang Imong Balaang Gahum nganhi sa iglesia karon! Ug hinaut nga molukop Kini dinhi ug sa among igsoong babaye aron malugwayan pa ang iyang kinabuhi, Ginoo. Ihatag kaniya kining dakung kaayohan nga iyang ginaangkon, Ginoo. Ayoha ang Imong mga katawhan dinhi. Angkona ang himaya alang sa Imong Kaugalingon. Itugot kini, Ginoo.

⁶³⁸ Ug hinaut nga kining mga tawo nga nagpandong na sa ilang mga kamot diha sa usa'g usa. . .

Satanas. . .

⁶³⁹ Nagaduol kami karon sa niining mga panyo: Sa Ngalan ni Jesus Cristo, hinaut nga mamaayo ang matag tawo. Ginoo, panghimatud-i ang Imong Pulong pinaagi sa mga ilhanan nga naganunot niini.

⁶⁴⁰ Ug karon, Satanias, ikaw nga dautan nga yawa, napildi ka na. Miingon ang Dios nga ipahiuli Niya ang Anak sa Dios, nga Kaniya ikaw nagbudhi pinaagi sa imong mga kredo. Nagsaad Siya nga ipahiuli ang Iglesia ngadto sa kanhing mga kahimtang niini, pag modan-ag na ang pang-gabii nga mga Kahayag. Ug nagapuyo na kami Niini. Ug pinaagi sa pagpahiuli, aduna kami og katungod, aduna kami og Abogado, aduna kami og Manlalaman, ang among Labaw'ng Sacerdote, ug amo nang ipatuman ang maong panag-iya. Dugay na nimong gikuptan ang mga niini. Dili na nimo kini mabuhat pa. Ginasugo namo ikaw, sa Ngalan ni Jesus Cristo, pinaagi sa gahum sa Iyang pagkabanhaw ug sa Espiritu Santo nga ania karon: Gumula ka gikan sa niining mga mananambong! 

62-0422 Ang Pagpahiuli Sa Punoang Pangasaw-onon
Branham Tabernacle
Jeffersonville, Indiana U.S.A.

CEBUANO

©2026 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

www.branham.org